



## Bab 26

### BIOGRAFI SAIYIDINA AS-SYEIKH AS-SYAZILI رَحْمَةُ اللهِ عَلَيْهِ UJIAN DI TUNISIA

**K**emudian dari itu maka berpindahlah Saiyidina As-Syeikh As-Syazili رَحْمَةُ اللهِ عَلَيْهِ ke Tunis dan mendiami sebuah rumah yang menghadap kiblat,

وَاجْعَلُوا بُيُوتَكُمْ قِبْلَةً

*“...dan Jadikanlah rumah-rumah kamu [mengarah] kiblat (tempat solat)...” Saiyidina Yunus: 87*

... berdekatan dengan Masjid Al-Balath. Di sana beliau didampingi oleh sekumpulan tokoh mulia seperti Sidi As-Syeikh Abul Hasan Ali Makhluḥ As-Shiqilli, Sidi Abu Abdullah As-Shobuni, Sidi Abu Muhammad Abdul Aziz Az-Zaytuni, khadam setia Saiyidina yaitu Sidi Abul Azaim Madhi, Sidi Abu Abdullah Al-Bija'iy Al-Khayyath dan Sidi Abu Abdullah Al-Khariji Al-Khayyath. Kesemua yang disebutkan tadi masing-masing memiliki karamah dan keberkatan. Di tempat itu Saiyidina telah tinggal selama beberapa waktu hinggalah ramai orang datang berhimpun kepadanya.

Lalu kedengaranlah laporannya oleh Al-Faqih Abul Qasim Ibnul Barra' yang waktu itu menjadi qadhi besar Tunis. Qadhi besar merasa amat dengki lalu menghantar wakil untuk berdebat namun wakilnya itu tidak mampu menyaingi Saiyidina. (Hikayat qadhi besar Ibnul Barra')



## Bekalan Murid Ke Jalan Akhirat

dengan Saiyidina As-Syeikh As-Syazili amat penting untuk dipelajari, peristiwa ini mengandungi banyak pengajaran, iktibar dan kedudukan... kerana itu suka saya menuturkannya di sini agar kita tahu dan mengetahui berbagai sudut penderitaan yang dialami oleh seorang syeikh mursyid murobbi di peringkat mula perjalanannya, seterusnya bagaimana dirinya terdedah kepada berbagai bentuk penzaliman, penghinaan dan cabaran agar dirinya jadi sempurna seterusnya menyempurnakan para muridnya).

Maka berkatalah Ibnul Barra' kepada sultan Tunis waktu itu yaitu baginda Al-Amir Abu Zakariya: "Tuanku! Di sini ada seorang lelaki asal Syazilah yang sebenarnya gembala keldai tapi mendakwa dirinya mulia (keturunan Nabi), sudah ramai orang menjadi pengikutnya dan dia mengkau dirinya sebagai Al-Fathimi..." (ini merupakan tuduhan politik yang besar bahayanya waktu itu, perkataan ini bererti pendakwanya mempropagandakan kerajaan Fathimiyyah [yang bertolak belakang dengan arus perdana])... orang ini membuat onar di negeri tuanku."

Saiyidina As-Syeikh As-Syazili رَحْمَةُ اللهِ عَلَيْه berkata: "Aku mengujar: "Ya Robbi mengapa Dikau menamakan hamba As-Syazili sedangkan hamba bukan asal Syazilah?," lalu dikatakan kepadaku: "Ya Ali, Aku menamaimu As-Syazili kerana engkau adalah As-Syaadzu Liy.... Maknanya engkau ditunggalkan semata-mata untuk mengkhidmatiKu dan mahabbah padaKu."

Sultan Abu Zakariya رَحْمَةُ اللهِ عَلَيْه pun bersidang dengan Ibnul Barra' dan sekumpulan ahli feqah di Al-Qashbah (tempat memutus hukum dan perdebatan) lalu baginda duduk di belakang tabir untuk mendengar dan menyaksikan (tanpa dilihat oleh yang lain), kemudian hadirilah Saiyidina As-Syeikh As-Syazili رَحْمَةُ اللهِ عَلَيْه. Mereka bertanya tentang nasab beliau berkali-kali lalu dijawab oleh Syeikh dan sultan mendengarnya. Mereka berbicara dengan beliau dalam semua bidang ilmu lalu Syeikh mengatasi mereka bahkan memberi limpahan berbagai-bagai ilmu lain hingga mengunci mulut semua orang alim itu dan mereka tak mampu menjawab apa-apa kepada beliau. Saiyidina As-Syeikh As-Syazili berbalas bicara dan berkongsi dengan mereka semua pada ilmu-ilmu

yang dapat dituntut, maka bagaimana pula kalau beliau berbicara kepada mereka pada ilmu-ilmu kurniaan Ilahi.

Maka berkatalah sultan kepada Ibnul Barra': " "Lelaki ini seorang wali besar, kamu semua takkan mampu menewaskannya," maka kata Ibnul Barra': "Demi Allah jika dia keluar dari tempat ini sekarang nescaya rakyat Tunis akan berontak dan membuang tuanku!..." (lihatlah bagaimana alim yang jahat menakut-nakuti sultan... sebab setiap orang ada kepentingan peribadi) ... "Rakyat jelata sekarang sedang berhimpun di hadapan istana tuanku!" Lalu keluarlah para ahli feqah sedangkan Saiyidina As-Syeikh As-Syazili disuruh duduk (ditahan di situ).

Saiyidina رَحْمَةُ اللهِ عَلَيْهِ meminta kebenaran agar seorang sahabat (murid) nya dapat masuk menemuinya maka masuklah seorang kepada beliau. Kata si murid: "Ya Saiyidi, orang ramai mengata Tuan begian-begian, mereka berkata bahawa Tuan diperlakukan dengan begian-begian rupa jahat adab..." (seorang sahabat dan murid amat sopan dan beradab, dia tak mampu menceritakan kepada syeikhnya perkataan orang ramai yang salah, jahat, aib dan tidak benar kepada syeikhnya)... maka menangislah si murid di hadapan Syeikh. Saiyidina As-Syeikh membalas dengan senyuman (kerana gembiranya beliau dengan adab dan kejujuran si murid) lalu berkata: "Demi Allah kalaulah bukan kerana aku beradab dengan syarak (di sini Syeikh mahu menambah lagi adab si murid dan menguatkan keyakinannya terhadap kebenaran Syeikh dan pada aturan siasatnya... ini sikap yang amat ajaib sedangkan situasi amat dhaif dan lemah... Allah Taala jua yang memberinya dokongan dan kemuliaan) "...nescaya pastilah aku telah keluar dari sini dan dari sini," Syeikh mengisyaratkan dengan tangannya dan ke arah mana saja beliau mengisyaratkan terbelahlah dinding di arah itu.

Kemudian Syeikh berkata kepada si murid: "Bawa kepadaku cerek air dan sejadahku, kirimkan salam pada para sahabatku dan katakan kepada mereka: "Kami takkan hilang dari tuan-tuan sekalian melainkan hari ini sahaja, kami akan solat magrib bersama tuan-tuan sekalian Insyallah Taala." Si murid pun membawa apa yang diarahkan, Syeikh



## Bekalan Murid Ke Jalan Akhirat

berwudhu' lalu tawajjuh kepada Allah Subhanahu wa Taala kemudian beliau pun pergi رَكْعَاتِهِ. (Tidak disebutkan di sini ke mana perginya Syekh dan apa yang dilakukan, kemudian beliau kembali pada waktu yang ditetapkan... wahai Tuhan yang Maha Sejahtera, sejahterakanlah kami dan jadikanlah kami ahli taslim dan tasdiq).

Saiyidina رَضِيَ اللَّهُ عَنْهُ berkata: “Maka hampir-hampirlah aku mahu mendoakan hukuman ke atas sultan lalu dikatakan kepadaku: “Sesungguhnya Allah tidak redho engkau berdoa atas kegelisahan terhadap makhluk,” lalu diilhamkanlah kepadaku untuk berkata:

يَا مَنْ وَسِعَ كُرْسِيُّهُ السَّمَوَاتِ وَالْأَرْضَ وَلَا يَئُودُهُ حِفْظُهُمَا وَهُوَ الْعَلِيُّ الْعَظِيمُ.  
أَسْأَلُكَ الْإِيمَانَ بِحِفْظِكَ إِيْمَانًا يَسْكُنُ بِهِ قَلْبِي مِنْ هَمِّ الرِّزْقِ وَخَوْفِ الْخَلْقِ.  
وَاقْرَبْ مِنِّي بِقُدْرَتِكَ قُرْبًا تَمَحَقُّ بِهِ عَنِّي كُلَّ حِجَابٍ مَحَقَّتْهُ عَنْ سَيِّدِنَا  
إِبْرَاهِيمَ خَلِيلِكَ عَلَيْهِ الصَّلَاةُ وَالسَّلَامُ فَلَمْ يَحْتَجْ لِسَيِّدِنَا جِبْرِيلَ رَسُولِكَ عَلَيْهِ  
الصَّلَاةُ وَالسَّلَامُ وَلَا لِسُؤَالِهِ مِنْكَ. وَحَجَبَتْهُ بِذَلِكَ عَنْ نَارِ عَذْوِهِ. وَكَيْفَ لَا  
يَحْجُبُ عَنْ مَضَرَّةِ الْأَعْدَاءِ مَنْ غَيَّبَتْهُ عَنْ مَنَفَعَةِ الْأَحْبَاءِ. كَلَّا إِنِّي أَسْأَلُكَ أَنْ  
تُغَيِّبَنِي بِقُرْبِكَ مِنِّي حَتَّى لَا أَرَى وَلَا أَحْسَّ بِقُرْبِ شَيْءٍ وَلَا يَبْعِدُهُ عَنِّي إِنَّكَ عَلَى  
كُلِّ شَيْءٍ قَدِيرٌ.

“Wahai Tuhan yang kursiNya meliputi seluruh langit dan bumi, lagi tidak susah bagiNya menjaga kedua itu, lagi Dia Maha Tinggi dan Maha Agung. Aku mohon padaMu keimanan terhadap penjagaanMu; iman yang menetapkan ketenangan hatiku dari kebimbangan terhadap rezeki dan dari takut pada makhluk. Dan dekatlah kepadaku dengan kudratMu, dengan dampingan yang sertanya Engkau melenyapkan dariku segala hijab, seperti yang telah engkau lenyapkan dari Saiyidina Ibrahim teman rapatMu عَلَيْهِ الصَّلَاةُ وَالسَّلَامُ maka Baginda pun tidak berhajat kepada Saiyidina Jibril

*pesuruhMu عَلَيْهِ الصَّلَاةُ وَالسَّلَامُ dan tidak juga kepada permintaannya dariMu. Dengannya Engkau telah menghadang Baginda dari api musuhnya. Dan bagaimana pula takkan terhalang dari mudarat musuh si hamba yang Engkau gahibkan dia dari manfaat para kekasih. Bahkan sesungguhnya aku bermohon padaMu agar Engkau menghaibkan diriku dengan dampinganMu kepadaku hingga aku tidak melihat dan tidak merasakan dampingan apa pun dan tidak jua kejauhan apa pun dariku sesungguhnya Engkau Maha Kuasa atas tiap sesuatu.”*

Adapun sultan mempunyai seorang jariah(gundik) yang sangat disayangi antara sekian banyak jariahnya. Pada hari itu si jariah kesayangan jatuh sakit lalu mati serta merta maka sultan pun ditimpa kesusahan kerananya. Jenazah si jariah dimandi dan disiapkan di kediamannya. Sambil sibuk mengurus kerja-kerja pengebumian [para warga istana] terlupa bahawa mereka sedang mengasapi kain kafan dengan pedupaan lalu terbakarlah kubah istana serta segala alat perabot, permaidani, pakaian, perhiasan dan harta benda yang tak terkira harga dan banyaknya. Maka tahulah sultan bahawa musibah yang menimpanya kerana si wali ini. Peristiwa yang berlaku kedengaran ke telinga adinda sultan yang bernama Abu Abdullah Al-Lihyani, pada hari itu dia berada di luar kota lalu bergegas pulang dan mendapatkan Syeikh. Adinda sultan merupakan seorang yang selalu berziarah kepada Saiyidina As-Syeikh As-Syazili رَحْمَةُ اللهِ عَلَيْهِ dan teguh keyakinannya kepada beliau.

Lalu berkatalah dia kepada sultan: “Apatah gerangan perbuatan Ibnul barra’ yang menjerumuskan sultan? Demi Allah tidaklah dia menjerumuskan tuanku melainkan ke dalam binasa; binasa tuanku dan binasa siapa yang bersama tuanku. Marilah ikut adinda mengadap Syeikh,” maka bangunlah sultan mengikutnya bertemu Saiyidina As-Syeikh As-Syazili رَحْمَةُ اللهِ عَلَيْهِ, Sidi Abu Abdullah Al-Lihyani berkata: “Ya Saiyidi, demi Allah kekanda hamba ini tidak kenal kedudukanmu...,” adinda sultan mencium tangan dan kaki Syeikh meminta ampunnya kepada sultan. Maka berkatalah Syeikh kepadanya: “Demi Allah



## Bekalan Murid Ke Jalan Akhirat

sesungguhnya kekandamu tidak memiliki mudarat dan manfaat untuk dirinya, tidak juga dapat membuat dirinya hidup, mati dan bangkit sendiri...

كَانَ ذَلِكَ فِي الْكِتَابِ مَسْطُورًا

*“adapun yang demikian itu sudah termaktub di dalam kitab...”* **Al-Isra’: 58**

Dan keluarlah Sidi Abu Abdullah Al-Lihyani mengiring Saiyidina As-Syeikh رَحْمَةُ اللهِ عَلَيْهِ hingga sampai ke rumah beliau kemudian pulanglah dia.

Sehingga beberapa hari Saiyidina As-Syeikh masih tinggal di Tunis, kemudian beliau menjual kediamannya yang dekat Masjid Al-Balath yaitu rumah menghadap kiblat di Gerbang Al-Qaysariyyah sebelah atas. Beliau pun mengarahkan para sahabatnya untuk menuju ke benua timur sambil mengutus surat kepada Ibnul Barra’ dengan katanya: “Lihatlah, aku meluaskan bagimu kota Tunis.”

Khadam setia kepada Saiyidina As-Syeikh As-Syazili رَحْمَةُ اللهِ عَلَيْهِ Sidi As-Syeikh As-Soleh Abul Azaim Madhi bin Sultan berkata: “Satu hari kami berjalan mengiringi Syeikh lalu terjumpa Ibnul Barra’. Saiyidina As-Syeikh mengucap salam kepadanya namun dia berpaling dan tidak menjawab salam. Tiba-tiba muncul Al-Faqih Abu Abdullah bin Abul Hasan setiausaha sultan, apabila melihat Saiyidina segera dia turun dari baghalnya lalu terus pergi kepada beliau mencium tangan dan memohon doanya. Saiyidina pun mendoakannya kemudian beredar. Apabila masuk ke rumah Saiyidina As-Syeikh رَحْمَةُ اللهِ عَلَيْهِ berkata: “Sekarang aku menerima bicara mengenai dua orang tadi, dikatakan kepadaku: “Ya Ali, seorang hamba dicap celaka; Allah yang Maha Benar tahu dan tidak memandangnya walau si hamba alim berbagai ilmu. Seorang lagi hamba dicap bahagia; Allah yang Maha Benar tahu dan tidak memandang pada kesalahan si hamba walau apa yang dilakukannya.” (Subhanallah, Maha Suci Allah dan Maha Agungnya Dia... ini benar-benar bahaya tuan puan sekalian... saya mohon pada semua agar memahami dan berhati-hati).

Berkata Sidi Abul Azaim Madhi رَحْمَةُ اللهِ عَلَيْهِ: “Dan tidaklah kami mendengar Saiyidina As-Syeikh mendoakan hukuman ke atas Ibnul Barra’ lagi tidak beliau menyebut apa-apa mengenainya. Hinggalah satu hari ketika kami di Arafah pada musim haji Saiyidina berkata: “Wahai para fuqara’, aminkanlah doaku. Sekarang aku telah diperintah untuk berdoa ke atas Ibnul Barra’...,” Saiyidina kemudian menadah dua tangannya seraya mengucapkan: “Allahumma panjangkan umurnya dan janganlah Engkau memberi manfaat kepadanya dengan amalannya, jadikan dia mendapat pancaroba dari harta dan anaknya, jadikanlah dia di akhir umurnya khadam kepada orang-orang zalim dan tutuplah umurnya dengan kesudahan yang jahat.”

Adapun panjang umurnya sudah jelas dilihat orang. Ibnul Baraa’ itu memang banyak ilmunya namun tiada orang yang menyiarkan pengetahuannya lagi tidak dicatat apa-apa dari pelajarannya, maka sesudah matinya tidak ada orang peduli padanya. Tidak kedengaran ungkapan “Telah berkata Ibnul Barra’ begian-begian” maka jadilah pekerjaan waktu hidupnya tersia-sia. Adapun tentang anaknya maka dia tinggal ditingkat atas rumahnya, ertinya di atas kepala si ayah. Si anak ini asyik berhibur dengan nyanyian, arak, maksiat dan segala yang tidak halal lagi berterang-terangan melakukan itu semua (tanpa segan silu). Para fuqara’ sufi telah datang kepada Ibnul Barra’ untuk menegah perbuatan si anak dan menasihati namun kata si ayah kepada mereka: “Kasihan anakku itu, diuji dengan hiburan....” Adapun akhir umurnya dia menjawab pekerjaan menjaga ehwal orang-orang Rome (kaum Nasrani) maka setiap pagi mereka mengucap sejahtera di pintunya dengan kata: “Selamat pagi senior.”

Kita mohon ampun dan afiat dari Allah, janganlah kita dibalakan dengan sikap membenci awliyaNya serta ingkar terhadap mereka. Sesungguhnya Allah Taala telah berfirman [dalam hadis qudsi]: “Barangsiapa memusuhi waliKu sesungguhnya dia telah mencabar untuk berperang denganKu.”

Berkata Sidi Abul Azaim Madhi رَحْمَةُ اللهِ عَلَيْهِ: “Apabila Saiyidina As-Syeikh رَحْمَةُ اللهِ عَلَيْهِ mula bergerak menuju ke benua timur (Mesir) sultan mendengar



## Bekalan Murid Ke Jalan Akhirat

khabar itu lalu susahlah hatinya. Kata baginda: “Nanti apa dikata orang pada negeri kita; datang seorang wali Allah ke mari lalu diganggui dia hingga memaksanya keluar melarikan diri...,” maka sultan pun menyuruh orangnya mengajak Syeikh pulang. Apabila sampai kepada Saiyidina orang sultan berkata: “Tuanku sultan menyuruh tuan kembali,” maka jawab Saiyidina As-Syeikh: “Tidaklah aku keluar ini melainkan dengan niat menunaikan haji, nanti bila Allah menunaikan hajatku Insya Allah Taala aku akan kembali semula.”

Berkata Sidi As-Syeikh Abul Azaim Madhi: “Tatkala kami masuk ke kota Iskandariyyah, Ibnul Bara’ telah menghantar surat hasutan bahawa: “Orang yang sampai ke (Mesir) ini telah membuat onar di negeri kami, demikianlah yang akan dilakukannya di negeri kamu.” Maka sultan Mesir pun menitahkan Saiyidina ditahan di Iskandariyyah.

Duduklah kami beberapa hari tanpa tahu apa-apa tentang berita ini. Di waktu yang sama pemerintah sedang melakukan tekanan keatas pemuka-pemuka rakyat yang dipanggil Al-Qobail. Apabila para pemuka rakyat mendengar kedatangan Saiyidina As-Syeikh As-Syazili رَضِيَ اللهُ عَنْهُ وَأَرْضَاهُ mereka pun mendatangi beliau bagi meminta bantuannya (melepaskan mereka dari kezaliman). Mereka meminta doa lalu kata beliau kepada mereka: “Insya Allah Taala kami akan musafir ke Qaherah dan akan berbicara kepada sultan tentang perkara tuan-tuan sekalian.”

Maka pergilah kami keluar dari Gerbang As-Sidrah yang dijaga oleh askar dan gabenor; tiadalah orang keluar masuk dari gerbang ini melainkan diperiksa mereka, namun kami keluar tanpa dilihat dan diketahui sesiapa. Apabila sampai ke Qaherah dan pergi ke pusat pemerintahan pegawai istana meminta izin untuk kami masuk menghadap sultan, maka kata baginda: “Bagaimana itu?! Bukankah beta telah menitah orang ini ditahan di Iskandariyyah (ajaib ini!).

“Kami pun diberi izin masuk lalu menghadap kepada sultan yang bersidang dengan para qadhi dan golongan bangsawan. Saiyidina duduk bersama mereka sedang kami memerhatikan beliau. Raja pun bertitah: “Apa yang mahu kamu katakan wahai Syeikh?,” jawab beliau:



“Aku datang untuk menolong golongan Al-Qabail,” kata raja: “Sebelum itu tolonglah dirimu sendiri, ini surat yang memberi keterangan tentang kesalahanmu diutus oleh Ibnul Barra’ dari Tunis dengan cop mohornya,” baginda menghulur surat itu kepada Saiyidina lalu ujar beliau: “Aku, kamu dan Al-Qabail semuanya berada dalam genggaman Allah,” Saiyidina As-Syeikh عليه السلام pun bangun, apabila telah berjalan kira-kira 20 langkah para qadhi bercakap dengan sultan namun baginda tidak dapat bercakap.

“Mereka menggerakkan tubuh sultan tapi baginda tetap tidak bergerak dan tidak berkata barang sepatah pun. Orang-orang besar segera mendapatkan Saiyidina As-Syeikh عليه السلام dan masing-masing mencium tangan dan kaki beliau merayunya untuk kembali kepada sultan. Maka beliau pun kembalilah lalu menggerakkan sultan dengan tangannya yang penuh keberkatan maka dapatlah sultan bergerak semula.

Kemudian turunlah sultan dari takhtanya meminta halal kepada Saiyidina seraya mencium dua tangan beliau dan memohon doa. Sultan selanjutnya mengutus titah kepada gabenor Iskandariyyah agar menghentikan kekerasan (penzaliman) dari kaum Al-Qabail dan mengembalikan segala yang telah dirampas dari mereka. Kami telah tinggal di pusat pemerintahan menjadi tetamu sultan selama beberapa hari dan bergegarlah tanah bumi Mesir dengan kehadiran kami hinggalah kami berangkat pergi menunaikan haji.

“Ketika kami pulang dari haji kami telah kembali ke Tunis. Kali ini Syekh tinggal di sebuah rumah sebelah dalam Gerbang Al-Hadid dekat *Bathha’ As-Si’riyyah*. Berdiamlah beliau di situ selama beberapa waktu hinggalah datangnya khalifah beliau yaitu si pemuda wali Sidi Abul Abbas Al-Mursi عليه السلام dari Andalusia yang telah mengganti beliau kemudian hari di makam kewalian *al-quthbaniyyah al-kubro* (al-ghautsiyyah).



## Bab 27

### BIOGRAFI SAIYIDINA AS-SYEIKH AS-SYAZILI رَحْمَةُ اللهِ عَلَيْهِ وَسَلَّمَ BERHIJRAH KE MESIR

Saiyidina As-Syeikh As-Syazili رَحْمَةُ اللهِ عَلَيْهِ وَسَلَّمَ berkata: “Aku telah melihat Saiyidina wa Maulana Muhammad Rasulullah ﷺ dalam mimpi lalu Baginda bersabda kepadaku: “Wahai Ali!,” jawabku: “Hamba sahut serumu ya Rasulullah,” Baginda bersabda: “Pindahlah ke benua Mesir, di sana engkau akan mendidik 40 orang siddiq.

“Adapun waktu itu musim panas yang amat teriknya, aku pun berkata: “Ya Saiyidi ya Rasulullah, panas amat terik sekarang,” maka sabda Baginda: “Awan akan memayungimu,” maka kataku: “Duhai kekasihku, hamba bimbang kehausan,” maka sabda Baginda: “Langit setiap hari akan menurunkan hujan di hadapanmu.” Baginda telah menjanjikan bahawa aku akan beroleh 40 karomah dalam perjalananku.”

Sidi As-Syeikh Ibnu Sobbagh (perawi kisah ini) berkata: “Maka dengan itu Saiyidina رَحْمَةُ اللهِ عَلَيْهِ وَسَلَّمَ pun menyuruh teman-temannya memulakan perjalanan dan bergeraklah beliau musafir ke negeri sebelah timur (Mesir, kota Iskandariyyah).

Antara tokoh yang menemani beliau dalam perjalanan itu adalah Sidi As-Syeikh As-Soleh Al-Wali Abu Ali Yunus Ibnu Sammath. As-Syeikh As-Soleh Abu Abdullah An-Nasikh menuturkan padaku: “Aku bersama mengkhidmati Syeikh Abu Ali Ibnu Sammath dalam perjalanannya mengiring Saiyidina As-Syeikh Abul Hasan As-Syazili -moga Allah meredhoi mereka semua-. Apabila kami sampai kota Tharablus

berkatalah Saiyidina As-Syeikh As-Syazili: “Kita akan meneruskan perjalanan melalui Jalan Al-Wustho (padang pasir),” manakala Sidi As-Syeikh Ibnu Sammath memilih untuk menempuh jalan pesisir laut.

“Maka pada malam itu Sidi As-Syeikh Ibnu Sammath mimpi bertemu Saiyidina wa Maulana junjungan Nabi ﷺ. Baginda bersabda kepadanya: “Wahai Yunus, bermula engkau wali Allah dan Abul Hasan juga wali Allah, dan tidaklah Allah menjadikan pertindihan antara wali-walinya. Pergilah engkau menempuh jalan yang engkau pilih dan dia meneruskan perjalanan pada jalan yang dipilihnya.”

“Lalu berpisahlah kami hingga bertemu semula berdekatan kota Iskandariyyah. Apabila sudah solat subuh As-Syeikh Abu Ali As-Sammath pergi ke kamar Saiyidina As-Syeikh Abul Hasan As-Syazili -moga Allah meredhoi mereka semua- sambil diiringi kami lalu masuk bertemu dan duduk beradab di depan beliau. Bicaralah dia kepada Syeikh dengan kalam yang kami tidak faham apa pun dari butirannya. Apabila mahu beredar dia berkata: “Ya Saiyidi, berilah tangan tuan biar aku menciumnya,” beliau menghulur tangan lalu dia menciumnya kemudian beredar sambil menangis. Maka takjublah kami dengan halnya hari itu.

“Di tengah jalan As-Syeikh Abu Ali As-Sammath berpaling kepada teman-temannya lalu berkata: “Malam tadi aku bermimpi bertemu Saiyidina wa Maulana junjungan Nabi ﷺ. Baginda bersabda kepadaku: “Wahai Yunus, adapun Abul Hajjaj Al-Aqshuri di Mesir (makam pusara dan masjidnya di kota Luxor, selatan Mesir di wilayah Soied) merupakan wali quthb zamannya, maka semalam dia sudah meninggal dunia dan Allah menggantikan tempatnya dengan Abul Hasan As-Syazili,” maka inilah aku telah mendatangi beliau dan bersumpah setia kepadanya sebagai wali quthb.”

“Apabila kami sampai ke Kota Iskandariyyah keluarlah orang ramai menyambut rombongan kafilah, aku melihat Sidi As-Syeikh Abu Ali As-Sammath menepuk tangannya kepada kepala kenderaan, sambil menangis beliau berkata: “Wahai ahli negeri ini, jika kamu tahu siapa yang datang kepadamu pada kafilah ini nescaya kamu semua mencium tapak binatang tunggangannya. Demi Allah segala keberkatan datang



## Bekalan Murid Ke Jalan Akhirat

kepada kamu sekalian.”

Abu Abdullah An-Nasikh juga bercerita padaku: “Pernah aku berjalan di belakang Saiyidina As-Syeikh Abul Hasan As-Syazili رَحْمَةُ اللهِ عَلَيْهِ , tika itu beliau sedang menunggang sekedup di atas unta. Aku lihat dua orang lelaki berjalan di bawah bayang-bayang unta itu. Kata salah seorang kepada temannya: “Hai si polan, aku lihat polan itu menyakitimu dalam pergaulan dan sebaliknya engkau berbuat baik padanya,” maka jawab si teman: “Dia itu senegeri denganku, maka jawapanku sama seperti ucapan Majnun Laila:

*Majnun melihat anjing di padang pasir,*

*lalu anjing itu dilayannya,*

*diberi makan dengan baiknya.*

*Orang mencela perbuatannya,*

*engkar padanya dengan mengata:*

*Mengapa anjing dilayan mesra?*

*Jawab Majnun: Janganlah mencela...*

*kerna matakु pernah melihatnya,*

*sekali ada di kampung Laila.*

“Mendengarkan itu Saiyidina As-Syeikh Abul Hasan mengeluarkan kepalanya dari sekedup unta seraya berkata kepada si lelaki: “Ulangkan padaku perkataanmu wahai anakku,” lalu diulanglah perkataannya kepada Saiyidina. Maka bergoyanglah syeikh di atas untanya seraya mengucapkan:

*Jangan mencela...*

*kerna matakु pernah melihatnya,*

*sekali ada di kampung Laila.*

“Saiyidina terus mengulang-ulang rangkap itu kemudian melempar sehelai *ghifarah* (sejenis pakaian) warna kismis kepada si lelaki seraya berkata: “Ambillah ia dan pakailah, sungguh engkau lebih berhak keatasnya dariku, semoga Allah mengurniakan balasan baik padamu atas mulianya pergaulanmu wahai anakku.”

Kata Abu Abdullah An-Nasikh: “Aku pun menunjuk kepada penerima *ghifarah* seraya berkata: ‘Berikanlah padaku selendang itu,’ lalu ku ambil dari tangannya dan ku ciumnya. Kemudian aku memberikan kepada lelaki itu seberapa banyak wang dirham yang ada padaku, namun kata si lelaki: “Demi Allah jika engkau memberi emas sebanyak ini kepadaku pun tidak akan ku jualnya. Demi Allah ini barang amat berharga yang dapat padaku, pasti nanti akan ku masukkan sekali ke dalam kafanku. Demi Allah tidaklah aku berjalan di bawah bayang-bayang unta beliau melainkan kerana berharap semoga Allah merahmatiku kerana aku mendengar zikir-zikir beliau, kerana aku tahu rahmat Allah bercucuran keatasnya, maka semoga aku juga turut menerima barang sedikit darinya.”

Kata Abu Abdullah An-Nasikh: “Maka tahulah aku bahawa lelaki itu lebih mengerti dariku.” (Ya Salam... berapa ramai orang dekat tapi sebenarnya dia jauh dan berapa ramai orang jauh tapi sebenarnya dia dekat... tuan-puanku sekalian fahamilah nescaya kamu beroleh keberuntungan).

Saiyidina As-Syeikh As-Syazili رحمته الله عليه berkata: “Apabila sampainya aku ke negeri belahan timur (Mesir) dikatakan kepadaku: “Ya Ali, hari-hari cobaan telah berlalu dan mendatang pula hari-hari kurniaan, sepuluh dengan sepuluh... ikutilah tauladan nendamu عليه السلام.”

Sidi Ibnus Sobbagh رحمته الله عليه berkata: “Pada tahun sampainya Saiyidina As-Syeikh dari Tunis ke Mesir beliau mahu pergi mengerjakan haji. Namun berlaku kekecohan bersenjata di benteng-benteng pertahanan yang berontak melawan raja di Qaherah, maka sibuklah raja bekerja untuk menghapuskan mereka lalu tidak menyiapkan kawalan tentera dan kelengkapan kafilah haji (sepertimana program tahunannya). Maknanya tiada jaminan keselamatan untuk perjalanan haji tahun ini.



“Lalu keluarlah Saiyidina As-Syeikh dari zawiyahnya ke Al-Birkah (tempat perhimpunan musafir haji) dengan tujuan mahu pergi haji dan beliau diikuti orang ramai.

“Orang ramai pergi mengadap tuan mufti Al-Faqih Al-Qadhi ‘Izzuddin Bin Abd. Salam dan meminta fatwa kepadanya apakah harus melakukan perjalanan haji [dalam keadaan tidak aman sekarang?]. Maka jawab mufti: “Tidak boleh pergi (Kerana membahayakan nyawa jemaah haji dari risiko penyamun dan perompak) tanpa perlindungan keselamatan dari pihak tentera.

“Orang ramai pun kembali memberitahu Saiyidina As-Syeikh tentang fatwa mufti maka kata beliau: “Temukanlah aku dengannya,” maka bertemulah beliau dengan mufti di Masjid Jami’ pada hari Jumaat dengan dihadiri ramai jemaah. Kata Saiyidina kepada mufti: “Wahai faqih, pada pendapatmu jika seorang lelaki dijadikan untuknya perjalanan ke seluruh muka bumi ini hanya selangkah maka apakah harus baginya untuk bermusafir waktu takut dan mara bahaya atau tidak harus?,” jawab mufti: “Jika begitu halnya maka orang ini berada di luar hukum fatwa.

“Maka ujar Saiyidina kepada mufti: “Demi Allah Tuhan yang tiada Tuhan selain Dia, aku adalah kalangan mereka yang dijadikan perjalanan di muka bumi baginya hanya selangkah. Jika nanti aku melihat ada apa-apa yang memerbahayakan rombongan di perjalanan nescaya akan ku langkahkan bagi mereka ke tempat yang aman. Dan tak dapat tidak aku dan tuan akan sama-sama berdiri di depan Allah Azza Wajalla nanti dan silakanlah di sana tuan menanyakan aku tentang hakikat perkataanku padamu sekarang.”

“Saiyidina رحمته الله pun berangkat haji pada tahun itu bersama para muridnya dan orang ramai yang mahu, lalu ditengah perjalanan zahirilah baginya berbagai keramat.

“Antaranya gerombolan penyamun datang waktu malam untuk menjarah rombongan, namun apabila masuk ke tengah rombongan para penyamun mendapati diri mereka masuk ke dalam benteng dan tidak

dapat keluar darinya seolah-olah kota pertahanan yang dibina. Pada esok paginya gerombolan penyamun datang mengadap Saiyidina As-Syeikh dan kesemua mereka bertaubat kepada Allah Taala.”

“Apabila selesai haji kembalilah ke negeri Mesir. Orang ramai dan tuan faqih mufti dari kota Qaherah keluar berjalan kaki ke Al-Birkah (tempat berhimpun jemaah haji yang pergi dan kembali di luar kota) untuk menyambut jemaah haji. Para jemaah menceritakan kepada tuan mufti pengalaman mereka beroleh berbagai kurnia Allah Taala sepanjang perjalanan, apabila sudah masuk ke kota qadhi As-Syeikh Izzuddin pun datang menziarahi Saiyidina As-Syeikh. Maka kata Saiyidina kepadanya:

“Wahai faqih, demi Allah jika bukan kerana beradab kepada nendaku Rasulullah ﷺ nescaya pada hari wukuf aku bawa kafilah haji dari Qaherah melangkah terus ke Padang Arafah,” maka kata mufti: “Aku beriman dengan Allah,” kemudian Saiyidina As-Syeikh رَحْمَةُ اللهِ عَلَيْهِ berkata kepadanya: “Wahai faqih Izzuddin lihatlah sekarang kepada hakikat yang ku katakan tadi,” Saiyidina pun memberi isyarat dengan tangannya yang penuh keberkatan ke arah kiblat lalu semua yang ada di situ melihat Kaabah yang mulia di depan mata mereka hingga kelim kabut dan gembiralah mereka.

“Qadhi (As-syeikh Izzuddin) menghulur kepalanya kepada Saiyidina seraya berkata: “Tuanlah syeikh saya mulai saat ini!,” lalu jawab Saiyidina: “Bahkan engkau saudaraku Insya Allah Taala.”



## Bab 28

### BIOGRAFI SAIYIDINA AS-SYEIKH AS-SYAZILI **SYEIKH MURSYID: PENDIDIK ROHANI DAN JASMANI**

**S**idi Madhi Abul Azaim berkata padaku (Sidi Ibnus Sobbagh): “Pada satu hari Saiyidina As-Syeikh As-Syazili berbicara kepada para sahabatnya tentang hakikat syeikh mursyid, kata beliau: “Adapun tangan syeikh mursyid itu bersama para muridnya dan menjaga mereka di mana saja mereka berada baik mereka hadir atau tidak hadir.” Sidi Abul Azaim berkata: “Lalu di dalam hati aku membangkang perkataan beliau kerana kataku itu hanya dapat dilakukan oleh Allah Azza Wajalla sahaja, jika di hadrat syeikh bolehlah beliau menjaga murid, tapi jika tidak bersama maka hanya Allah Azza Wajalla saja yang dapat melakukan itu...,” dan majlis pun berakhir.

“Pada pagi esoknya aku merasa kesempitan yang amat sangat melanda jiwaku. Aku pun keluar dari benteng kota Iskandariyyah dan duduk sepanjang-panjang hari itu di tepi laut. Sesudah solat asar aku pun duduk memasukkan kepala dalam kalungan [tasbih]ku, tiba-tiba terasa ada yang menguis aku, fikirku tentu seorang faqir mahu bergurau denganku.

“Aku pun mengeluarkan kepala lalu mendapati seorang perempuan jelita berpakaian cantik dan perhiasan. Aku berkata padanya: “Apa yang kamu mahu?,” jawab si perempuan: “Dirimu,” aku pun berkata:



“Aku berlindung dengan Allah darimu!” maka kata perempuan itu: “Demi Allah aku takkan melepaskanmu!” Aku pun menolaknya dari mendekatiku namun wanita itu memelukku ke pangkuannya dan mempermainkan aku seperti bermain dengan burung pipit. Aku jadi tak berdaya mempertahankan diri dan dia telah pun menindihku di bawah dua pehanya.

“Lalu nafsuku pun merasa jinak kepadanya, dengan tidak semena-mena ada satu tangan menarik bahu, tahu-tahu aku mendapati Saiyidina As-Syeikh رحمته الله dan beliau mengujar kepadaku: “Hai Madhi, apa keadaan yang menimpamu ini?,” beliau pun membuang aku dari perempuan itu.

“Aku rasakan diriku bagai jatuh dari langit. Aku terus bangun dan mengangkat kepalaku lalu tidak ku dapati Saiyidina dan tidak juga perempuan itu. Maka takjublah aku dengan apa yang berlaku dan tahulah aku bahawa yang menimpa diriku tadi adalah kerana dosaku dengan Saiyidina As-Syeikh رحمته الله, sebab berlakunya kerana aku membangkang beliau semalam.

“Aku pun istighfar memohon ampun kepada Allah lalu wudhu’ dan solat maghrib, kemudian pergi ke Gerbang Al-Akhdar, waktu itu semua pintu kota telah ditutup. Apabila aku mendekatinya pintu itu terbuka dan aku pun masuk ke kota lantas tertutup pula gerbang itu di belakangku. sedangkan gerbang ini tidak dibuka melainkan selepas solat Jumaat; dari gerbang ini amir kota dan rakyat jelata keluar bersiar-siar ke pantai kemudian gerbang akan ditutup semula dan tidak dibuka melainkan Jumaat depan.

“Aku masuk ke kota dengan menyorok-nyorok agar tidak dilihat oleh fuqara’ sufi dan terus kembali ke rumahku. Apabila Saiyidina As-Syeikh selesai menunaikan solat isya’ para jemaah pun bersurai. Pada setiap malam beliau akan mengadakan perjumpaan dengan orang yang datang dari pelusuk negeri untuk mereka mendengarkan kalamnya.

“Saiyidina As-Syeikh masuk ke bilik khalwahnya lalu bertanya: “Di mana Madhi?,” jawab para fuqara’: “Seharian ini kami tidak melihatnya



## Bekalan Murid Ke Jalan Akhirat

tuanku,” kata beliau: “Panggillah dia di rumahnya,” mereka pun datang kepadaku lalu kataku: “Aku sakit,” dan memang benar aku jatuh sakit kerana hal yang menimpaku sangat berat dan tidaklah aku kembali ke rumah melainkan dengan hal yang amat besar. Lalu kata Saiyidina kepada mereka: “Usung dia ke mari.”

“Mereka lalu mengusungku dan membawa aku masuk mengadap Saiyidina As-Syeikh, beliau lalu menyuruh semua yang lain beredar maka duduklah aku di hadapannya. Kata beliau: “Wahai Madhi,” ku jawab: “Saya...,” kata beliau: “Semalam waktu aku berkata begian-begian engkau membangkang. Lalu di manakah tanganku hari ini darimu ketika engkau hampir terjerumus ke lembah maksiat. Ya Madhi, siapa yang tidak mampu melakukan itu maka bukanlah dia seorang syeikh,” (ini adalah maqam para syeikh kamil yang beroleh izin dari Allah dan Rasulullah ﷺ... selain mereka tidak memiliki kemampuan ini).

Abul ‘Azaim Madhi juga mengkhabarkan padaku: “Kami bersama Saiyidina As-Syeikh di Damanhur yang perjalanannya sehari dengan kuda... (jaraknya sekarang kurang lebih setengah jam perjalanan kereta) dari kota Iskandariyyah. Sesudah solat asar tuan Syeikh memberi padaku sepucuk surat untuk disampaikan kepada Al-Faqih Fakhruddin bin Al-Faizi di kota Iskandariyyah mengenai suatu hajat yang ditawarkan kepada beliau. Kataku kepada syeikh: “Ya Saiyidi, besok pagi-pagi hamba akan bertolak ke sana Insya Allah,” lalu kata beliau padaku: “Malam ini juga kamu bertolak dan segera kembali dengan jawabannya Insya Allah Taala.”

“Maka aku pun menyandang pedangku lalu keluar menuju ke kota. Tahu-tahu aku sudah sampai ke Iskandariyyah dalam jarak masa yang paling singkat. Surat itu terus ku hantar kepada syeikh berkenaan lalu kembali semula sebelum matahari kekuning-kuningan. Dalam perjalanan aku melewati pergunungan Al-Hajir lalu aku mendengar di situ suara amat berdengung-dengung dan merasa ada yang berjalan di belakangku. Sangkaku tentu ini bunyi gerombolan penyamun mahu merompakku di jalan siang. Aku pun menghunus pedang dan menunggu, namun tidak kelihatan seorang pun yang muncul.

“Apabila sampai aku duduk mengadap Syeikh dah beliau tersenyum padaku. Kata beliau: “Wahai Madhi, kamu menghunus pedangmu untuk menentang penyamun? Suara berdengung yang engkau dengar adalah bunyi malaikat. Demi Allah tidaklah engkau keluar dari sisiku melainkan lapan puluh ribu malaikat menjagamu hinggalah engkau kembali semula kepadaku dengan perintah Allah.”

Tuan-puanku sekalian saya mohon agar tidak mengengkari... fahamilah bahawa para masyaikh kamil punya segala kebaikan di sisi Tuhan mereka. Antara dalil-dalilnya yang disebut Al-Quranul Karim:

لَهُمْ مَا يَشَاءُونَ عِنْدَ رَبِّهِمْ ذَلِكَ جَزَاءُ الْمُحْسِنِينَ.

*“Disediakan untuk mereka (para awliya) apa yang mereka kehendaki, di sisi Tuhan mereka; demikianlah balasan golongan muhsinin (mereka yang berusaha memperbaiki amal perbuatannya)”*

**Az-Zumar: 34**

لَهُمْ مَا يَشَاءُونَ عِنْدَ رَبِّهِمْ ذَلِكَ هُوَ الْفَضْلُ الْكَبِيرُ.

*“...(para awliya) mereka beroleh apa sahaja yang mereka ingini di sisi Tuhan mereka; yang demikian itu ialah limpah kurnia yang besar”* **As-Syura: 22**

لَهُمْ مَا يَشَاءُونَ فِيهَا وَلَدَيْنَا مَزِيدٌ.

*“Mereka (para awliya) beroleh apa yang mereka kehendaki di situ, dan di sisi Kami ada lagi tambahan (limpah kurnia yang tidak terlintas di hati mereka)”* **Qaaf: 35**

Sidi Abul ‘Azaim Madhi mengkhobar lagi padaku: “Satu hari Saiyidina As-Syeikh رَحِمَهُ اللهُ عَلَيَّ mengutus aku dari Iskandariyyah ke kota Dimyath untuk mengurus satu hajat beliau. Ketika itu ada seorang lelaki warga Dimyath bertamu kepada kami lalu ingin menyertaiku perjalananku. Tetamu meminta izin Saiyidina lalu beliau pun memberi



izin.

“Waktu kami bergerak ke Gerbang As-Sidrah lelaki itu mengeluarkan wang dirhamnya untuk membeli roti dan lauk. Maka kataku padanya: “Kita tidak perlu apa-apa bekal,” maka balasnya padaku: “Apakah kita akan ketemu kedai si polan di tengah sahara?!” kedai yang dimaksudkan lelaki Dimyath ini ialah satu kedai manisan di Iskandariyyah (dia berkata begitu untuk menyenangkan hati temannya). Maka jawabku: “Bahkan kedai yang lebih baik dari itu Insya Allah Taala.”

“Adapun aku bila masa sahaja keluar musafir tidak membawa bekal. Jika lapar aku akan mendengar suara dari belakangku berkata: “Hai Madhi, keluarlah ke sebelah kanan nescaya engkau akan menemui apa yang dapat kau makan,” demikianlah juga jika haus, maka sentiasa aku mendapat makanan yang baik dan air segar.

“Maka keluarlah kami berdua menempuh perjalanan dengan pantas bertenaga hingga ke tengah hari. Lelaki itu berkata padaku: “Hai Madhi, berilah aku makan, sekarang aku sudah lapar,” maka tiba-tiba aku mendengar suara Saiyidina As-Syeikh seperti biasa, katanya padaku: “Hai Madhi, tamu kamu sudah lapar, keluarlah ke kanan nescaya engkau beroleh makanan untuk menjamunya,” maka keluarlah aku ke sebelah kanan lalu kami menemui setalam penuh manisan *kinafah* yang harum diadun dengan kasturi dan air mawar. Lantas makanlah kami berdua dengan nikmatnya. Lelaki itu takjub tak sudah melihat apa yang disaksikannya.

“Aku pun berkata kepadanya: “Manakah yang lebih baik; hidangan ini atau apa yang engkau tunjukkan padaku di kedai manisan polan?,” jawab si lelaki: “Demi Allah tidak pernah aku melihat makanan sebegini, tidak pernah disediakan makanan sehebat ini di mana-mana istana raja sekalipun.” Tetamuku mahu membawa baki manisan yang tidak habis namun aku menegahnyanya, yang tidak habis aku biarkan saja sebagaimana adanya.

“Kami pun berjalan sebentar lalu haus. Tiba-tiba aku mendengar

suara tuan Syeikh berkata kepadaku: “Wahai Madhi, keluarlah ke sebelah kanan nescaya engkau akan mendapati air,” maka kami pun mendapati ada mata air segar yang terpancar dari pasir. Kami pun minum darinya lalu tidur sebentar. Apabila bangun kami tidak mendapati walau setitik air pun.

“Maka tanya si lelaki: “Mana perginya air yang ada di sini?,” jawabku: “Aku tidak tahu menahu,” kata lelaki itu: “Demi Allah tuan Syeikh ini telah dikurniai kelebihan agung dalam melakukan kehendaknya. Demi Allah aku takkan kembali kepada keluargaku melainkan aku mencapai apa yang diajar oleh tuan Syeikh ini atau aku mati pada jalan Allah.

“Lelaki itu pun meninggalkan jaket bulunya kepadaku lalu berjalan masuk ke padang pasir sambil mulutnya menyebut Allah... Allah.

“Apabila perjalananku selesai aku pun kembali kepada tuan Syeikh. Beliau berkata padaku: “Wahai Madhi, engkau telah menerbangkan si tetamu,” maka kataku: “Tuanlah yang telah menerbangkannya. Tuanlah yang memberinya makan manisan kinafah di tengah sahara dan memberinya minum air segar dari celahan pasir,” maka kata Saiyidina: “Ya Madhi, lelaki itu telah berlalu pergi bersama mereka yang pergi kepada Allah Taala.” (Yaitu satu bentuk pelarian kepada Allah Taala seperti dalam firmanNya):

فَفَرُّوا إِلَى اللَّهِ إِنِّي لَكُمْ مِّنْهُ نَذِيرٌ مُّبِينٌ.

*“Maka segeralah kamu lari kepada Allah (dengan bertaubat dan taat) sesungguhnya aku diutuskan Allah kepada kamu, sebagai pemberi amaran yang nyata”* **Az-Dzariyat: 50**

Lelaki tadi telah lari kepada Allah dengan jasad dan rohnya, dia punya banyak sebab untuk berbuat begitu dan pada kesempatan ini kita tidaklah akan membicarakannya. Cuma yang dituntut ialah lari kepada Allah dengan roh manakala badan tetap kekal di mana tempat dia diletakkan Allah Taala; di rumahnya, dalam keluarganya dan tugas pekerjaannya. Ini dapat disempurnakan dengan berkat berdamping



## Bekalan Murid Ke Jalan Akhirat

kepada guru yang sempurna lagi menyempurnakan yaitu kalangan rijal dan para masyaikh besar yang kamil -semoga Allah meredhoi mereka dan menjadikan beroleh kemanfaatan mereka khususnya Saiyidina Abdun Nasir murobbi jasad dan roh kita-... saya mohon tuan-puan memahami.

Sidi Abul 'Azaim Madhi juga mengkhabarkan padaku: "Pada satu tahun aku telah pergi menunaikan ibadat haji seorang diri setelah minta izin dari Saiyidina As-Syeikh..." (lihatlah, betapa seorang murid sejati itu sentiasa minta izin dari syeikhnya dan tidak bermain-main dengan beliau... ini tidak; syeikh cakap begian si murid takwil cakap syeikh atau memesongkan maknanya supaya dia tidak melakukan seperti kehendak syeikh... inilah musibah muridin dan muridat di zaman sekarang... mereka tidak faham dan tidak mahu memahami... atau mereka sebenarnya faham tapi tak mahu mempraktis... sebab inilah mereka tidak cepat maju dalam menempuh jarak perjalanan nafsu dan segala hijab diri... mereka menyangka dan semata-mata menyangka diri mereka cerdik... hakikatnya mereka bukan mahu Allah dan RasulNya ﷺ mereka hanya mahu diri mereka sendiri... hati-hatilah! Sesungguhnya aku telah memberi amaran padamu).

Apabila selesai segala manasik aku pun mendatangi Masjidil Haram untuk tawaf wida'. Maka berlaku pada waktu itu gerombolan orang Makkah membuat onar merampas harta benda saki baki jemaah haji yang masih belum meninggalkan tanah suci..." (sebenarnya bukan warga Makkah yang melakukan itu, tapi kaum A'raab (Badwi) yang tinggal di perbatasan Makkah kerana kepicikan ekonomi yang buruk masa itu).

"Aku pula memegang banyak amanah yang dipesankan orang kepadaku. Maka masuklah aku ke dalam Hijir di bawah pancuran Kaabah lalu berkata: "Jika aku keluar masjid nescaya akan dirompak, jika aku masih tetap di sini aku menahan harta benda amanah dari sampai kepada para pemiliknya," maka duduklah aku kebingungan lalu aku menyeru nama Saiyidina As-Syeikh -Abul Hasan As-Syazili-.

"Tiba-tiba aku melihat beliau berdiri di Bab An-Nadwah memberi

isyarat kepadaku, aku pun bersegera mendapatkannya. Beliau bergerak keluar meninggalkan aku dan aku pula cuba mengejarnya. Demikianlah aku terus mengekorinya hingga aku sampai kepada rombongan kafilah. Aku cari beliau namun tidak ketemu.

“Apabila sampai ke Iskandariyyah aku pun mendatangi Saiyidina seraya menyalaminya. Beliau bertanya khabarku kemudian berkata: “Wahai Madhi, ketika engkau dihipit kesulitan lalu menyeru kami, kami pun datang dan menyelamatkanmu dari kesulitanmu.”

Sidi Abul ‘Azaim Madhi رَضِيَ اللهُ عَنْهُ mengkhobar lagi padaku: “Pada satu tahun aku telah menyertai Saiyidina pergi menunaikan haji. Apabila kami sampai ke Madinah Al-Munawwarah dan masuk ke Masjid Saiyidina wa Maulana Rasulallah ﷺ Saiyidina As-Syeikh melepaskan serban dari kepalanya lalu berkata,

صَلَوَاتُ اللَّهِ وَمَلَائِكَتِهِ وَرُسُلِهِ وَأَنْبِيَائِهِ وَجَمِيعِ خَلْقِهِ مِنْ أَهْلِ سَمَوَاتِهِ وَأَرْضِهِ  
عَلَيْكَ يَا سَيِّدِي يَا رَسُولَ اللَّهِ وَعَلَى أَصْحَابِهِ أَجْمَعِينَ.

*“Selawat dari Allah dan para malaikatNya, para rasul dan nabiNya serta seluruh makhlukNya dari penghuni segala petala langit dan bumiNya buatmu ya saiyidi ya Rasulallah, begitu juga buat para sahabatnya sekalian.”*

“Beliau terus mengulang-ulang ucapan itu dengan halnya yang amat besar hingga tenanglah akhirnya hal itu darinya lalu beliau pun duduk di masjid. Beliau رَضِيَ اللهُ عَنْهُ berkata: “Wahai Madhi, apabila aku mengucapkan salam maka Baginda menyahut salamku dengan isyarat jari telunjuknya dan aku melihat kepada Baginda.”

“Pada waktu itu masuklah Abu Muhammad Abd. Aziz Az-Zaytuni yang mengurus makanan para fuqara’ (muridin). Katanya kepada Saiyidina: “Ya Saiyidi, binatang kenderaan hamba telah mati dan barang bawaannya masih di atas tanah,” maka jawab Saiyidina: “Demi Allah saat ini tiada padaku barang sekeping wang baik dinar maupun dirham.” Beliau pun menyuruhnya duduk dan kami para fuqara’ duduk



## Bekalan Murid Ke Jalan Akhirat

dalam halaqah mengelilingi beliau.

“Saiyidina As-Syeikh menundukkan kepalanya beberapa lama. Kemudian beliau mengangkat kepalanya lantas berkata: “Wahai Abdul Aziz, dekatlah padaku,” si pengurus pun mendekati beliau lalu dikatakan padanya: “Masukkan tanganmu ke poketku dan ambillah apa yang ada padanya,” lalu dimasukkanlah tangannya ke poket Saiyidina dan dikeluarkannya penuh dengan wang emas. Maka kata beliau: “Lihatlah wang ini, demi Allah tidaklah ia dicap oleh pengecap dan tidak ditempa oleh tukang, namun dikatakan kepadaku: “Wahai Ali, ambillah apa yang ada di poketmu,” Saiyidina lalu berkata kepada pengurus: “Pergilah engkau membeli unta dan apa yang diperlukan oleh para fuqara’ (muridin).” (Lihatlah betapa seorang syeikh memberi segala yang ada padanya (waktu dan segala miliknya) kepada muridin dan tidak meninggalkan apa-apa untuk anak-anak dan isteri-isterinya... apakah muridin mampu untuk memberi segala-galanya kepada syeikh mereka... yang demikian itulah golongan sodiqin dan sodiqat ahli kejujuran).





## Bab 29

### BIOGRAFI SAIYIDINA AS-SYEIKH AS-SYAZILI رَحْمَةُ اللهِ عَلَيْهِ SYEIKH DAN KELUARGA

Kita teruskan lagi bersama perkhabaran, ahwal dan mutiara kata junjungan kita Saiyidina Abul Hasan As-Syazili رَضِيَ اللهُ عَنْهُ وَأَرْضَاهُ.

**A**dapun Sidi Abdul Aziz Az-Zaituni itu kalangan sahabat (murid) besar kepada Saiyidina As-Syazili رَحْمَةُ اللهِ عَلَيْهِ. Satu hari di Padang Arafah berdoalah beliau dan hanya Sidi Az-Zaituni yang dipilih mengaminkan doa itu. Kata beliau kepadanya: “Aminkanlah doaku ini,” apabila selesai berdoa beliau pun berkata: “Demi Allah sesungguhnya telah berdoa badal dan khalifah,” maka beliau ditanya oleh Sidi Abdul Aziz: “Siapakah badal dan khalifah yang tuan katakan tadi?,” jawab beliau: “Akulah khalifah itu dan engkaulah badalnya.” (Sidi Abdul Aziz sedia mengetahui namun dia mahu mendengar dan berlaizat-lazat mendengarnya sekali lagi, kerana perjalanan Saiyidina As-Syeikh As-Syazili itu *khumul* (sembunyi diri) tidak menonjol dan tiada menzahir diri, beliau tidak bercakap perkara sebegini melainkan nadir... Lihatlah, dia wali badal tapi tidak tahu dirinya badal kerana Saiyidina menanggung itu semua darinya... Saiyidina membiarkannya menjaga soal persiapan makan minum dan memasak untuk para muridin dan tamu... Saya mohonlah tuan puan sekalian memahami dan mengambil pencerahan... Muroqobah (telitilah) ahwal syeikh... sungguh padanya ada faedah yang besar).



As-Syeikh As-Soleh Al-Mufti Jamaluddin Al-Qursyi Al-Iraqi menceritakan kepada Sidi Ibnu Sobbagh di Kota Qaherah pada tahun 615H dengan katanya: “Aku telah mendengar As-Syeikh Abul Abbas Al-Mursi berkata -moga Allah mengurnia kita manfaat dari keberkatannya-: “Satu hari kami solat subuh berimamkan Sidi Abul Hasan As-Syazili dan beliau membaca Surah As-Syura. Apabila sampai bacaannya kepada ayat:

يَهْبُ لِمَنْ يَشَاءُ إِنَّا لَهُ وَهَبُ لِمَنْ يَشَاءُ الذُّكُورَ. أَوْ يُزَوِّجُهُمْ ذُكْرَانًا وَإِنَّا  
وَيَجْعَلُ مَنْ يَشَاءُ عَقِيًّا.

*“Bagi Allah jualah hak milik segala yang ada di langit dan di bumi; Allah menciptakan apa yang dikehendakiNya; Allah mengurniakan anak-anak perempuan kepada sesiapa yang dikehendakiNya, Allah mengurniakan anak-anak lelaki kepada sesiapa yang dikehendakiNya. Atau Dia mengurniakan mereka kedua-duanya - anak-anak lelaki dan perempuan, dan Dia juga menjadikan sesiapa yang dikehendakiNya mandul...”* **As-Syura: 49-50**

...maka terdetiklah dalam jiwaku sesuatu mengenai makna ayat ini. Apabila Syeikh memberi salam dari solatnya beliau menoleh kepadaku lantas berkata: “Duhai Abul Abbas, “Allah mengurniakan anak-anak perempuan kepada sesiapa yang dikehendakiNya” bererti ibadat dan mu’amalat, “Allah mengurniakan anak-anak lelaki kepada sesiapa yang dikehendakiNya” bererti ahwal, segala macam ilmu dan maqam, “Atau Dia mengurniakan mereka kedua-duanya - anak-anak lelaki dan perempuan” ertinya Allah menghimpunkan semua itu pada mana-mana hamba yang dikehendakiNya, “dan Dia juga menjadikan sesiapa yang dikehendakiNya mandul” ertinya tanpa ilmu dan tanpa amal....

Kata Sidi Abul Abbas: “Maka takjublah aku dari perkataan beliau itu lalu berkatalah Syeikh: “Demi Allah, tiadalah terlintas sesuatu pada benak seseorang melainkan Allah memperlihatkan aku akan ia baik dalam solat atau selainnya.” (Allah Subhanahu wa Taala adalah yang

Maha Memberi segala-galanya kepada siapa yang dikehendakiNya... Jika Allah telah memberi kepada mereka yang terpilih itu kita pula bagaimanakah akan mengetahui jika mereka tidak membicarakannya -moga Allah meredhoi Saiyidina As-Syazili dan mencapaikan keredhoan buatnya-. Selanjutnya bagi ahli engkar pula bagaimana seenaknya mereka berkata yang ini iya... yang itu tidak... Tuan puan sekalian! Semua itu adalah rahsia dan tetap akan menjadi rahsia. Allah Subhanahu wa Taala sepertimana Dia telah mengurnia segala macam rahsia Dia juga boleh untuk menutupinya dan boleh bagiNya menjadikan segala rahsia itu dimusuhi oleh ahli engkar dan para pembangkang... sudah mengertikah tuan-puan sekalian?).

Sidi Abul Azaim Madhi رَحْمَةُ اللهِ عَلَيْهِ menghikayatkan kepada Sidi Ibnu Sobbagh bahawa: "Saiyidina As-Syeikh As-Syazili ada seorang anak lelaki bernama Ali. Satu hari aku terjumpa anak ini di Kota Iskandariyyah dalam keadaan mabuk minum arak. Aku pun membawanya pulang ke rumah lalu ku palu dengan pukulan yang menyakitkan, dia mendapatkan ibunya lalu bergantung padanya maka aku sentap dia dengan keras sedangkan dia erat memegang ibunya, ini menyebabkan tercabut beberapa helai rambut si ibu di tangannya maka menangislah si ibu. Saiyidina As-Syeikh رَحْمَةُ اللهِ عَلَيْهِ datang lalu bertanya kepada isterinya: "Mengapa kamu menangis?," dia pun mengkhabarkan apa yang berlaku tanpa menyebut tentang arak dan mabuk... (ini adalah hal makar isteri-isteri para masyaikh... sebab inilah dalam Tareqat Syaziliyyah kita wajib bagi para isteri syeikh dan anak-anaknya baik yang lelaki maupun perempuan untuk sama sekali tidak masuk campur urusan tareqat, tidak membesar diri dan tidak mempergunakan muridin... ini adalah undang-undang).

"Maka marahlah Syeikh رَحْمَةُ اللهِ عَلَيْهِ lalu masuk ke zawiyah. Beliau berkata kepadaku: "Hai Madhi, engkau telah melakukan begian-begian" maka kataku kepada beliau: "Ya Tuanku, sesungguhnya hamba mendapati si anak mabuk minum arak. Demi Allah kalau dia bergantung kepada hadrat Tuan sekalipun nescaya hamba palu dia sepertimana hukum syarak." (Lihatlah kepada keagungan tareqat kita ini... seorang murid dan khadam kepada Syeikh bercakap dengan penuh adab semata



## Bekalan Murid Ke Jalan Akhirat

kepada syeikhnya, kepada tuannya, kepada murobbinya, kepada mursyidnya bahawa syariat adalah di atas junjungan kita dan wajib kita mentakzim syariat... kerana inilah Tareqat Syaziliyyah tetap kekal hingga ke Hari Kiamat... Wahai para jamaah! Gembira dan syukurlah kita kepada Allah Taala kerana Dia telah memilih kita tanpa ada daya upaya dari kita dan kerana Dia telah menjadikan kita para khadam kepada junjungan Syaziliyyah).

“Saiyidina As-Syeikh pun diam dan masuk ke zawiyah dalam keadaan bingung (bingung dengan apa yang telah berlaku dan marah kepada anaknya... bingung bagaimana dia dapat mendidik anak-anak orang lain baik lelaki maupun perempuan tapi tak mampu mendidik anak lelaki sendiri... dalam masa yang sama beliau juga bangga dengan muridnya yang mengingatkan beliau kepada hukum hakam Allah dan kehormatan syariat zahir yang suci, murni lagi mulia).

“Saiyidina duduk beberapa lama kemudian memanggilku. Aku masuk mengadapnya lalu mendapati beliau berkeadaan gembira dan senang hati. Kata beliau kepadaku: “Ya Madhi, apabila aku masuk ke tempat ini niatku mahu mendoakan hukuman ke atas anakku, lalu dikatakan kepadaku: “Ya Ali! Apalah gundahmu pada seorang waliku (ya Subhanallah! Di saat itu Allah Taala telah mengangkat kedudukan si anak dan melantiknya serta memasukkannya ke daerah kewalian)... biarkanlah dia menjalankan apa yang telah Ku takdirkan berlaku ke atasnya.”

“Maka tidak berapa lama sesudah kejadian itu anak Saiyidina As-Syeikh رَوَّافُ اللَّهِ yang tersebut (anak kepada junjungan kita adalah junjungan kita juga -moga Allah meredhoi mereka sekalian dan mengurnia kita kemanfaatan mereka-) telah keluar mengembara lalu muncul di benua Maghribi dan zahir kewaliannya.”

Syeikh yang mulia Madhi Abul Azaim juga menceritakan bahawa apabila anak lelakinya Abul Abbas yang dipanggil Syihabuddin sudah cukup umur maka ibunya membawa dia kepada Saiyidina As-Syazili... (lihatlah para jamaah! Saiyidina As-Syeikh As-Syazili رَوَّافُ اللَّهِ sibuk dengan urusan dakwah kepada Allah Subhanahu wa Taala dan sibuk dengan

para muridnya... Beliau tidak memberi perhatian kepada anaknya sendiri seperti perhatian yang diberikannya kepada para *fuqara'*, *muridin*, *sa'irin* dan *salikin*).

“Lalu kata si ibu: “Ya Saiyidi, ini anakmu sudah dewasa sekarang,” maka kata beliau: “Bawalah dia kepadaku supaya dapat aku berpesan kepadanya dan mengajarkan dia apa yang wajib ke atasnya dari segala hak Allah Subhanahu wa Taala.

“Lalu si anak pun dipanggil datang oleh ibunya dan duduk mengadap Saiyidina رَحْمَةُ اللهِ عَلَيْهِ. Beliau melihat kepada si anak beberapa waktu dan merenungnya dengan firasat kemudian berpaling darinya. Kemudian beliau berkata: “Wahai anakku, bangunlah, semoga Allah mengurnia pimpinan padamu,” beliau kemudian mendoakan si anak dengan doa yang banyak lalu beredarlah dia.

“Maka berkatalah si ibu: “Ya Saiyidi, tiada hamba dengar Tuan memberi apa-apa pesan kepadanya, tiada juga Tuan berbicara apa-apa kepadanya...(lihatlah seorang isteri... seorang isteri mahu anaknya mendapat segala-galanya, dia mahu anaknya mesti mendapat dari Syeikh sepertimana yang diberi Syeikh kepada muridin... ini adalah seorang isteri dan ibu, yaitu wanita yang dhaif dan memang inilah sifatnya... akan tetapi Saiyidina As-Syeikh As-Syazili adalah murobbi (pendidik) yang sempurna lagi menyempurnakan, beliau adalah sampai, disampaikan lagi menyampaikan رَضِيَ اللهُ عَنْهُ وَأَرْضَاهُ).

“Maka kata beliau kepada si ibu: “Tikamana si anak duduk mengadapku tadi Allah Taala telah menunjukkan kepadaku segala masa depannya, lalu aku tidak mendapati ada apa-apa dari amalannya yang perlu aku pesani, maka malulah aku kepada Allah untuk berkata-kata kepada si anak.”

Cucu Saiyidina As-Syeikh As-Syazili dari anak perempuannya yang bernama Ruqayyah menceritakan -moga Allah meredhoi mereka sekalian-: “Apabila ibuku dilahirkan maka masuklah ayahku Sidi Ali Ad-Damanhuri untuk mengucapkan tahniah kepada datukku رَحْمَةُ اللهِ عَلَيْهِ, waktu itu ayahku sudah berumur lanjut maka dia pun mengucapkan tahniah kepada



## Bekalan Murid Ke Jalan Akhirat

Syeikh atas kelahiran bayi perempuan beliau itu. Maka kata Syeikh kepadanya: “Anak perempuan ini adalah isterimu,” kata Sidi Ali: “Hamba sudah berumur lanjut begini?!,” maka kata beliau: “Benar, dia akan melahirkan utukmu fulan dan fulan ...” dan Syeikh menyebutkan senarai anak-anaknya kemudian berkata: “Sesungguhnya Allah telah memperlihatkan yang demikian itu kepadaku.” Maka di kemudian hari Sidi Ali Ad-Damanhuri memang menjadi suami ibuku dan telah lahir lah kepadanya anak-anak sepertimana yang dikhabarkan oleh Saiyidina As-Syeikh رحمه الله kepadanya.”

Sidi Ibnu Sobbagh juga meriwayatkan: “Aku telah bertemu dengan puteri Saiyidina As-Syazili yang solehah lagi muliawan Puan ‘Arifah Al-Kheir, dia digelar Al-Wajjah -moga Allah meredhoinya-, ketika pertemuanku dengannya matanya sudah tidak dapat melihat, maka bertanyalah aku tentang namanya dan mengapa dia diberi nama Yasmin. Dia bercerita:

“Waktu aku dilahirkan ayahndaku sedang berada di Kota Qaherah, lalu beliau telah mengutus surat dengan katanya: “Bahawa aku bertawajjuh di dalam khalwah lalu mendapat tahu telah dilahirkan bagiku seorang bayi perempuan, dan aku mengarahkan agar dia diberi nama ‘Arifah Al-Kheir.” Apabila tiba di Iskandariyyah ayahnda berkata kepada bondaku: “Manakah bayi perempuan yang telah kau lahirkan itu?,” bonda pun membawa aku kepada ayahnda lalu beliau pun meletakkan aku di pangkuannya. Ayahnda lalu mengucapkan dalam mulutku: “Marhaban buat puteriku Al-Wajjah (bererti yang diketahui kelahirannya dalam tawajjuh)...

“Adapun puan ini seorang wali Allah Taala dan masyarakat berdatangan kepadanya mengaji Al-Quran dengan tujuh qiraat dan dia mengajar dari balik tabir. Puan ini merupakan seorang wanita muliawan; As-Syeikh As-Soleh Abu Abdullah Muhammad bin Sidi As-Syeikh Al-Wali Ibnu Abdullah bin Sulthan berkata: “Sumber yang ku percayai di Kota Iskandariyyah bercerita kepadaku: “Aku telah menghadiri permakaman puan yang merdeheka lagi mulia ‘Arifah Al-Kheir رَضِيَ اللهُ عَنْهَا , tikamana telah sampai ke kubur maka turunlah beberapa kerabatnya untuk

menyambutnya di liang lahad. [Salah seorang yang turun itu bercerita bahawa] wanita muliawan ini berpaling kepadaku kemudian tersenyum. Aku berkata kepadanya: “Apakah senyuman ini?,” dia berkata: “Kerana aku telah melihat budi Allah Taala kepadaku dan aku tahu bahawa engkau akan mengikutku selepas tiga hari.” Maka si kerabat itu pun telah meninggal dunia -moga Allah merahmatinya- selepas tiga hari.

“Adapun tikamana puan yang mulia ini meninggal dunia ada satu suara dari pihak Allah Taala menyeru di Iskandariyyah: “Marilah hadirilah solat ke atas wanita merdeheka lagi solehah ‘Arifah Al-Kheir yang telah keluar sepanjang umurnya di dunia hanya tiga kali; keluarnya yang pertama dari perut ibunya, yang kedua kepada suaminya dan yang ketiga ke kuburnya.” (Fahamilah dan tuntutlah kefahaman dari isyarat-isyarat ini, dari segala perkhabaran dan ahwal ini... kerana tak lama lagi ianya akan lenyap... atau sudah takkan dipercayai lagi hatta walau bagaimana dibicara... bersiap sedialah tuan-puan sekalian dan jadilah golongan ahli zikir pengingat Allah dengan sebanyak-banyaknya...).



## Bab 30

### BIOGRAFI SAIYIDINA AS-SYEIKH AS-SYAZILI رحمته الله **ANTARA KERAMAT SYEIKH**

**S**aiyidina Abdun Nasir رضي الله عنه وأرضاه berkata: “Zaman sekarang Tasawuf Islami yang Sunni dizalimi dari semua sudutnya; dizalimi oleh ahli-ahli yang bernisbah kepadanya dan dizalimi oleh pihak lain juga.”

Saiyidina رحمته الله mengujar: “Kata mereka tasawuf bukan dari Islam, tasawuf bertolak belakang dengan politik, tasawuf tidak berpijak di bumi nyata, tidak logik, tak dapat difahami, tidak mengajak kepada ilmu pengetahuan, tidak berpartisipasi dengan masyarakat, cenderung mengasing diri, tidak menerima pihak lain, tidak mengajak kepada fleksibiliti dan keterbukaan, tidak mengajak kebersamaan dan macam-macam lagi tuduhan dan kritikan yang dilempar.”

Saiyidina رحمته الله tersenyum lalu berkata: “Sila lihat kepada semua persoalan mereka ini... tanpa sedar pihak yang mempersoal sebenarnya mentakzim tasawuf, tanpa sedar mereka sebenarnya mahu, ingin serta cinta kepada tasawuf dan ahlinya. Tanpa sedar sebenarnya mereka percaya dengan sepenuhnya bahawa problematika mereka dan problematika umat takkan dapat diselesaikan melainkan oleh madrasah-madrasah sufi Islami yang sunni, yang soheh dan yang jelas. Cuma masalah mereka ialah masih belum bertemu ruas dengan para ulama tasawuf yang soheh untuk mempelajari ilmu yang soheh, yang




jelas, yang terang, yang murni, yang suci, yang bercitarasa tinggi, yang indah, yang segar, yang manis dan yang menyeronokkan.”

“Adalah amat malang bahawa hakikat yang berlaku ialah semua atau kebanyakan nama dan ikon tasawuf yang berada di atas pentas sekarang hanya untuk tontonan. Adapun para masyaikh dan murobbi sejati mereka bersama Allah dan tidak mahu selain Allah. Maka wajiblah mencari mereka, wajiblah memeriksa di mana mereka dan wajiblah mengambil dari mereka kerana merekalah tasawuf yang sodiqun... adapun lain dari mereka hanya solihun.

“Sidang jemaah sekalian renungilah kalimat ini: Ada (1) Tingkat Akhlak (untuk semua manusia). Ada (2) Husnul Khulq (akhlak baik untuk golongan mukminin). Ada (3) Makarimul Akhlak (kemuliaan akhlak untuk golongan muhsinin kerana ahli maqam lisan adalah warga Syurga Firdaus yang tertinggi).

“Seluruh umat dan negara dunia mengikat jatidiri dengan etika akhlak dan bukannya dengan agama. Kerana hakikat inilah apabila akhlak mereka punah mereka pun punah. Kerana inilah kita dapati bahawa negara yang mempertahankan etika akhlaknya seperti Jepun kekal sebagai sebuah negara yang kuat walaupun berhadapan dengan ancaman dan tekanan besar. Formula ini dapat digunakan untuk menilai semua negara lain di dunia.

Saiyidina mengujar  lagi: “Dengarkanlah hakikat ini baik-baik; sekolah dan universiti di negara-negara seperti Jepun, Eropah dan Amerika mengajar mereka Islam (tanpa dua kalimah syahadah) dengan tidak mereka sedari, atau boleh jadi mereka sedar bahawa inilah yang benar untuk negara mereka.

“Sebab inilah silibus dan program pelajaran mereka dirangka untuk melahirkan cendekiawan, peribadi kreatif, perekacipta dan pembangun tamadun. Adapun negara-negara orang kita baik di belahan timur atau barat malang sungguh; kalau diteliti program pendidikan dan pelajaran kita nescaya kelihatan berbagai keanehan dan keajaiban padanya; seolah-olah kita semua menuju atau diprogramkan untuk melahirkan



## Bekalan Murid Ke Jalan Akhirat

hanya buruh, orang tak terpelajar, mundur, tolol, berfikiran beku, otak kering, akal sejat, pemalas, suka menganggur dan tidur, tidak berdaya kerja dan memilih yang lebih mudah walaupun tidak berfaedah.

“Apakah ini telah dipelankan untuk kita atau yang dirancang ke atas kita, atau ini sebenarnya hukuman ke atas kita kerana kita jauh dari Tuhan kita, jauh dari agama kita dan jauh dari Rasul kita ﷺ?!”

Apa yang penting sekarang bersama dunia antarabangsa yang bebas dan amat terbuka dari faktor kemunculan negara China sebagai sebuah super power baru yang menyebabkan berubahnya segala timbang tara dan perkiraan maka dapatkah kita untuk berubah kepada yang lebih baik, seterusnya kita memproduksi, bekerja, berfikir, mencipta, dan menyumbang dalam pembinaan tamadun kemanusiaan sepertimana yang telah dilakukan oleh nenek moyang kita kaum Muslimin di zaman awal?!

Seterusnya kita keluar dari kesibukan terhadap diri sendiri dan kesibukan dengan pihak yang tak sebulu dengan kita... kita keluar kepada dunia antarabangsa, kepada produktiviti dan pencapaian. Seterusnya kita berbangga bahawa di tangan kita memegang tasbih dan dengannya kita melakukan zikir yang berbilang-bilang dan di masa yang sama kita bersaing dalam dunia antarabangsa.”

Kerana inilah Saiyidina ربيع الدين berkata bahawa wajib bagi kita untuk menjadi role model kepada orang lain dalam kesungguhan berzikir, dalam pemikiran, ilmu, amal, adab, produktiviti, pencapaian, pengorbanan, mengutamakan orang lain, kejujuran, amanah, komitmen, kekuatan, kesatriaan, taqwa, kelembutan hati dan mudah menangis. Semua sifat ini merupakan kriteria para murid penuju Allah yang sejati baik lelaki maupun perempuan di zaman sekarang.

Jadi apabila bercakap tentang akhlak, tentang *husnul khulq* dan makarimul akhlak bererti ini satu topik yang tiada hujungnya, tiada hentinya dan Insya Allah kita akan sentiasa kembali membicarakannya dalam siri artikel (Bekalan Murid Ke Jalan Akhirat), yaitu bekalan yang diperlukan oleh seorang murid penuju Allah, dan saa’ir (pengembara)

kepada Allah serta salik yang menempuh jalan Akhirat.

Atas faktor inilah Saiyidina رَحْمَةُ اللهِ عَلَيْه sentiasa menekankan tentang makarimul akhlak kerana Saiyidina wa Maulana Muhammad ﷺ telah memberi penekanan, tumpuan dan penjelasan mengenainya. Sabda Baginda ﷺ:

إِنَّمَا بُعِثْتُ لِأَتَمِّمَ مَكَارِمَ الْأَخْلَاقِ.

*“Demi sesungguhnya aku diutuskan untuk menyempurnakan makarimul akhlak.”*

Saiyidina رَحْمَةُ اللهِ عَلَيْه berkata: “Memperolehi makarimul akhlak, atau ilmu makarimul akhlak dan mempraktik makarimul akhlak di zaman ini menuntut kamu untuk membangun, memiliki dan melakukan tiga rukun, atau sebut saja tiga ilmu:

**Ilmu Akal** – ertinya membuka akal untuk menuntut ilmu, untuk berfikir, untuk mengkaji berbagai pengetahuan, atau sebut saja bahagian ini sebagai ilmu syariat.

**Ilmu Hati** – ertinya membuka hati untuk beramal, untuk muroqobah, untuk zikir, mujadah, riyadhah (latihan jiwa), untuk mengalami berbagai eksperimen, berbagai kefahaman dan berbagai perasaan, atau sebut saja bahagian ini sebagai ilmu tareqat sufi yang sunni... tidak kiralah walau berubah nama sekalipun.

**Ilmu Fleksibeliti** – atau sebut saja sebagai ilmu *tazkiyatun nafs* (memurnikan jiwa), atau ilmu *taharrur ar-ruuh* (memerdekakan roh), yaitu ilmu adab kesopanan yang zahir dan batin. Ertinya jiwa menerima berbagai waridat, ilham, tajalli, nur, sirr, ilmu, makrifat, atau sebut saja bahagian ini sebagai ilmu hakikat.

Kesemua ini adalah ilmu Tasawuf Islami yang Sunni (ilmu ini adalah ilmu *zauq* (rasa) yang berbagai-bagai, ia merupakan ilmu perbuatan dan praktis; jika kamu sudah merasainya maka kamu beroleh makrifatnya. Adapun jika kamu hanya bercakap dan cuma terus bercakap kamu sekali-kali takkan sampai kepada makrifat



## Bekalan Murid Ke Jalan Akhirat

dan zauqnya, kamu takkan dapat menghayatinya dan takkan hidup bersamanya). Inilah dia perjalanan para junjungan sahabat, tabi'in dan tabi'ut tabi'in, para masyaikh yang kamil, kaum sufi yang muhaqqiqin dan para ulama yang 'amilin -moga Allah meredhoi mereka sekalian dan semoga Allah menjadikan kita semua beroleh manfaat mereka ya Robbal Alamin-. Ini semua takkan datang dari kosong, sebaliknya datang dengan kejujuran dalam menuntut, dengan mengetuk pintu Allah Taala setiap waktu hinggalah akhirnya Dia membenarkanmu untuk masuk dan beroleh qabul, redho dan taufik.

Demi Allah cuba kau jelaskan padaku bagaimana seorang insan dapat membicarakan suatu ilmu yang dia tidak mengetahuinya, tidak mempelajarinya, tidak mencubanya dan tidak mengamalkannya. Contohnya orang yang [hanya] belajar ilmu syariah bagaimana bolehnya dia berbicara menerima atau mengingkari ilmu tareqat dan begitulah seterusnya dapat kau katakan pada ilmu hakikat. Tuan-puan sekalian, semua jenis ilmu ini wajib diambil dari para ahlinya, dari para pakarnya. Sudah mengertikah???

Begitulah semua kita tidak kira dari pihak mana punya semangat meluap-luap terhadap agama Islam yang agung dan gemilang ini, namun kita terhenti pada nama, terhenti pada rupa bentuk, pada ikon dan upacara sedangkan ini semua hanyalah kulit luaran. Di sinilah sentiasa berlakunya perselisihan, permusuhan, perang, pertembungan, tuduhan kafir mengkafir, kekerasan, sikap pembekuan dan ekstrimis.

Tak mahukah kita untuk waras berfikir, faham, beradab dan menyelami hingga ke dasar supaya dapat bersatu dan tidak berpecah, supaya saling faham memahami dan tidak bercanggah, supaya saling berkasih sayang dan tidak benci membenci. Inilah yang difirmankan oleh Allah Subhanahu wa Taala dalam kitabNya yang mulia:

إِنَّمَا الْمُؤْمِنُونَ إِخْوَةٌ.

*"Sesungguhnya mereka yang beriman itu bersaudara"* **Al-Hujurat: 10**

Harus difahami yang pertama bahawa ilmu tasawuf sentiasa mendatangkan yang baru dan berfaedah untuk umat. Atas dasar inilah dikatakan: Sufi itu anak waktunya.

Yang kedua ilmu tasawuf menyeru kepada Allah Taala dan wajiblah bagi penyeru tasawuf untuk sama sekali tidak menyeru kepada dirinya, tidak kepada parti, tidak kepada gerakan, tidak kepada pemikiran, tidak kepada mazhab dan tidak kepada kerajaan. Dengan ini tasawuf tidak perlu kepada kurikulum bersepadu yang beku dan tidak bergerak-gerak, bahkan sifat tasawuf itu adalah gerak, pembaharuan dan perubahan yang memberi manfaat kepada semua umat dan semua bangsa.

Yang ketiga ilmu tasawuf menyeru kepada ilmu, amal dan adab. Kerana inilah dahulu para murid di zawiyah-zawiyah merupakan kelompok penuntut ilmu dan ulama yang paling mantap di bidang ilmu manqul (wahyu) dan ma'qul (pemikiran), di bidang pengriwayatan dan dirayah (pemahaman) khususnya feqah hingga terkenal mereka dengan gelar Al-Faqih Al-Faqir (ahli feqah nan sufi), ini adalah hakikat yang diketahui secara meluas oleh mereka yang mendamping para ulama dan penutur ilmu.

Para jemaah sekalian fahamilah perkara ini dengan baik; bahawa seorang pendakwah itu tidak berhak menyeru masyarakat kepada kepada bidang pengkhususan dan cabang dalam mana-mana ilmu. Had para pendakwah ialah menyeru secara umum atau secara nota ringkasan sahaja.

Ramai juru dakwah dan bilangan mereka terus bertambah. Banyak kebaikan dari mereka dan keburukan mereka juga banyak. Ada berbagai jenis pendakwah, mereka datang dengan berbagai rupa dan zauq (citarasa)... apa pun wajiblah bagi mereka untuk tidak melampaui batas hingga mendakwa diri sebagai syeikh, mufti dan ulama. Demi Allah ini haram jika mereka lakukan kerana hasilnya mereka akan sesat dan menyesatkan umat.

Adapun ulama pula mereka terdiri dari berbagai darjat dan



## Bekalan Murid Ke Jalan Akhirat

tingkatan. Ada ulama mujtahid mutlaq dan ini jarang sekali wujudnya. Ada ulama mujtahid muqayyad dan golongan ini wujud cuma mereka sedikit. Para ulama itu secara umumnya berhak menyampaikan ilmu yang khusus, yang mendalam dan yang cabang dengan syarat amanah, jujur, jauh dari hawa dan kepentingan, jauh dari sikap bias kepada satu bangsa dan menganaktirikan bangsa lain, atau bias kepada satu negara dan mengenepikan negara lain... malangnya inilah yang berlaku hari ini

إِنَّا لِلّٰهِ وَإِنَّا إِلَيْهِ رَاجِعُونَ.

Si alim atau ulama ini pula wajiblah terlebih dahulu menetapkan apa mazhabnya dan kemudian tidak pula mengenepikan mazhab-mazhab lain. Sebagai contoh seorang alim wajib menyampaikan semua pendapat yang sepadan dan bertentangan beserta dalil-dalilnya dalam mazhabnya, tapi tidak boleh berijtihad kerana dia tidak layak berijtihad. Ini supaya si alim tidak menyempitkan ruang dan tidak menyusahkan masyarakat dalam amal ibadah dan muamalat seterusnya tidak memberatkan mereka dengan apa yang tidak mampu mereka kerjakan. Firman Allah Taala:

وَمَا جَعَلَ عَلَيْكُمْ فِي الدِّينِ مِنْ حَرَجٍ.

*"...dan tidakla Allah menjadikan kamu menanggung sesuatu keberatan dan susah payah dalam perkara ugama."* **Al-Hajj: 78**

لَا يَكْلِفُ اللَّهُ نَفْسًا إِلَّا وُسْعَهَا.

*"Allah tidak memberatkan seseorang itu melainkan apa yang mampu dikerjakannya"* **Al-Baqarah: 286**

Yang demikian itu kerana Islam merupakan agama rahmat, maka wajiblah ia diterima dan dapat diterima oleh semua pihak dan bangsa.

الْيَوْمَ أَكْمَلْتُ لَكُمْ دِينَكُمْ وَأَتِمَمْتُ عَلَيْكُمْ نِعْمَتِي وَرَضِيتُ لَكُمُ الْإِسْلَامَ دِينًا.

*“...pada hari ini Aku telah sempurnakan bagi kamu agama kamu, dan Aku telah cukupkan nikmatKu kepada kamu, dan Aku telah redhakan Islam itu menjadi agama untuk kamu”* **Al-Ma'idah: 3**

Ada perbezaan besar antara menerima dengan mengikut. Manusia perlu menerima adapun soal mengikut ia tergantung hidayah dari Allah Taala. Adapun *ibtida'* (mengada-adakan) maka itu kerugian dan penyesalan jua.

Dan lagi kerana agama Islam kita adalah agama terakhir yang memansuhkan semua agama dan kepercayaan terdahulu, Islam merupakan agama yang kekal hingga ke Hari Kiamat. Maka Islam lah agama yang baik untuk tiap zaman dan tempat, dari sinilah wajibnya semua orang untuk mencintainya, menghormatinya, menjadi pemeluknya dan bernisbah kepadanya

*وَمَنْ يَبْتَغِ غَيْرَ الْإِسْلَامِ دِينًا فَلَنْ يُقْبَلَ مِنْهُ وَهُوَ فِي الْآخِرَةِ مِنَ الْخَاسِرِينَ.*

*“Dan barang siapa yang mencari agama selain Islam, maka tidak akan diterima daripadanya, dan dia pada hari Akhirat kelak dari orang-orang yang rugi”* **Aali Imran: 85**

Lihatlah betapa Maha Agung Tuhan kita yang Maha Pencipta dalam firmanNya “...dari orang-orang yang rugi” Allah tidak sebut “dari orang-orang kafir,” kerana inilah mereka berpeluang untuk masuk ke dalam agama Islam supaya dapat serta dengan golongan yang berjaya.

Dan marilah kita teruskan dengan perkhabaran Saiyidina As-Syeikh Abul Hasan As-Syazili رحمته الله عليه.

Di Tunis antara yang mendamping kepada Saiyidina As-Syeikh رحمته الله عليه Sidi Abu Ali Salim At-Tabasi yang berkediaman di Hayy Al-Misriyyin (dan beliau itu seorang murid yang sejati kepada syeikhnya lagi khadam yang sangat amanah terhadap segala sirr gurunya -moga Allah meredhoi si murid dan syeikh dan kita semua-... Allahumma amin).



## Bekalan Murid Ke Jalan Akhirat

Sidi Madhi berkata: “Adapun Sidi Salim itu mempunyai anak bernama Ali. Pada satu hari berlaku pergaduhan di Al-Misriyyin antara warga pekan dengan kumpulan orang Barbar penghuni khemah kembara yang singgah tinggal di situ. Lalu datanglah Abul Hasan Ali anak Sidi Salim dengan tongkat ditangannya untuk menghalang mereka dari berlaga.

“Dengan tidak sengaja tongkat itu terpukul sebelah mata seorang Barbar lalu tercabutlah biji matanya. Orang-orang Barbar pun mengeroyok Ali dan mahu membunuhnya, maka datanglah bapanya Syeikh Sidi Salim berkata kepada puak Barbar: “Esok pagi Insya Allah Taala akan datang Saiyidina As-Syeikh As-Syazili memberi keputusan hukum antara kamu dengan anakku.” Maka pada pagi keesokan harinya yang dijadikan Allah sebaik-baik pagi sampailah Saiyidina As-Syeikh رَحْمَةُ اللهِ عَلَيْهِ kepada mereka. Orang pun membentang tikar hamparan baru (ini adalah takzim) untuk beliau duduk di depan pintu kamar.

Maka keluarlah As-Syeikh Abun Najat Salim At-Tabasi menyalami Saiyidina As-Syeikh رَحْمَةُ اللهِ عَلَيْهِ. Saiyidina pun mengujar kepadanya: “Sesungguhnya kedatanganku ini kerana Ali anakmu.”

Semua pun berhimpun kepada Saiyidina رَحْمَةُ اللهِ عَلَيْهِ, maka kata beliau: “Pilihlah kamu sekalian; samada mahu mengambil saudaraku Salim sebagai ganti mata wargamu atau mengambil bayaran gantirugi lima ratus dinar,” (waktu itu 500 dinar adalah jumlah yang amat besar... sebab inilah mereka terus memilih wang itu) maka kata puak Barbar: “Kami memilih lima ratus dinar dan tidak akan meninggalkan tempat ini melainkan setelah menerima bayaran tunai.” Maka kata Saiyidina As-Syeikh رَحْمَةُ اللهِ عَلَيْهِ kepada mereka: “Seolah-olah kamu semua meremehkan kaum fuqara’ (Syeikh dan para muridnya) dari mempunyai harta,” Saiyidina pun memasukkan tangannya ke bawah hamparan yang telah dibentang untuk beliau, semua memandang kepadanya lalu beliau mengeluarkan wang dari bawah tikar itu sambil dikira oleh puak Barbar hingga genap jumlahnya 500 dinar. Kemudian mereka beredar lalu Saiyidina berpaling kepada Sidi Salim seraya berkata: “Wahai saudaraku, mereka menjualmu dengan kepingan syiling yang sedikit,



kalaulah mereka mengambilmu nescaya yang mereka ambil adalah kekayaan dunia Akhirat. Demi Allah tidaklah sampai hujung bulan ini melainkan lenyap kesemua wang itu dan mereka akan kembali dengan berhajat kepada kaum fuqara' (muridin)."

Kata Sidi Madhi: "Selepas beberapa hari puak Barbar pun meninggalkan Hayy Al-Misriyyin, di tengah jalan mereka dicegat penyamun dan semua milik mereka dirompak, mereka kembali kepada kami dalam kepayahan dan meminta belas kasihan kepada zawiyah Sidi Abun Najat Salim At-Tabasi apa-apa yang dapat meringankan beban mereka. Sidi Salim adalah warga tempatan di sini dan ramailah yang menempelak orang-orang Barbar seraya berkata: "Benarlah perkataan Saiyidina As-Syeikh رَحْمَةُ اللهِ عَلَيْهِ, sesungguhnya inilah yang telah beliau khabarkan kepada kami."

Apabila Sidi Salim At-Tabasi meninggal dunia di Al-Ma'sriyyah kami pun mengiring Saiyidina As-Syeikh As-Syazili untuk mengebumikan jenazah. Sudah masuk ke rumah Sidi Salim maka Saiyidina pun mengucapkan Assalamualaikum warahmatullahi wabarokatuh, lalu kedengaran suara Sidi Salim dari balik tirai (tirai tempat mengurus jenazahnya) menjawab: Waalaikumus salam warahmatullahi wabarokatuh. Seorang budak lelaki cucu Sidi Salim yang berada di dalam rumah telah keluar dan memberi tahu: "Datukku demi Allah masih hidup dan belum mati, dia menjawab salam Saiyidina As-Syeikh!"

Maka Saiyidina As-Syeikh pun memandikan saudaranya itu dan mengafankan dia. Sudah selesai maka tuan syeikh pun mencium antara dua matanya seraya berkata: "Wahai saudaraku (kerana umurnya yang tua), demi Allah janganlah engkau lupa janji setia antara kita berdua." Kata Sidi Madhi semua yang hadir berkata: "Demi Allah kami melihat Sidi Salim membuka dua matanya dan berkata: "Benar saudaraku," apabila sudah kami solat keatasnya kemudian mengebumikannya kami pun bertanya kepada Saiyidina: "Ya saiyidina, apakah janji setia antara tuan dan beliau itu?," maka jawab Saiyidina: "Kami pernah berjanji setia barangsiapa antara kami berdua yang meninggal terlebih dahulu maka dia akan menjadi wasilah temannya di sisi Allah Azza wa



## Bekalan Murid Ke Jalan Akhirat

Jalla.” Adapun Sidi Salim dikebumikan di Al-Misriyyan -semoga Allah meredhoi mereka sekalian dan mengurnia kita kemanfaatan mereka... Allahumma amin-.” (Lihat para muridin ajaib, mereka tidak mengengkari bahkan bertanya... mereka suka untuk mempelajari segala perkara... akan tetapi jalan tareqat adalah rahsia yang berbagai... maknanya tareqat merupakan ilmu, amal dan adab. Tareqat bukan kalam, bukan bicara dan bukan falsafah).

Sidi Ibnu Atho’illah As-Sikandari رَحْمَةُ اللهِ عَلَيْهِ menyebutkan dalam kitabnya Latho’iful Minan: “Guruku Sidi As-Syeikh Abul Abbas Al-Mursi رَحْمَةُ اللهِ عَلَيْهِ berkata: “Pernah aku bersama Saiyidina As-Syeikh As-Syazili رَحْمَةُ اللهِ عَلَيْهِ di kota Qairawan (sekarang di Tunisia) waktu bulan Ramadhan malam 27. Maka berangkatlah Saiyidina ke Masjid Jami’ dan aku pergi bersama beliau. Apabila masuk dan beliau mengangkat takbiratul ihram aku lihat para awliya berkerumun kepada Saiyidina ibarat lalat-lalat mengerumun madu. Abila bila sudah waktu subuh kami pun keluar dari Masjid Jami’. Saiyidina As-Syeikh رَحْمَةُ اللهِ عَلَيْهِ mengujar: “Tiadalah malam tadi melainkan satu malam yang agung, ialah malam Lailatul Qadr.”

Sidi As-Syeikh Abul Abbas Al-Mursi رَحْمَةُ اللهِ عَلَيْهِ berkata: “Satu malam waktu tidur di kota Islandariyyah aku terdengar suara berkata kepadaku: “Marilah pergi Makkah dan Madinah!” Apabila bangun subuh aku pun berazam untuk musafir. Waktu itu Saiyidina As-Syeikh رَحْمَةُ اللهِ عَلَيْهِ berada di Al-Maqsam di kota Kaherah, aku pun pergi musafir kepada beliau lalu apabila mengadapnya beliau terus mengujar padaku: “Marilah ke Makkah dan Madinah,” maka jawabku: “Kerana yang demikianlah hamba datang wahai Saiyidina.” Beliau berkata: “duduklah!” lalu duduklah aku dan tiba-tiba seorang lelaki masuk mengadap beliau, kata si lelaki: “Ya Saiyidi, hamba berazam mahu pergi haji tapi tidak punya apa-apa perbekalan dunia.” Saiyidina As-Syeikh berkata kepadaku (Sidi Al-Mursi): “Apa yang ada bersamamu?,” jawabku: “Sepuluh dinar,” maka kata beliau: “Berilah wang itu kepada lelaki ini,” maka aku pun memberi kepadanya.

Saiyidina As-Syeikh berkata lagi kepadaku: “Kalau sudah besok hari pergilah engkau keluar ke As-Sahil dan belikan untuk kami 20 irdib

gandum (bersamaan lebih kurang 1560 kg).” Apabila esok paginya aku pun turun ke As-Sahil lalu membeli 20 irdib gandum, setelah membawanya pulang ke setor aku pun pergi mengadap Saiyidina As-Syeikh.

Maka kata beliau kepadaku: “Gandum ini kata orang berulat, jadi kami takkan mengambilnya,” aku pun bingung tak ketahuan apa yang harus dilakukan. (Lihatlah bagaimana Syeikh melakukan kepada muridnya... beliau membingungkannya untuk mendidiknya... tapi lihatlah buahnya si murid menjadi khalifah beliau... si murid tidak berubah dan tidak berganjak sedikit pun terhadap Syeikhnya رَحْمَةُ اللهِ عَلَيْهِ ... ini sebahagian dari ilmu-ilmu dalam tareqat).

Kata Sidi Al-Mursi: “Maka duduklah aku tiga hari sedangkan tuan punya gandum masih tidak menuntut bayaran kepadaku, pada hari keempat tiba-tiba seorang lelaki datang kepadaku dan apabila melihatku dia berkata: “Engkaukah yang punya gandum itu?,” jawabku: “Benar,” maka kata lelaki itu: “Mahukah engkau menerima dariku untung seribu dirham dan aku mengambil gandum itu?,” jawabku: “Baiklah,” lalu si lelaki pun memberi aku seribu dirham. Allah Taala telah memberi berkat kepada wang itu, kalau aku berkata bahawa sampai hari ini aku masih berbelanja darinya nescaya aku jujur.” (Lihatlah, beliau beroleh seribu dirham tanpa daya dan upaya darinya namun selepas diperah habis-habisan oleh gurunya).

Sidi As-Syeikh Abul Abbas Al-Mursi رَحْمَةُ اللهِ عَلَيْهِ berkata: “Ketika aku sampai di Tunis dari Mursiyyah (Andalusia yang hilang) waktu itu aku masih muda remaja, maka aku telah mendengar tentang guruku As-Syeikh Abul Hasan As-Syazili رَحْمَةُ اللهِ عَلَيْهِ. Seorang lelaki berkata kepadaku: “Marilah ikut kami bertemu dengannya,” jawabku: “Nantilah, biar aku istikharah kepada Allah Taala.” Pada malam itu tidurlah aku maka aku bermimpi melihat seolah-olah aku naik ke puncak gunung. Bila sudah di atas aku mendapati seorang lelaki memakai burnus hijau (jubah fesyen Maghribi) sedang duduk, di kanannya ada seorang lelaki dan di kirinya ada seorang lagi lelaki. Apabila aku memandang kepadanya beliau mengujar padaku: “Engkau telah menjumpai khalifah zaman ini.”



“Aku pun tersedar dari tidur, lalu selepas solat subuh lelaki yang mengajakku semalam mendatangkiku lagi mempelawaku berziarah kepada Syeikh. Aku pun mengikutnya dan apabila kami masuk kepada Saiyidina As-Syeikh aku mendapatinya seperti sifat yang ku lihat dalam mimpi di atas gunung. Aku merasa dahsyat dan beliau pun berkata kepadaku: “Engkau telah menjumpai khalifah zaman ini. Siapa namamu?,” maka aku pun menyebutkan nama dan nasabku. Lalu kata beliau: “Engkau telah diangkat kepadaku sejak sepuluh tahun yang lampau.” (Wahai si murid penuju Allah, lihatlah bahawa semuanya dengan ketentuan Allah, semuanya dengan kudrat Allah, semuanya dengan taufik dari Allah Tabaroka wa Taala... lalu mengapa harus ada hasad dengki, kemarahan, kebencian dan makar antara sesama muridin... saya mohon tuan-puanku sekalian untuk memahami, bersabar dan baikanlah sangkaanmu kepada Tuhan).

Kata Saiyidina As-Syeikh Abul Hasan As-Syazili رَحْمَةُ اللهِ عَلَيْهِ: “Dalam satu pengembaraanku (di tahap permulaan) aku telah menginap di sebuah gua dekat dengan bandar orang Islam. Selama tiga hari aku tidak merasa apa-apa makanan. Selepas tiga hari itu masuklah kepadaku sekumpulan orang Rom yang melabuhkan kapal mereka di situ. Apabila melihatku mereka berkata: “Ini seorang pendeta Muslimin,” lalu mereka pun meletak di sisiku makanan dan minuman, maka takjublah aku bagaimana aku mendapat rezeki dari tangan orang kafir dan terhalang rezekiku dari pihak Muslimin. Lalu ada suara berkata kepadaku: “Wahai Ali! Tidaklah seorang lelaki sempurna (yang sempurna kewaliannya) itu orang yang ditolong dengan para kekasihnya, sesungguhnya lelaki sempurna itu orang yang ditolong dengan musuhnya.” (Renunglah pada kata-kata yang ajaib ini).

Saiyidina رَحْمَةُ اللهِ عَلَيْهِ berkata lagi: “Bersama seorang teman kami telah menginap di sebuah gua kerana menuntut wushul kepada Allah. Masing-masing diri berkata esok kami beroleh futuh, selepas besok kami beroleh futuh... Maka masuklah seorang lelaki yang hebat, aku pun berkata padanya: “Siapakah engkau?,” jawab lelaki itu: “Abdul Malik,” lalu tahulah kami dia itu seorang awliya’ Allah. Kami pun mengujar padanya: “Apa khabarmu?” maka dia menjawab: “Apalah

khabar diri yang berkata esok kami beroleh futuh, selepas besok kami beroleh futuh... maka tiadalah baginya kewalian dan tiada baginya kejayaan. Wahai diri! Janganlah engkau ibadatkan Allah melainkan kerana Allah.” Maka tersingkaplah bagi kami dari mana tersusupnya kami, kami pun taubat dan istighfar lalu dapatlah futuh pada kami.”

Inilah inti dari segala kesimpulannya wahai tuan-puanku sekalian... wajiblah yang kita tuntutan itu tuntutan yang tinggi, bukan yang rendah... yang kita ingini, yang kita tujui, yang kita tuntutan hanyalah Allah Subhanahu wa Taala... Allah yang Maha Tunggal, Maha Esa Dia tiada sekutu bagiNya.



## Bab 31

### BIOGRAFI SAIYIDINA AS-SYEIKH AS-SYAZILI رحمته الله **MAKRIFAT SEJATI**

وَاللَّهُ يَدْعُو إِلَى دَارِ السَّلَامِ وَيَهْدِي مَنْ يَشَاءُ إِلَى صِرَاطٍ مُسْتَقِيمٍ.

*“Dan Allah menyeru manusia ke tempat kediaman yang selamat sentosa, dan Dia sentiasa memberi petunjuk hidayahNya kepada sesiapa yang dikehendakiNya (menurut undang-undang peraturanNya) ke jalan yang betul lurus”* **Saiyidina Yunus: 25**

Sambungan dari siri yang lepas kami berikan satu contoh di sini akhlak baik yang dikongsi milik oleh semua, hanya sanya ada kelompok yang mempertahankannya dan ada yang mengabaikannya. Kedua-dua kelompok ini masing-masing akan menerima balasan Allah *Tabaroka wa Taala*.

Teman saya yang merupakan doktor perubatan di negerinya bercerita kepada saya: “Satu hari aku musafir dari negeriku menuju Amerika. Kami singgah di Holland (kota Amsterdam) beberapa hari sebelum meneruskan perjalanan. Dalam persinggahan itu aku jatuh sakit yang amat hingga terpaksa mendapatkan rawatan seorang doktor pakar di kliniknya. Beliau pun melakukan pemeriksaan dan apa yang semestinya, aku amat menghargainya. Di akhir sesi rawatan secara tak sengaja beliau mengetahui yang diriku juga seorang doktor, maka kata

beliau: “Seorang doktor takkan mengambil upah rawatan dari pesakit yang doktor juga sepertinya, saudara cuma perlu membeli ubat,” dengan penuh kemuliaan dan etika kerja doktor Holland itu mengujar: “Kami tidak mengambil apa-apa balasan dari teman sekerja kami sebagai menghormati bidang kerja kita yang sama.”

Duhai alangkah sejahteranya akhlak umum sebegini. Apabila mereka (orang barat) mempraktikkannya Allah kurniakan kepada mereka kebajikan, rezeki, keamanan dan kestabilan. Tuan-puan sekalian bagaimana pula sekiranya kita yang mempraktik akhlak, dan bagaimana pula jika kita mempraktik *husnul akhlak* dan demi Allah tuan-puan sekalian bagaimana pula jika kita mempraktik *makarimul akhlak*. Allah ﷻ bayangkan saja apa yang nak diberinya kepada kita. Jadi apakah kita mahu mengerti dan mengambil pelajaran.

Kita teruskan dengan perkhabaran dan ahwal Saiyidina As-Syeikh Abul Hasan As-Syazili رَحْمَةُ اللهِ عَلَيْهِ.

Sidi As-Syeikh Al-Munawi رَحْمَةُ اللهِ عَلَيْهِ menyebut dalam kitabnya Al-Kawakib Ad-Durriyyah bahawa tikamana Saiyidina As-Syeikh As-Syazili رَحْمَةُ اللهِ عَلَيْهِ tiba di kota Iskandariyyah bahawa Sidi As-Syeikh Abul Fath Al-Wasithi رَحْمَةُ اللهِ عَلَيْهِ adalah warga di situ.

“Maka berhentilah Saiyidina As-Syeikh As-Syazili رَحْمَةُ اللهِ عَلَيْهِ di luar kota dan meminta izin kepada syeikh di dalam. lalu berkatalah Sidi Abul Fath: “Satu kopiah tidak muat untuk dua kepala” dan meninggal dunialah Sidi As-Syeikh Abul Fath pada malam itu رَحْمَةُ اللهِ عَلَيْهِ.

“Yang demikian itu kerana jika ada dua syeikh kamil; yang seorang seorang warga di sebuah negeri dan seorang lagi mendatangi negeri itu, jika salah seorang lebih tinggi kedudukan maka yang tinggi ini akan merampas dari yang rendah dan menyebabkan kematiannya, maka kerana ini digalakkan bagi syeikh yang datang meminta izin kepada syeikh warga negeri. (Jangan berhenti di sini. Teruskan mengikuti pengajian dan ambil saja perkhabaran ini seadanya tanpa perlu memikirkannya kerana ia berada di luar batas kemampuan dan kefahaman kita).



Sidi Abdul Wahhab As-Sya'rani pula menyebut dalam kitabnya *Qawa'id As-Sufiyyah As-Sughro*: "Bahawa Saiyidina Abul Hasan As-Syazili رحمته الله عليه apabila sudah tiba dari Maghribi maka ada pihak tertentu menulis berkajang-kajang surat mencercanya kepada sultan, lalu keluarlah beliau dari kota Iskandariyyah pergi bertemu sultan hingga sultan pun iktiqad kepada beliau." (Kisahnyalah saya ceritakan pada siri yang lalu).

Pihak tersebut tidak berpuas hati lalu menghantar lagi surat kepada sultan Mesir mengatakan syeikh adalah ahli kimia (ahli sihir) maka hilanglah keyakinan sultan sekali lagi. Berbetulan pada waktu itu *khazindar* (penjaga khazanah) sultan telah melakukan satu perbuatan yang mewajibkannya dihukum bunuh maka takutlah dia dari murka raja lalu lari kepada Saiyidina As-Syeikh di Iskandariyyah. Beliau pun melindungi *khazindar* dari diapa-apakan oleh sultan maka marahlah baginda lalu mengutus surat menegur Syeikh dengan keras dan berkata bahawa Syeikh mahu merosakkan hamba raja.

Maka berkatalah Saiyidina As-Syeikh: "Kami dari golongan yang membaiki, kami bukan dari yang merosakkan," kemudian beliau mengeluarkan pesuruh raja dari *khalwah* lalu berkata kepadanya: "Kencinglah di atas batu ini," maka kencinglah hamba raja ke atasnya lalu batu itu bertukar menjadi emas yang beratnya lebih kurang 50 *qinthar*. Kemudian berkatalah Saiyidina As-Syeikh: "bawalah ia kepada sultan supaya baginda boleh menyimpannya di baitul mal." Apabila sampai kepada sultan maka baginda pun kembali rujuk dari iqtikadnya yang rosak terhadap Syeikh kemudian berangkatlah baginda menziarahi beliau. Lalu *khazindar* pun meminta kepada Saiyidina agar menyuruhnya sekali lagi untuk kencing di atas mana-mana batu... (lihat! Si *khazindar* ini jadi seronok dengan pekerjaan itu lalu minta untuk melakukannya sekali lagi... lihat pula keagungan syeikh murobbi yang berkata kepadanya bahawa asal pekerjaan ini bukan dariku dan bukan darimu, bahkan semata-mata dari Allah ﷻ. Sudah mengertikah engkau wahai si murid penuju Allah akan hakikat 'ubudiyyah dan tauhid?).

Maka Saiyidina رحمته الله عليه pun menjawab si *khazindar*: "Asal pekerjaan



ini adalah dari Allah Taala.” Maka tetaplah sultan percaya dan iqtikad kepada Syeikh, baginda menawarkan timbunan harta dan gaji namun beliau menolaknya dan berkata: “Orang yang khadamnya kencing di atas batu lalu batu bertukar menjadi emas dengan izin Allah Taala... dia tidak perlu kepada mana-mana makhluk.”

Adapun Sidi As-Syeikh Sodruddin Al-Qawnawi رَحْمَةُ اللهِ عَلَيْهِ merupakan murid dan khadam kepada Saiyidina As-Syeikh Al-Akbar Muhyiddin Ibnul ‘Arabi رَحْمَةُ اللهِ عَلَيْهِ. Maka pergilah Sidi Sodruddin ke negeri Mesir lalu bertemu dengan Saiyidina As-Syeikh Abul Hasan As-Syazili. Di hadrat beliau Sidi Sodruddin berbicara panjang lebar tentang berbagai ilmu dan Saiyidina pula menundukkan kepala hingga selesailah si pengunjung dari bicaranya. Saiyidina As-Syeikh pun mengangkat kepala lalu berkata: “Khabarkan kepadaku di mana *quthbuz zaman* hari ini, siapakah temannya dan apakah ilmu-ilmunya?,” maka terdiamlah Sidi Sodruddin tidak mampu menjawab.

Berkata Sidi Ibnu Atho’illah As-Sikandari dalam kitab Latho’iful Minan: “Ramai tokoh-tokoh sufi yang telah menerima didikan langsung dari Saiyidina As-Syeikh As-Syazili رَحْمَةُ اللهِ عَلَيْهِ, sebahagian mereka tetap tinggal di Maghribi seperti Sidi Abil Hasan As-Shiqilli رَحْمَةُ اللهِ عَلَيْهِ yang merupakan seorang wali besar. Ada juga yang mengikut Saiyidina hijrah ke Mesir, antara mereka adalah ikutan kami kepada Allah Taala Abul ‘Abbas Syihabuddin Ahmad bin Umar Al-Ansori Al-Mursi رَحْمَةُ اللهِ عَلَيْهِ, Sidi Al-Hajj Muhammad Al-Qurthubi, Sidi Abul Hasan Al-Bija’iy, Sidi Al-Wajhani, Sidi Al-Jazzar. Ada juga yang memulakan perguruan dengan Saiyidina di negeri Mesir seperti Sidi As-Syeikh Abdullah bin Mansur yang terkenal dengan gelar Makinuddin Al-Asmar, Sidi As-Syeikh Abdul Hakim, Sidi As-Syarf Al-Buni, Sidi As-Syeikh Al-Laqqani, Sidi As-Syeikh Usman Al-Buraiji dan Sidi As-Syeikh Amin Jibril.

“Semua nama yang disebutkan tadi masing-masing mempunyai berbagai ilmu dan *sirr*, masing-masing mempunyai ramai siswa yang berguru dengan mereka. Sidi As-Syeikh Makinuddin Al-Asmar berkata: “Ramai yang masuk kepada pintu Allah dan Sidi Abul Hasan memasukkan mereka kepada Allah.”



## Bekalan Murid Ke Jalan Akhirat

Sidi As-Syeikh Taqiyyuddin bin Daqiqil Eid pula berkata: “Aku tidak pernah melihat orang yang lebih arif dengan Allah dari Saiyidina As-Syeikh Abul Hasan As-Syazili.”

Lagi tersebut dalam kitab Latho’iful Minan: “Apabila Saiyidina As-Syeikh As-Syazili رَحْمَةُ اللهِ عَلَيْهِ balik dari satu perjalanan haji (dari sekian banyak hajinya) beliau telah mendatangi Sidi As-Syeikh ‘Izzuddin bin Abdul Salam sebelum pulang ke rumah lalu berkata kepadanya: “Saiyidina wa Maulana Rasulullah ﷺ berkirim salam kepadamu.” Maka terasalah oleh sidi As-Syeikh ‘Izzuddin betapa kerdil dirinya dari layak menerima kemuliaan besar ini.” (Lihatlah dan pelajarilah; bagaimana tokoh paling alim di zamannya merasa diri amat kerdil dan dina dari kelayakan menerima kemuliaan besar ini... salam ini datang melalui perantaraan syeikh murobbinya yang besar).

“Rentetan dari itu Sidi As-Syeikh ‘Izzuddin dijemput hadir majlis di *Khankhah As-Sufiyyah* (asrama ahli sufi) di kota Kaherah. Turut hadir bersama beliau Sidi As-Syeikh Muhyiddin bin Suroqoh dan Sidi As-Syeikh Al-‘Alm Yaasin yang merupakan murid kepada Saiyidina Ibnul ‘Arabi رَحْمَةُ اللهِ عَلَيْهِ. Maka berkatalah Sidi Muhyiddin kepada Sidi ‘Izzuddin: “Ucapan tahniah buatmu ya tuanku atas apa yang kami dengar, demi Allah ini sesuatu yang menggembirakan bahawa di zaman kita ini ada orang yang menerima kiriman salam dari Saiyidina wa Maulana Rasulullah ﷺ” maka berkatalah Sidi ‘Izzuddin: “Semoga Allah menutup kami dari terbongkar”... (renungilah perbualan yang indah dan adab yang ajaib lagi hebat ini).

“Maka berkatalah Sidi Al-‘Alm Yaasin: “Semoga Allah membongkar kita supaya terzahir siapa yang benar dan siapa yang batil”... (lihatlah pula jawapan ini sedangkan beliau telah mendamping Saiyidina As-Syeikh Al-Akbar namun dirinya tidak mengambil sikap baik sangka, iqtikad dan *taslim*... sikap begini memang akan sentiasa ada kerana adanya nafsu... namun kita berbaik sangkalah, kita mengatakan sepertimana yang dikatakan oleh seorang tokoh yang mendapat redha Allah: “Kalaulah bukan kerana segala medan dan martabat nafsu maka tidaklah kita mengetahui kembara dan perjalanan menuju Allah Taala).

“Akhirnya ketiga-tiga tokoh sepakat menanti satu isyarat yang memberi keputusan atas perkara ini...(lihatlah, ada perselisihan antara mereka namun dengan segera sama-sama setuju menerima hukum isyarat, atau sebut saja ia sebagai ilmu tareqat).

“Mereka pun menunjukkan kepada qawwal (penasyid) untuk melagukan syair sufi, si qawwal yang duduk jauh dari mereka tidak tahu apa-apa tentang bicara ketiga tokoh ini. Dia pun memulakan nasyidnya dengan rangkap: “Telah benarlah kata pembawa berita, memang benar berita itu terjadi.” Mendengarkan itu bangunlah Sidi As-Syeikh ‘Izzuddin رَحْمَةُ اللهِ عَلَيْهِ dan damailah waktunya, orang lain pun semuanya bangun kerana bangunnya beliau”... (Aduhai sejahteranya sikap taslim dan tasdiq yang segera kerana hati mereka semuanya murni lalu bercahaya dan menerima).

قَالَ يَا مُوسَى إِنِّي اصْطَفَيْتُكَ عَلَى النَّاسِ بِرِسَالَتِي وَبِكَلَامِي فَخُذْ مَا آتَيْتُكَ وَكُن مِّنَ الشَّاكِرِينَ.

*“Allah berfirman: “Wahai Musa! Sesungguhnya Aku memilihmu melebihi umat manusia (yang ada pada zamanmu), dengan membawa perutusanKu (Kitab Taurat) dan dengan kalamKu; oleh itu, terimalah apa yang Aku kurniakan kepadamu, dan jadikanlah dirimu dari orang-orang yang bersyukur.” Al-A’raaf: 144*



## Bab 32

### BIOGRAFI SAIYIDINA AS-SYEIKH AS-SYAZILI رحمته الله **MUSIBAH UMAT SEKARANG**

وَمَنْ يُطِيعِ اللَّهَ وَرَسُولَهُ يُدْخِلْهُ جَنَّاتٍ تَجْرِي مِنْ تَحْتِهَا الْأَنْهَارُ خَالِدِينَ فِيهَا  
وَذَلِكَ الْفَوْزُ الْعَظِيمُ. وَمَنْ يَعْصِ اللَّهَ وَرَسُولَهُ وَيَتَعَدَّ حُدُودَهُ يُدْخِلْهُ نَارًا خَالِدًا  
فِيهَا وَلَهُ عَذَابٌ مُهِينٌ.

*“... dan barang siapa taat kepada Allah dan RasulNya, akan dimasukkan oleh Allah ke dalam surga yang mengalir dari bawahnya beberapa sungai, mereka kekal di dalamnya; dan itulah kejayaan yang amat besar. Dan barang siapa derhaka kepada Allah dan RasulNya, dan melampaui batas-batas syariatNya, akan dimasukkan oleh Allah ke dalam api neraka, kekalah dia di dalamnya, dan baginya azab seksa yang amat menghina” An-Nisa: 13-14*

**T**uan-puanku sekalian janganlah kita melampaui batasan Allah, jangan sekali-kali melakukan itu. Dengan semiliar ingatan jangan sekali-kali melampaui batasan Allah, jangan mengubahnya, jangan mendustainya, jangan menyelewengkannya, jangan mengkufurinya.

Dengan seribu million ingatan jangan sekali-kali melakukan semua itu.

Tiada yang lebih berharga dari Tuhan kita, dari agama kita, dari Kitab Suci kita, dari Sunnah kita, dari junjungan kita Saiyidina wa Maulana Muhammad ﷺ beserta seluruh anbiya' dan mursalin dengan kitab-kitab mereka, dan seluruh Ahlul Bait dan para zuriat Baginda hingga ke Hari Kiamat, beserta sekalian sahabat dan isteri-isteri Saiyidina wa Maulana junjungan Nabi ﷺ, beserta sekalian awliya', para muqorrobin, para ulama' yang 'amilin dan para sufi yang muhaqqiqin -moga Allah meredhoi mereka semua dan mengurniai kita sekalian kemanfaatan mereka... amin-.

Dalam siri kali saya akan membicarakan satu problem yang dihadapi kaum Muslimin khususnya oleh anak-anak kita lelaki dan perempuan. Problem ini terus memuncak dengan hebat, ia amat merbahaya jika kita tidak memahaminya, amat merbahaya jika kita tidak merawatnya dan tidak memberi waktu untuk menanganinya. Kita harus sanggup untuk menerima dan menelan solusinya. Sungguh inilah musibah besar dan hempukan gergasi yang akan merempuh masuk ke dalam rumah-rumah kita tak lama lagi wala haula wala quwwata illa billahi 'aliyyil 'azhim. (Allahumma Robbana wahai Tuhan yang Maha Memelihara! Peliharalah kami sekalian!). Ketahulah bahawa problem dan musibah ini adalah ilhad/ateisme, yang ertinya tidak mengiktiraf kewujudan Tuhan, tidak mengiktiraf agama dan melihat bahawa segala-galanya adalah kebetulan dan rawak.

Seperti yang diketahui ramai keterbukaan dunia elektronik (alam internet) telah membuka akal fikiran tanpa sebarang panduan. Era ini telah memberi kebebasan sepenuhnya tanpa kawalan dan menggalakkan capaian pengetahuan tanpa peduli kehormatan yang kecil dan kesopanan terhadap yang tua. Buahnya memang benar akal fikiran jadi terpelajar tapi hilang punca, terbenam dan terpolusi, hati dilanda gempa hebat dan tumbuh dalam kalbu manusia berbagai perkara yang bermanfaat dan mudarat, hilang hikmat kebijaksanaan dan maruah, muncul kekufuran, kafir mengkafir, keganasan, terrorisme, ekstimisme, perpecahan, perangai kebaratan dan ketimuran...



Semua itu berlaku dengan galak yang tiada taranya menjadikan *qudwah* (role model) hilang bagai wap dan tidak ada lagi orang menuntunya atau mencarinya dek kerana semua orang merasa diri melakukan perkara yang betul.

Ilmu yang bermanfaat, amal soleh dan akhlak baik menjadi cerita-cerita khurafat. Pendustaan dan kemunafikan menjadi jualan; tidak mengapa walau menjual diri sendiri yang penting barang laku. Marketing adalah keutamaan dan kualiti bukan soalnya; yang penting memasarkan walau apa saja barangnya.

Pemasaraan dan iklan tidak mengambil kira soal halal haram, tidak mengambil kira soal salah dan benar. Media elektronik dan cetak tidak peduli apakah porno atau pelacuran, apakah dadah atau yang memabukkan. Siaran radio tidak kesah apakah manfaat atau mudarat, siaran tv tidak ambil tahu apakah untuk keselamatan bangsa atau membunuh mereka.

Para artis, seniman dan seniwati tidak kira siapa semuanya menjadi mode, merekalah yang dipandang bagus, yang maju, menjadi alternatif role model yang hilang, ditakjubi dan dikagumi. Mereka menjadi tuhan-tuhan moden, hanya saja mereka itu... ha... manusia... ha... akhirnya tiada lagi tuhan-tuhan yang banyak, tiada satu tuhan, tiada lagi ikatan dan tiada sempadan kerana semua mereka dan kita menjadi tuhan.

Masing-masing menyembah diri sendiri, menyembah idea sendiri, menyembah penampilan diri, menyembah fesyen pakaian, menyembah hidup sendiri (aku tuhan dan engkau tuhan) tapi sebenarnya sudah tiada apa-apa tuhan lagi. Demikianlah hentaman dan pukulan yang menimpa seluruh manusia termasuklah kaum Muslimin.

Adapun kaum Muslimin dan Muslimat isu mereka lebih besar dari itu kerana mereka [sepatutnya] pembawa risalah kemanusiaan. Tapi apakah yang telah dan sedang berlaku? Yang jadi ibu tidak tahu erti keibuan, yang jadi bapa tidak tahu apakah ertinya dia menjadi bapa. Mereka cuma tahu kahwin, beranak bayi lelaki dan perempuan dan itu saja.

Ironi dan musibah yang paling besar ialah suara Islam di tengah umat sendiri adalah lemah dan amat dhaif, tidak seiring dengan pesatnya perkembangan yang berlaku kepada umat. Kumpulan ustaz-ustaz menutup pintu dan mengunci diri; tidak mahu memahami masa kini yang mereka hidup di dalamnya, tidak mahu menyesuaikan fikiran dan pemikiran dengan dunia semasa. Golongan syeikh-syeikh terbatas kemampuan dan dihadkan; ini boleh dan itu tak boleh. Masing-masing syeikh berkata kepada diri sendiri aku dah hafal berpuluh-puluh hadis dan berpuluh-puluh ayat, ini sudah cukup baik! Dengan itu dia pun menjadi syeikh dan mufti tanpa perlu lagi mengaji ilmu yang usul dan furuk, tak perlu bersengkang mata membaca kitab-kitab syarah, tak perlu lagi mutalaah segala dalil dan berbagai tafsir yang diperlukan oleh generasi muda sekarang.

Pernah saya tonton satu rancangan tv menyiarkan seorang doktor pendakwah yang menamatkan Ph.D di bidang syariah katanya. Hos rancangan bertanya kepadanya apakah tuan seorang syeikh? (Subhanallah, lihatlah betapa umat telah berubah) dengan sombong dia menjawab: Benar! Saya seorang syeikh dan mufti.

Para jemaah sekalian! Entah siapalah yang telah memperdaya mereka hingga berani memuji diri sendiri dengan begitu ajaib dan aneh ini. Apakah kayu ukur, dasar dan ketetapan segala perkara telah berubah semuanya hatta terhadap mereka yang mahu kita ambil ilmu darinya???... Subhanallah!.

أَلَمْ تَرَ إِلَى الَّذِينَ يَزْكُونَ أَنْفُسَهُمْ بِاللَّهِ يُزَكِّي مَنْ يَشَاءُ.

*“Tidakkah Engkau perhatikan (dan merasa aneh) kepada orang-orang yang membersihkan (memuji) diri sendiri? (padahal perkara itu bukan hak manusia) bahkan Allah jualah yang berhak membersihkan (memuji) sesiapa yang dikehendakiNya (menurut aturan SyariatNya)...” An-Nisa: 49*



وَلَوْلَا فَضْلُ اللَّهِ عَلَيْكُمْ وَرَحْمَتُهُ مَا زَكَا مِنْكُمْ مِّنْ أَحَدٍ أَبَدًا وَلَكِنَّ اللَّهَ يُزَكِّي مَن يَشَاءُ.

*“...dan kalaulah tidak kerana limpah kurnia Allah dan rahmatNya kepada kamu, nescaya tidak ada seorang pun di antara kamu menjadi bersih dari dosanya selama-lamanya; akan tetapi Allah membersihkan sesiapa yang dikehendakiNya ...” An-Nur: 21*

Satu lagi contoh yang saya saksikan dalam satu rancangan tv seorang doktor graduan pengajian feqah ditanya oleh hos rancangan apakah zaman sekarang masih ada mujtahid muqayyad dalam mazhab? Syeikh doktor itu pun menjawab: Ada! Yaitu para graduan Ph.D dari pengajian feqah dan feqah perbandingan?!!!

Satu lagi contoh ajaib yang saya lihat dalam internet mengenai rakaman perbualan tesis-tesis Ph.D dan betapa umat kita ini telah jauh berubah. Dalam perbualan tesis seorang siswa akan diuji oleh satu jawatankuasa yang biasanya terdiri dari tiga orang professor doktor dan syeikh. Satu fenomena ajaib sedang mula melanda dengan ganasnya apabila semua orang mahu mendapatkan degri Ph.D dan menambah askara “Dr.” sebelum namanya disebut. Tak mengapalah ini. Yang menjadi masalahnya ialah jawatankuasa pembahas tesis membahaskan siswa itu kadang-kadang sebagai syeikh, kadang-kadang menyebut pangkatnya “yang arif” jika dia hakim dan kadang-kadang membahaskannya sebagai doktor sedangkan dia masih siswa yang sedang diuji keabsahan tesisnya. Entah macam mana fenomena ini boleh berlaku sekarang sedangkan dahulu tak pernah begini keadaannya.

Dahulu seorang siswa akan dibahaskan dengan namanya hinggalah tamat pengajian dan berhasil memperoleh gelarnya. Yang lebih aneh dari situasi tadi ialah siswa yang sedang diuji tidak peduli pun dengan professor yang mengujinya, dan boleh jadi si siswa akan meremeh dan memperlekehkan professor itu. Tuan puan kaum Muslimin sekalian macam mana boleh sampai jadi begitu? Apakah hasilnya ialah



seperti buruk yang kita sangkakan? Atau ada pihak yang mahu kita jatuh dengan teruk melalui penggraduanan siswa kedoktoran secara begini? Atau apa sebenarnya ini? Saya bingung!!

Kemudian dikatalah orang: Si polan itu sebenarnya membeli deग्रinya, atau professor yang mengujinya itulah sebenarnya yang menuliskan tesis untuk si polan dan telah mendapat bayarannya, atau kita menyimpulkan bahawa professor itu takut dengan pengaruh siswa yang diujinya ini kerana dia merupakan pendakwah popular dan ramai pengikut, siswa itu boleh menghancurkan professornya jika dia mahu maka wajiblah bagi si professor menghormatinya dan mentakzimnya seterusnya memberinya degri yang dikehendakinya sebelum bermula sesi pengajiannya.

Tuan-puan sekalian apa yang harus kita katakan sekarang?! Demi Allah pusing kepala kita dibuatnya. Bila dipersoalkan mereka mempertahankan diri [dengan menuding jari kepada kita] sambil berkata sebahagian dari sangka-sangkaan adalah dosa. Terus?! Apakah dengan seluruh sangkaan kita akan mendustai mata kita yang melihat, telinga kita yang mendengar serta hati dan akal kita yang masih waras?! Benarlah, sesungguhnya mereka yang punya sifat malu telah meninggal dunia, lalu jika engkau tidak tahu malu buatlah apa yang engkau mahu.

Apa pun Alhamdulillah, Saiyidina wa Maulana junjungan Nabi ﷺ telah bersabda: “Malu itu sebahagian dari iman,” wahai Tuhan kami jadikanlah kami orang yang tahu malu dan ahli iman, kami ucapkan: “Astagfirullah demi malu kepada Allah,” kami berdoa: “Allahumma Robbana jadikanlah kami bertambah malu kepadaMu... Allahumma amin.”

Tuan-puanku sekalian, ini adalah yang diceritakan kepada saya oleh peribadi amat santun Sidi Professor Dr. Manee’ mantan dekan Fakulti Usuluddin Universiti Al-Azhar روضه, beliau adalah putera kepada Sidi As-Syeikh Al-Kamil peribadi masyhur yang penuh adab dan menyampaikan didikan adab Al-Imamul Akbar lagi Syeikhul Islam di zamannya, syeikh Tareqat As-Syaziliyyah lagi peribadi siddiq dalam umat sewaktunya, Imam Al-Ghazali di zamannya Prof. Dr. Abdul Halim



## Bekalan Murid Ke Jalan Akhirat

Mahmoud رَضِيَ اللَّهُ عَنْهُ وَأَرْضَاهُ .

Sidi Manee' berkata: "Dahulu di Universiti Al-Azhar tiada pelajar yang diterima masuk melainkan setelah melepasi peperiksaan dan temuduga jawatankuasa. Setiap jawatankuasa terdiri dari tiga orang syeikh yang akan menguji tiga orang calon pelajar. Tiga orang syeikh ini mendapat instruksi dari As-Syeikhul Akbar Syeikhul Islam Syeikhul Azhar bahawa dari tiap tiga orang calon siswa yang menduduki peperiksaan hanya seorang sahaja lulus. Ini demi menjaga ketinggian nilai dan standard Al-Azhar di mata umat Islam dan kerana kita mahu menggraduankan ulama' yang benar-benar berkualiti. Syarat untuk mendaftar masuk peperiksaan ini ada dua: (1) Hafaz Al-Quran 30 juzu' (2) Hafaz sepuluh ribu bait syair Arab klasik.

Sidi As-Syeikh Manee' رَحِمَهُ اللَّهُ تَعَالَى وَرَضِيَ اللَّهُ عَنْهُ وَأَرْضَاهُ menyambung ceritanya: "Sebaliknya sekarang yang berlaku di Al-Azhar calon-calon pelajar paling lemah diterima masuk, mereka yang tidak diterima di mana-mana universiti lain dan yang mendapat markah tercorot dalam peperiksaan sijil pelajaran sekolah menengah. Maafkan saya untuk berkata bahawa para pelajar corot itu telah dibuang ke Al-Azhar. Natiujahnya ialah mereka melemahkan Al-Azhar dan sudah pasti membunuhnya.

"Di Al-Azhar masih ada lagi kalangan masyaikh yang profesional dan berkaliber, namun bilangan mereka sedikit."

Sidi Manee' menyambung lagi: "Lihat saja hal ini sebagai contoh; para siswa kedoktoran di bidang tafsir. Saya beri mereka tiga buah kitab tafsir, saya katakan pada mereka kaji tiga buah kitab ini dan fahami dengan baik kemudian tulislah tesis kamu mengenainya untuk mendapatkan degri Ph.D kamu. Saya katakan kepada mereka tulislah dengan jujur dan amanah, jangan menyeleweng dan jangan menipu. Tuliskan segala yang disepakati oleh para ulama dalam tiga kitab itu dan segala yang mereka perselisihkan. Tuliskan segala hujah, dalil, naql, pemikiran dan kefahaman mereka. Himpunkan itu semua dalam tesis kamu dan apa kesimpulan dari kajian kamu mengenainya untuk mendapatkan Ph.D kamu dalam bidang tafsir." Sidi Manee' menangis

sambil mengujar: “Kerja semudah ini pun mereka tak tahu dan tidak mampu melakukannya.”

Selepas bergraduan siswa tadi pulang ke negerinya untuk menjadi konsultan syariah atau pendakwah Islam kesohor dan entah apa-apa nama besar lagi yang baru tercipta. Baik di sana atau di sini mereka tidak memahami apa itu tafsir, apa itu agama, apa itu syariah, apa itu feqah dan apa lagi yang lain kerana mereka sebenarnya hilang atau menghilangkan diri atas faktor kombinasi umat Islam yang telah amat jauh dari ilmu, amat jauh dari menuntut ilmu dan dari muthola’ah ilmu. Ini bukan satu kenyataan pukul rata, ini adalah realiti di bumi nyata.

Lalu tidakkah realiti ini mendorong anak-anak muda kita kepada ilhad/ateisme?? Kita semua wajib menangis kerana turut memberi saham secara sedar atau tidak dalam perubahan kombinasi umat. Semua ibu dan bapa mahu anak-anak mereka mendapat yang terbaik dalam hidup, mahu masa depan yang cerah untuk mereka, pendapatan yang lumayan dan taraf hidup yang unggul. Kerana ini para ibu bapa menghantar anak-anak mereka ke pengajian perubatan, kejuruteraan, undang-undang, seni, pentadbiran, akauntansi dan lain-lain bidang pengkhususan yang menjanjikan gaji besar.

Tiada siapa berfikir bahawa anak-anak yang cemerlang dalam pelajaran dan mendapat markah tertinggi dalam peperiksaan patut dihantar ke bidang pengajian Islam dan cabang-cabangnya. Baiklah, kalau begitu anak pelajar bagaimana yang akan masuk ke pengajian Islam?? Itulah anak-anak pelajar yang berIQ sederhana dan berkemampuan sederhana. Lihatlah bagaimana kita telah berkerjasama dalam jenayah pengabaian bidang-bidang pengajian Islam. Sekarang kita juga yang mengeluh sedih dan berkata bahawa ustaz polan itu mundur dan tak faham. Tentulah begitu kerana memang itu tahap kemampuan si ustaz!. Kemudian kita minta hukum fatwa darinya pula. Demi Allah tuan puan sekalian bagaimanakah dia akan berfatwa sedangkan dia tak mempunyai kekuatan IQ yang baik dan akal yang cerdas.



Demi Allah katakan padaku apakah yang akan diberi kepada kita oleh makhluk bernama ustaz ini? Malangnya dia ada degri dan pandai bercakap, dia tahu bagaimana menggerakkan massa ke arah ilmu yang paling mudah yaitu ilmu engkar. Inilah dia bidang pengkhususan bagi mereka yang tidak ada bidang pengkhususan yaitu engkar, mengecap kafir dan menghukum itu dan ini tak boleh... pastinya kamu akan diminati ramai??

Kemudian kita selaku anggota masyarakat meraung, menyindir dan marah dengan apa yang berlaku sedangkan ini semua adalah hasil jenayah tangan kita sendiri. Tuan puan sekalian sesungguhnya orang yang tidak mempunyai apa yang diminta bagaimana dia akan memberinya?! Semoga Allah membela semua kita dan membawa kepada keredhoanNya. Allahumma amin.

Apa yang disampaikan tadi adalah dari sudut mengkritik kelemahan diri sendiri demi membaik pulih keadaan. Ia amat penting dalam proses tarbiyyah, pemurnian jiwa, pengajaran, pemahaman serta rawatan masalah yang berbagai-bagai.

((لَقَدْ مَنَّ اللَّهُ عَلَى الْمُؤْمِنِينَ إِذْ بَعَثَ فِيهِمْ رَسُولًا مِّنْ أَنفُسِهِمْ يَتْلُو عَلَيْهِمْ آيَاتِهِ  
وَيُزَكِّيهِمْ وَيُعَلِّمُهُمُ الْكِتَابَ وَالْحِكْمَةَ وَإِنْ كَانُوا مِن قَبْلُ لَفِي ضَلَالٍ مُّبِينٍ)).  
صَلَّى اللَّهُ عَلَيْهِ وَسَلَّمَ.

*“Sesungguhnya Allah telah mengurniakan (rahmatNya) kepada mereka yang beriman, setelah Dia mengutuskan dalam kalangan mereka seorang Rasul dari kalangan mereka sendiri, yang membacakan kepada mereka ayat-ayat Allah dan membersihkan mereka serta mengajar mereka Kitab Allah (Al-Quran) dan Hikmah. Dan sesungguhnya mereka sebelum (kedatangan Nabi Muhammad) itu adalah dalam kesesatan yang nyata” - صَلَّى اللَّهُ عَلَيْهِ وَسَلَّمَ*  
**Aali ‘Imran: 164**

((هُوَ الَّذِي بَعَثَ فِي الْأُمِّيِّينَ رَسُولًا مِّنْهُمْ يَتْلُو عَلَيْهِمْ آيَاتِهِ وَيُزَكِّيهِمْ وَيُعَلِّمُهُمُ الْكِتَابَ وَالْحِكْمَةَ وَإِنْ كَانُوا مِن قَبْلُ لَفِي ضَلَالٍ مُّبِينٍ)). صَلَّى اللَّهُ عَلَيْهِ وَسَلَّمَ.

*“Dia lah yang telah mengutuskan dalam kalangan orang-orang (Arab) yang ummiyyin, seorang Rasul dari kalangan mereka sendiri, yang membacakan kepada mereka ayat-ayat Allah dan membersihkan mereka serta mengajarkan mereka Kitab Allah dan Hikmah. Dan sesungguhnya mereka sebelum (kedatangan Nabi Muhammad) itu adalah dalam kesesatan yang nyata” - صَلَّى اللَّهُ عَلَيْهِ وَسَلَّمَ* **Al-Jumu'ah: 2**

Sekarang kita teruskan lagi dengan perkhabaran dan ahwal Saiyidina As-Syeikh Abul Hasan As-Syazili رَحِمَهُ اللَّهُ.

## PENUTUR ILMU LADUNI

Sidi As-Syeikh Ibnu ‘Atho’illah As-Sikandari رَحِمَهُ اللَّهُ menyebut dalam kitabnya Latho’iful Minan: “Sidi As-Syeikh Makinuddin Al-Asmar رَحِمَهُ اللَّهُ mengkhabarkan kepadaku dengan katanya: “Aku telah hadir di kota Al-Mansurah (waktu kaum Muslimin berperang melawan Nasrani) majlis dalam sebuah khemah yang ada padanya Sulthnul Ulama Sidi ‘Izzuddin bin Abdus Salam رَحِمَهُ اللَّهُ, Sidi Taqiyuddin bin Daqiqil Eid رَحِمَهُ اللَّهُ, Sidi As-Syeikh Majduddin Ali bin Wahab رَحِمَهُ اللَّهُ, Sidi As-Syeikh Muhyiddin bin Suroqoh رَحِمَهُ اللَّهُ, Sidi As-Syeikh Majduddin Al-Ikhmimi رَحِمَهُ اللَّهُ dan Saiyidina As-Syeikh Abul Hasan As-Syazili رَحِمَهُ اللَّهُ.

Dalam majlis itu kitab Ar-Risalah Al-Qusyairiyyah dibacakan kepada hadirin lalu masing-masing tokoh yang ada memberi ulasan sedangkan Saiyidina As-Syeikh As-Syazili tetap diam hingga semuanya selesai berbicara. Maka mereka pun berkata kepada beliau: “Ya Saiyidina, kami mahu mendengar sesuatu dari Tuan,” balas beliau: “Tuan-tuan para penghulu zaman dan tokoh-tokoh besarnya, bicara sudah datang dari tuan-tuan sekalian,” maka kata mereka: “Tak dapat tiada kami mahu mendengar sesuatu dari Tuan.



“Saiyidina diam seketika lalu mula berbicara dengan berbagai sirr yang ajaib dan ilmu-ilmu yang aneh. Maka bangunlah Sidi As-Syeikh ‘Izzuddin bin Abdus Salam keluar dari khemah meninggalkan tempat duduknya dan berkata: “Dengarilah kalam beliau yang amat dekat terbitnya kepada Allah Taala.”

Dalam satu riwayat yang dicatat oleh Al-Hafiz Ibnu Katsir رَحْمَةُ اللهِ عَلَيْهِ beliau berkata: “Bahawa Sidi As-Syeikh ‘Izzuddin bin Abdus Salam selalu hadir majlis mahaguru Abul Hasan As-Syazili untuk mendengar perkataan beliau dalam ilmu hakikat dan menyaksikan kefasihannya yang indah dalam menurut ilmu ladunni. Di situlah As-Syeikh ‘Izzuddin beroleh warid dari Allah Taala lalu kerana saking gembira dirinya akan bangun terlari-lari anak di atas dua kakinya bersama para muridin yang lain dan berkata kepada mereka: “renungilah kata-kata beliau ini sesungguhnya ia amat dekat terbitnya dari Tuhannya.”

Al-Arif Billah Sidi Sariyyuddin Muhammad bin Al-Maliq رَحْمَةُ اللهِ عَلَيْهِ berkata: “Al-Quthb Al-Ghauts Saiyidina Abul Hasan As-Syazili رَحْمَةُ اللهِ عَلَيْهِ satu ketika di kota Damanhur daerah Al-Buhairah telah berbicara dengan kalam yang aneh yang tak pernah didengar orang sebelumnya hingga ke tahap beliau menyebut dalam bicaranya bahawa nendaku Rasulullah ﷺ telah berkata begian-begian. Dalam majlis itu turut hadir seorang wali besar lagi kukuh kedudukannya dari Maghribi, dalam hatinya dia mengingkari kalam Saiyidina tadi.

“Katanya dalam hati: “Mana kan Syeikh ini dan mana tah nendanya waktu sekarang?!,” maka bangunlah si wali dari majlis pergi ke zawiyah Syeikh Mujahid. Apabila malam hari tidurlah dia lalu bermimpi melihat junjungan Sidnan Nabi ﷺ datang menegurnya: “Hai si polan, engkau tidak percaya pada anakku Abul Hasan. Benar! Apa yang dikatakannya semua adalah bicaraku padanya.” Maka bangunlah si wali dari tidurnya lalu berkata kepada Syeikh Mujahid: Marilah mengikutku bertemu As-Syeikh Abul Hasan As-Syazili,” ujar Syeikh Mujahid kepadanya: “Apatah hajatmu kepada Syeikh Abul Hasan di waktu begini?,” kata si wali: “Tak dapat tiada mesti aku pergi kepadanya,” lalu apabila sampai kepada Saiyidina berkatalah beliau menegur si wali: “Hai polan, tiada

engkau percaya hingga engkau dengar sendiri dengan telinga mu. Demi keagungan Allah jika engkau tidak keluar dari negeri ini nescaya akan ku cabut kewalianmu,” maka keluarlah si wali pada waktu itu juga.”



## Bab 33

### **BIOGRAFI SAIYIDINA AS-SYEIKH AS-SYAZILI رحمته الله HAKIKAT ZUHUD DAN TUTUP USIA**

Kita teruskan lagi dengan perkhabaran dan ahwal Saiyidina As-Syeikh Abul Hasan As-Syazili رحمته الله.

**S**idi Madhi bercerita bahawa pada satu hari Saiyidina As-Syeikh As-Syazili رحمته الله berbicara tentang zuhud. Dalam majlis itu ada seorang faqir berpakaian lusuh manakala Saiyidina pula berpakaian indah lengkap dengan burdah yang cantik dan mahal. Si faqir berkata dalam hatinya: “Bagaimana Syeikh bicara darihal zuhud sedang demikian pakaiannya?! Bahkan akulah orang zuhud di dunia ini.”

Maka berpalinglah Saiyidina As-Syeikh رحمته الله kepadanya sembari berkata: “Duhai kamu, kain baju yang kamu pakai itu adalah pakaian berkehendak pada dunia kerana ia menyeru dengan lisan meminta (mengemis) memberitahu kefakiran. Adapun pakaian kami ini menyeru dengan lisan kaya dan menahan diri (tidak perlu kepada pemberian orang).” Maka bangunlah si faqir menunjuk diri kepada semua yang hadir lantas berkata: “Ya Saiyidina, demi Allah hambalah yang bercakap begitu dalam hati tadi. Sekarang hamba istighfar kepada Allah dan taubat kepadaNya.” Kata Sidi Madhi: “Maka Saiyidina pun menyuruh si faqir diberi pakaian yang baik dan menunjukkannya kepada seorang



ustaz yang bagus bernama Ibnu Ad-Dahhan serta berkata kepadanya: “Moga Allah menjadikan dirimu dikasihi hati para *ahkyar*, moga Allah memberkati apa yang diberiNya kepadamu dan menjadikan hujungmu kebaikan.”

Satu sumber kepercayaan mengkhobar padaku, katanya: “Aku mendengar As-Syeikh As-Soleh Abu Marwan Abdul Malik bin As-Sammath berkata: “Aku menuju ke benua Mesir lalu masuk kota Iskandariyyah. Di sana aku pergi kepada Saiyidina As-Syeikh Abul Hasan As-Syazili رحمته الله maka ku dapati beliau duduk bersama satu jemaah, kelihatannya Saiyidina seperti sedang mendebati mereka tentang satu ilmu. Aku pun memberi salam dan duduk di hadapan beliau, maka kata beliau padaku: “Siapa namamu dan dari mana datangmu? Apa perkataanmu?”

“Aku pun mengenalkan diri dengan namaku dan nama bapaku serta ku nyatakan bahawa usaha pekerjaanku Al-Quran kitab Allah. Maka ujar beliau: “bacakanlah padaku sesuatu dari kitab Allah Azza wa Jalla,” lalu aku pun mengucap *a’udzubillah* kemudian Allah meluncurkan lidahku membaca:

فَتَوَكَّلْ عَلَى اللَّهِ إِنَّكَ عَلَى الْحَقِّ الْمُبِينِ. إِنَّكَ لَا تَسْمَعُ الْمَوْتَى وَلَا تَسْمَعُ  
الصُّمَّ الدُّعَاءَ إِذَا وَلَّوْا مُدْبِرِينَ. وَمَا أَنْتَ بِهَادِي الْعُمَى عَنْ ضَلَالَتِهِمْ إِنْ تَسْمَعُ  
إِلَّا مَنْ يُؤْمِنُ بِآيَاتِنَا فَهُمْ مُسْلِمُونَ. وَإِذَا وَقَعَ الْقَوْلُ عَلَيْهِمْ أَخْرَجْنَا لَهُمْ دَابَّةً  
مِّنَ الْأَرْضِ تُكَلِّمُهُمْ أَنَّ النَّاسَ كَانُوا بِآيَاتِنَا لَا يُوقِنُونَ. وَيَوْمَ نَحْشُرُ مِنْ كُلِّ  
أُمَّةٍ فَوْجًا مِّمَّنْ يُكَذِّبُ بِآيَاتِنَا فَهُمْ يُوزَعُونَ. حَتَّى إِذَا جَاءُوا قَالَ أَكَذَّبْتُمْ بِآيَاتِي  
وَلَمْ تَحِيطُوا بِهَا عِلْمًا أَمْ آذًا كُنْتُمْ تَعْمَلُونَ. وَوَقَعَ الْقَوْلُ عَلَيْهِمْ بِمَا ظَلَمُوا فَهُمْ  
لَا يَنْطِقُونَ.



## Bekalan Murid Ke Jalan Akhirat

*“Oleh itu tawakkal lah kepada Allah, sesungguhnya engkau berada di atas kebenaran yang jelas nyata.*

*Sesungguhnya engkau tidak dapat menjadikan orang-orang yang mati (hatinya) itu menerima ajaranmu, dan tidak dapat menjadikan orang-orang yang pekak itu mendengar seruanmu, apabila mereka berundur ke belakang (disebabkan keingkarannya).*

*Dan engkau tidak akan dapat memberi petunjuk kepada orang-orang yang buta supaya menjauhi kesesatan mereka; engkau tidak dapat memperdengarkan (seruanmu itu) melainkan kepada orang-orang yang sanggup beriman akan ayat-ayat keterangan kami, kerana mereka orang-orang yang berserah diri dengan ikhlas.*

*Dan apabila sampai masa berlakunya hukuman atas manusia, Kami keluarkan untuk mereka sejenis binatang dari bumi, yang akan menyatakan kepada mereka bahawa manusia telah tidak meyakini ayat-ayat keterangan dan pengajaran Kami.*

*Dan (ingatlah) hari Kami himpunkan dari tiap-tiap umat sekumpulan besar orang-orang yang mendustakan ayat-ayat keterangan Kami, lalu mereka dijaga serta diatur keadaan dan perjalanan masing-masing.*

*Sehingga apabila mereka datang (ke tempat pengadilan), Allah Taala berfirman: “Adakah kamu mendustakan ayat-ayat keteranganKu dengan tidak lebih dahulu kamu mengetahuinya secara meliputi? atau apakah yang kamu telah lakukan?”*

*Dan jatuhlah hukuman atas mereka (dengan azab) disebabkan kezaliman mereka (berlaku kufur ingkar), lalu mereka diam membisu” **An-Naml: 79-85***

[Setelah bacaanku itu kelihatanlah] wajah Saiydina As-Syeikh berseri-seri lalu berkata kepada hadirin: “Apakah sesudah keterangan Allah dan RasulNya ada keraguan lagi?”

“Maka tahulah aku bahawa hadirin ini rupanya puak Muktazilah dan Saiyidina As-Syeikh mendebati mazhab mereka, lalu taubatlah mereka semua di tangan beliau dan kembali kepada kebenaran dan sunnah. Saiyidina رَحْمَةُ اللهِ عَلَيْهِ kemudian berkata kepadaku: “Mintalah padaku apa yang kau mahu,” maka kataku: “Mohon Tuan memberi hamba tiga perkara: “Sudilah Tuan memberi hamba pakaian baru, menunjukkan kepada hamba guru tajwid supaya hamba dapat belajar padanya memperelok bacaan pada kitab Allah dan Tuan mendoakan kebajikan buat hamba.”

Maka Saiyidina telah memberiku pakaian baru dan menghantar aku mengaji kepada seorang ustaz yang bagus namanya Ibnu Ad-Dahhan, Saiyidina juga mendoakan aku dengan katanya: “Semoga Allah menjadikah hati para akhyar sayang padamu, semoga Allah memberkati apa yang diberiNya kepadamu dan menjadikan kesudahanmu bahagia.” Demi Allah aku telah melihat berlakunya dua doa pertama beliau kepadaku dan aku mengharap pada Allah akan yang ketiga.”

As-Syeikh As-Soleh Abu Yahya Al-Bija’iy bercerita kepadaku: “Bahawa ayahku -moga Allah merahmatinya- mengkhobar padaku: ‘Abu Yusuf Al-Jandubiy dan saudaranya kedua-dua mereka berkata: “Satu malam Saiyidina As-Syeikh Abul Hasan As-Syazili رَحْمَةُ اللهِ عَلَيْهِ tiba kepada kami, waktu itu kami telah mengambil sepuluh ekor kambing yang kami hutangi untuk diperdagangkan. Maka kami pilih seekor yang terbaik dan kami sembelih ia untuk Saiyidina. Beliau mengujar kepada kami: “Mengapa tuan-tuan melakukan ini?,” jawab kami: “Demi Allah ini keberkatan, kami sembelih ia untuk Tuan.” Saiyidina As-Syeikh رَحْمَةُ اللهِ عَلَيْهِ lalu berkata: “Seekor kambing ini menyamai seribu kambing Insya Allah Taala.”

“Kata ayahku -moga Allah merahmatinya-: “Maka tidaklah berlalu melainkan tempoh waktu yang sedikit selepas itu lalu demi Allah sempurnalah bilangan seribu ekor kambing ditambah seribu mud (lebih kurang 750kg) makanan tersimpan dalam setor.” Ayahku -moga Allah merahmatinya- berkata lagi: “Aku hadir waktu itu dan demi Allah



## Bekalan Murid Ke Jalan Akhirat

telah mengiranya, aku telah makan dari keturunan kambing-kambing itu dengan keberkatan Saiyidina -semoga Allah meredhoinya dan mengurnia kita serta seluruh Muslimin akan keberkatannya-.”

Sidi As-Syeikh Ibnu Sobbagh رَحْمَةُ اللهِ عَلَيْهِ berkata: “Aku telah dikhabarkan oleh Sidi Jamaluddin Al-‘Iraqi dengan katanya: “Saiyidina As-Syeikh As-Syazili رَحْمَةُ اللهِ عَلَيْهِ berkata: “Dalam satu pengembaraan aku bertemu seorang wali, aku pun membentangkan satu bicara mengenai tauhid kepadanya, dia menjerit lalu mati. Lalu dikatakan kepadaku: “Ya Ali, mengapa engkau lakukan? Nescaya engkau akan dihukum dengan perginya pengelihatamu.”

Kata Sidi Jamaluddin: “Setelah mata Saiyidina As-Syeikh As-Syazili رَحْمَةُ اللهِ عَلَيْهِ tak dapat melihat, Sidi Abul Abbas Al-Mursi رَحْمَةُ اللهِ عَلَيْهِ masuk mengadapnya, lalu kata Saiyidina: “Wahai Abul Abbas, pengelihatan mata lahirku terpantul kepada mata hatiku, maka jadilah seluruh diriku dapat melihat dengan Allah yang tiada Tuhan selain Dia. Di zamanku tiada yang ku tinggal lebih afdhal dari para temanku dan engkau demi Allah paling afdhal dikalangan mereka.”

Kemudian Saiyidina berkata kepadanya: “Berapa umurmu hai Abul Abbas?” maka jawabnya: “Ya Tuanku, hampir masuk 30 tahun,” lalu kata Saiyidina: “Berbaki atasmu sepuluh tahun lalu engkau akan mewarisi maqam *as-siddiqiyyah* selepasku” -moga Allah meredhoi mereka berdua dan mengurnia kita keberkatan mereka, amin-.

Saiyidina As-Syeikh As-Syazili رَحْمَةُ اللهِ عَلَيْهِ berkata: “Apabila sampai aku ke benua Mesir dan tinggal padanya aku telah berkata: “Ya Robbi, Engkau menempat tinggalkan hamba di negeri orang Qibthi, nanti hamba disemadikan antara mereka,” lalu dikatakan kepadaku: “Ya Ali, engkau akan disemadikan di satu tanah yang Aku tak pernah diderhakai di atasnya.”

Sidi Madhi رَحْمَةُ اللهِ عَلَيْهِ bercerita: “Tikamana Saiyidina As-Syeikh As-Syazili رَحْمَةُ اللهِ عَلَيْهِ mahu berangkat pada permusafiran yang beliau mangkat padanya ketika itu aku telah mengahwini seorang wanita Iskandariyyah. Waktu akan berangkat itu isteriku sedang hamil. Isteriku menangis seraya

berkata kepadaku: “Bagaimana tuan mahu musafir meninggalkan aku yang sarat mengandung ini?”

Kata Sidi Madhi: “Aku pun menyampaikan perkara itu kepada Saiyidina As-Syeikh lalu kata beliau: “Bawalah isterimu kepadaku,” aku pun membawanya, apabila kami masuk beliau berkata kepada isteriku: “Wahai ibu si Abdud Daim, biarkanlah Madhi bermusafir denganku, aku mengharap pada Allah kebajikan untukmu,” maka kata isteriku: “Ya Tuanku, hamba dengar dan hamba taat,” lalu Saiyidina pun berdoa untuknya dan beredarlah dia. Dalam permusafiran kami isteri yang ku tinggal telah melahirkan seorang anak lelaki lalu aku menamainya Abdud Daim.

Kata Sidi Madhi رَضِيَ اللهُ عَنْهُ: “Apabila kami sedang bersia-siap untuk musafir Saiyidina As-Syeikh رَضِيَ اللهُ عَنْهُ berpesan: “Bawalah bersama kamu sekalian kapak dan sekop, kalau nanti ada kalangan kita yang meninggal dunia dapat kita kebumikannya.” Kata Sidi Madhi: “Sebelum ini dalam semua permusafiran kami dengan beliau tidak pernah teradat bagi kami membawa kapak dan sekop. Rupa-rupanya itulah isyarat bahawa beliau akan mangkat -moga Allah merahmatinya, moga Allah meredhoinya dan menyampaikan keredhoan buatnya-“.

Telah mengkhobar padaku Sidi As-Syeikh Al-‘Arif Syarafuddin رَضِيَ اللهُ عَنْهُ Ibnu Saiyidina As-Syeikh As-Syazili رَضِيَ اللهُ عَنْهُ dengan katanya: “Ada seorang pemuda mengaji Al-Quran duduk dan membesar bersama kami, dia tidak berbapa dan ibunya tinggal bersama di rumah kami. Tikamana Saiyidina As-Syeikh mahu musafir beliau mengarahkan kami semua anak beranak pergi bersama beliau. Apabila melihat itu si pemuda jadi teruja dan sungguh-sungguh mahu ikut serta, maka kata Saiyidina: “Bawa dia bersama,” lalu datanglah ibunya berkata kepada Saiyidina As-Syeikh: “Ya Tuanku, moga sudilah memberi perhatian kepadanya,” kata Saiyidina: “Perhatian kami akan bersamanya hingga Humaytsara Insya Allah Taala.” [Maka bergeraklah rombongan] lalu sedikit jarak sebelum kami sampai ke Humaytsara kedua-dua Saiyidina dan anak muda itu jatuh sakit.”

Sekarang Humaytsara adalah sebuah kampung berpenghuni,



## Bekalan Murid Ke Jalan Akhirat

lokasinya berdekatan dengan Laut Merah dan pelabuhan desa pelancongan (Mursi 'Alam). Titik hubungan jalan darat terdekat dengan Humaytsara sekarang adalah Bandar Aswan sejauh dua jam dengan kereta -kawasan ini letaknya di selatan Mesir di perbatasan Sudan-. Zaman dahulu pula titik terdekat dengannya ialah Pelabuhan 'Aizab tempat rombongan haji naik kapal laut ke Tanah Suci.

"Saiyidina dan anak muda itu kedua-duanya jatuh sakit, lalu matilah si pemuda -moga Allah Taala merahmatinya- sebelum sampai ke Humaytsara. Kata Saiyidina As-Syeikh: "Bawa dia hingga ke Humaytsara." Apabila sampai kami pun memandikan pemuda itu dan Saiyidina As-Syeikh mensolatnya, kemudian kami kebumikan. Maka pemuda itulah yang pertama dikebumikan di situ.

"Adapun Saiyidina As-Syeikh رَضِيَ اللهُ عَنْهُ telah mangkat pada malam itu. Petang hari sebelum kemangkatannya beliau menghimpun semua teman-temannya lalu menyampaikan beberapa wasiat kepada mereka. Saiyidina mewasiati mereka dengan Hizbul Bahr, kata beliau: "Hafazkanlah ia kepada anak-anakmu yang lelaki dan perempuan, sesungguhnya pada hizb ini ada *Ismullah Al-A'zhom*."

Sidi Syarafuddin رَضِيَ اللهُ عَنْهُ berkata: "Saiyidina As-Syeikh As-Syazili رَضِيَ اللهُ عَنْهُ bersunyi diri bersama khalifahnyanya Sidi Abu Abbas Al-Mursi رَضِيَ اللهُ عَنْهُ lalu mewasiatinya dengan beberapa perkara dan mengkhususkannya dengan keistimewaan berkat yang diberi Allah kepada beliau. Saiyidina As-Syeikh رَضِيَ اللهُ عَنْهُ berkata kepada mereka: "Jika aku mati maka berpeganglah kamu sekalian dengan Abul Abbas Al-Mursi, sesungguhnya dialah khalifah selepasku dan dia bakal beroleh maqam yang agung antara kamu sekalian lagi dia merupakan satu pintu dari sekian banyaknya pintu Allah Taala.

"Ketika sudah antara waktu maghrib dan isya' Saiyidina As-Syeikh berkata padaku: "Ya Muhammad, isikan bekas dengan air telaga ini untukku," aku mengujar kepada beliau: "Ya Saiyidi, air telaga ini asin, air yang kita bawa baik." Saiyidina As-Syeikh رَضِيَ اللهُ عَنْهُ berkata: "Bawakanlah kepadaku air telaga itu, sesungguhnya kehendakku bukan seperti yang engkau duga." Aku pun membawakan kepada beliau air itu, Saiyidina

lalu minum sedikit darinya dan berkumur-kumur dengannya kemudian meluahkan kembali air yang dikumuri itu ke dalam bekas. Saiyidina As-Syeikh رحمته الله عليه kemudian berkata kepadaku: “Kembalikan air ini ke telaganya,” maka ku tuanglah air itu kembali lalu rasa air telaga itu berubah menjadi tawar dan airnya bertambah banyak dengan izin Allah Taala. Inilah sumber air di tanah bumi itu hingga ke hari kiamat dengan berkat Saiyidina As-Syeikh Abul Hasan As-Syazili رحمته الله عليه.

“Malam itu Saiyidina رحمته الله عليه beradu mengadap kiblat sambil zikir dan merintih-rintih, aku mendengar suaranya menyebut: “Ilahi... Ilahi...” hinggalah hampir fajar menjelma. Apabila masuk waktu sahur beliau diam lalu kami sangka beliau tidur. Kami bercakap dengannya namun tidak dibalas. Kami gerakkan beliau namun tidak bergerak. Kami dapati rupa-rupanya beliau telah meninggal dunia -moga Allah Tabaroka wa Taala merahmatinya, moga Allah meredhoinya dan mencapaikan keredhoan buatnya, moga Allah mengurnia kita manfaat darinya di dunia dan Akhirat, Allahumma amin-.

“Kami pun memanggil Sidi Abul Abbas Al-Mursi رحمته الله عليه maka beliau memandikan Saiyidina kemudian kami mensolatinya dan mengebumikannya di Humaytsara, di tempat ini, di daratan padang pasir ‘Aizab, di lembah yang letaknya di hujung jalan As-So’ied.

“Sesudah pengebumian beliau رحمته الله عليه ahli rombongan berselisih pendapat apakah mahu pulang sahaja atau meneruskan perjalanan.

“Maka berkatalah Saiyidina Abul Abbas Al-Mursi رحمته الله عليه: Bahawa Saiyidina As-Syeikh As-Syazili رحمته الله عليه telah mengarahkan aku naik haji, beliau juga menjanjikan aku mendapat beberapa keramat.” Maka kami pun pergi menunaikan haji dan menyaksikan betapa perjalanan kami begitu lancar, dipermudahkan dan penuh keberkatan. Kemudian kami pulang dengan dampingan beliau رحمته الله عليه dan selepas itu zahirilah Saiyidina Abul Abbas Al-Mursi رحمته الله عليه dengan amat agungnya dan zahir baginya keberkatan yang banyak.”

Sidi As-Syeikh Abul Azaim Madhi رحمته الله عليه berkata: “Aku telah mendengar Saiyidina As-Syeikh As-Syazili رحمته الله عليه berkata: “Allahumma



## Bekalan Murid Ke Jalan Akhirat

bilakah pertemuan itu?,” lalu dikatakan kepadaku: “Wahai Ali, apabila engkau sampai ke Humaytsara di waktu itulah pertemuan.” Saiyidina رحمته الله berkata: “Aku bermimpi melihat diriku seolah-olah dikebumikan di ekor sebuah bukit, bertentangan dengan sebuah telaga yang airnya sedikit lagi masin. Maka terdetiklah sesuatu di hatiku lalu aku mendengar bicara dalam sirrku berkata: “Ya Ali, airnya akan jadi banyak dan tawar.”

Ibnu As-Syeikh Al-Khatib Al-Mufti Al-‘Alim Qadhi Al-Jamaah Abu Ishaq Abdur Rafi رحمته الله تعالى berkata: “Apabila Saiyidina As-Syeikh Abul Hasan As-Syazili رحمته الله bermaksud memulakan perjalanan yang beliau mangkat padanya beliau telah berkata: “Pada tahun ini aku akan mengerjakan haji timbalan...,” maka mangkatlah beliau رحمته الله sebelum sempat menunaikan haji itu. Apabila rombongannya kembali ke Qaherah selepas menunaikan haji mereka ditanya oleh Tuan Mufti ‘Izzuddin bin Abdus Salam رحمته الله lalu dikhabarkanlah kepadanya tentang perkataan Saiyidina As-Syeikh tadi. Mendengarkan itu menangislah tuan mufti seraya berkata kepada mereka: “Saiyidina As-Syeikh As-Syazili رحمته الله telah mengkhabarkan kepada tuan-tuan sekalian tentang kemangkatannya pada permusafiran ini namun tuan-tuan tidak mengetahui isyarat ilmunya. Sesungguhnya beliau telah mengkhabarkan kepada tuan-tuan bahawa malaikat akan menjadi timbalan (ganti)nya menunaikan haji kerana telah datang perkhabaran dalam hadis dari Saiyidina wa Maulana junjungan Nabi صلوات الله وسلاماته عليه:

مَنْ خَرَجَ مِنْ بَيْتِهِ قَاصِدًا لِلْحَجِّ فَمَاتَ قَبْلَ أَنْ يَحُجَّ فَإِنَّ اللَّهَ عَزَّ وَجَلَّ يُوَكِّلُ مَلَكًا يُنُوبُ عَنْهُ فِي الْحَجِّ كُلِّ عَامٍ إِلَى يَوْمِ الْقِيَامَةِ.

*“Barangsiapa yang keluar dari rumahnya dengan maksud pergi haji lalu mati sebelum sempat menunaikan haji, maka sesungguhnya Allah Azza wa Jalla akan mewakilkan satu malaikat baginya yang menjadi timbalannya naik haji untuknya setiap tahun hingga ke Hari Kiamat.”*



Sidi As-Syeikh 'Imaduddin ketua qadhi di Iskandariyyah mengkhobar kepadaku dengan katanya: "Di kota kami ada seorang wanita tidak baik meninggal dunia lalu ada orang bermimpi melihatnya dalam keadaan yang baik, maka ditanyalah kepada wanita itu: "Apa yang Allah lakukan kepadamu?," dia menjawab: "Saiyidina As-Syeikh As-Saiyid Abul Hasan As-Syazili telah meninggal dan dikebumikan di Humaytsara, lalu pada hari meninggalnya itu Allah mengampuni semua kaum Muslimin yang dikebumikan di timur dan barat dunia demi kerana beliau, maka adalah aku termasuk dari kalangan yang diampuni Allah dengan kehormatan Saiyidina As-Syeikh dan demi memuliakannya..." begitulah kata wanita itu dalam mimpi dan ia berlaku ketika Saiyidina As-Syeikh dalam permusafirannya yang terakhir itu. Apabila rombongan haji tiba mereka mengkhabarkan kemangkatan beliau lalu dikira orang harinya dan mendapati tarikhnya benar.

Adapun Saiyidina As-Syeikh Abul Hasan As-Syazili رَحِمَهُ اللهُ تَعَالَى telah wafat pada bulan Syawal tahun 656H dengan usia 63 tahun. Semoga Allah merahmatinya dan mengurnia keredhoan buatnya, semoga Allah mengulang kepada kita dari keberkatan beliau, Allahumma amin.



## Bab 34

### BIOGRAFI SAIYIDINA AS-SYEIKH AS-SYAZILI رحمته الله **DUA LEBUHRAYA PERJALANAN HAKIKAT**

لَا يُكَلِّفُ اللَّهُ نَفْسًا إِلَّا وُسْعَهَا لَهَا مَا كَسَبَتْ وَعَلَيْهَا مَا اكْتَسَبَتْ رَبَّنَا لَا تُؤَاخِذْنَا  
إِنْ نَسِينَا أَوْ أَخْطَأْنَا رَبَّنَا وَلَا تَحْمِلْ عَلَيْنَا إِكْرَامًا كَمَا حَمَلْتَهُ عَلَى الَّذِينَ مِنْ قَبْلِنَا رَبَّنَا  
وَلَا تُحَمِّلْنَا مَا لَا طَاقَةَ لَنَا بِهِ وَاعْفُ عَنَّا وَاعْفِرْ لَنَا وَارْحَمْنَا أَنْتَ مَوْلَانَا فَانصُرْنَا  
عَلَى الْقَوْمِ الْكَافِرِينَ.

"Allah tidak memberati seseorang melainkan apa yang terdaya olehnya. Orang itu mendapat pahala kebaikan yang diusahakannya, dan dia juga menanggung dosa kejahatan yang diusahakannya. (Mereka berdoa dengan berkata): "Wahai Tuhan kami! janganlah Engkau mengirakan kami salah jika Kami lupa atau kami tersalah. Wahai Tuhan kami! Janganlah Engkau bebaskan kepada kami bebanan yang berat sebagaimana yang telah Engkau bebaskan kepada orang-orang yang terdahulu daripada kami. Wahai Tuhan kami! Janganlah Engkau pikulkan kepada kami apa yang kami tidak terdaya memikulnya. Dan maafkanlah kesalahan kami, serta ampunkanlah dosa kami, dan berilah rahmat kepada kami. Engkaulah penolong kami; oleh itu, tolonglah kami untuk mencapai

*kemenangan terhadap mereka yang kafir" Al-Baqarah: 286*

Syeikh nan kamil lagi mursyid dan murobbi kami Saiyidina Abdun Nasir رَضِيَ اللَّهُ عَنْهُ وَأَرْضَاهُ berkata: "Wajiblah kita menulis di alam maya internet (contohnya dalam facebook) siri artikel yang ringkas dan mantap dengan judul

خُذِ الْعَفْوَ وَأْمُرْ بِالْعُرْفِ وَأَعْرِضْ عَنِ الْجَاهِلِينَ.

*"Ambillah kemaafan (yang mudah engkau lakukan), dan suruhlah perkara yang baik, serta berpalinglah (jangan dihiraukan) orang-orang yang jahil (yang degil dengan kejahilannya)".*

buat menangkis serangan golongan degil dan jahil, untuk mematah kegarangan golongan perosak di atas muka bumi serta menewaskan kuasa zalim dan kegelapan dari kalangan ahli engkar dan penentang yang anti majlis khatam Al-Quran, majlis zikir serta majlis selawat dan salam ke atas Saiyidina wa Maulana Muhammad ﷺ.

Allah Taala jua yang Maha Membantu, maha tepat bidikanNya, Maha Menolong, Maha Memberi taufik lagi maha segera bantuanNya. Kepada Allah Subhanahu wa Taala jua kita bermohon penjagaan, kesantunan, redho serta kabul.

Kita teruskan lagi dengan perkhabaran dan ahwal Saiyidina As-Syeikh Abul Hasan As-Syazili رَضِيَ اللَّهُ عَنْهُ. Pada siri kali ini kita akan mulakan dengan takrif Tareqat As-Syaziliyyah yang merupakan maksud dasar pada himpunan siri artikel ini. Inilah materi yang menjadi asas dalam rentetan siri ini walaupun segala yang telah dibentangkan sebelumnya adalah penting dan amat penting untuk mengetahui keperibadian seorang syeikh yang selayaknya diikuti, untuk mengetahui maqam dan martabatnya demi memantapkan kehendak seorang murid pada menjejaki perjalanan syeikh dalam bicaranya, perbuatannya, ahwalnya dan pemikirannya. Daripada Allah jualah datangnya taufik, hidayah dan rahmat.

Ketahuilah wahai murid penuju Allah bahawa jalan tareqat itu



## Bekalan Murid Ke Jalan Akhirat

(yakni tareqat-tareqat sufi Islami dan sunni) walaupun berbagai ragam dan amat banyak namun kesemuanya kembali kepada dua bahagian

Ilmu

Amal

Dan ketahuilah duhai salik (kembara) yang menuju kepada Allah Taala bahawa kaum sufi (ahli Tasawuf Islami yang sunni) mempunyai dua lebuhraya dalam menempuh jarak perjalanan nafsu dan mencapai hakikat: dengan itu mereka terbahagi kepada dua kumpulan:

**Kumpulan Pertama** (Amal) dengan jalan Al-Jala yaitu dengan cara *takhalli* (mengosong) diri dari sifat-sifat mazmumah (sifat tercela) dan *tahalli* (menghias) diri dengan sifat-sifat mahmudah (sifat terpuji). Jalan ini ditempuh dengan cara-cara riyadhah (latihan jiwa) dan *tazkiyatul akhlaq* (pemurnian akhlak).

Kumpulan pertama ini mengambil segala pekerjaan mereka yang berbentuk amal ibadat, wazhifah, wirid dan hizb dari syariat (Islam) dan merekalah as-sufiyyah (kaum sufi). Jika latihan dan pemurniannya tidak dari sumber ini maka itu kelompok *isyraqiyyun* ahli hikmah *ilahiyyin* (di sini kita tidak membincang soal mereka dan mereka tidak ada kena mengena dengan kita).

**Kumpulan Kedua** (Ilmu) dengan cara menggelumangi berbagai ilmu pengetahuan dan mengkaji.

Kumpulan kedua ini jika bersandar kepada syariat (Islam) maka mereka adalah kaum *mutakallimun* (ahli ilmu kalam). Jika tidak maka mereka adalah ahli falsafah, pendeta serta mahaguru pertama mereka adalah Aristotle pengasas ilmu hikmah pengkajian (dan ini juga tiada hubungan dengan kita).

Dengan itu tiada bicara kita pada kedua bahagian yang tidak bersandar kepada syarak dan syariat (Islam), mereka tidak punya apa-apa hubungan jauh atau dekat dengan kita dan kita langsung tiada kena mengena dengan mereka. (Sudahkah tuan puan semua mengerti?).

Yang tinggal dan ada hanyalah pada kedua bahagian yang

bersandar kepada syarak dan syariat (Islam).

Dalam kitab Syarh Al-Mabahits Al-Asliyyah pengarangnya Sidi As-Syeikh Ahmad Zarrouq As-Syazili رَحِمَهُ اللهُ تَعَالَى telah membicarakan kumpulan pertama yang merupakan ahli jalan Al-Jala: “Mereka berkata bahawa an-nafs (jiwa) itu pada asal kejadiannya ibarat cermin yang amat terang dan bersih, jelas gambaran segala apa yang berhadap dengannya dari kewujudan yang lalu dan yang mendatang. Namun cermin ini menjadi rosak jika berlaku padanya satu dari dua perkara:

Sama ada ia berkarat dengan segala macam gambaran alam buana yang melekat padanya secara *syuhud* (penyaksian), *i’timad* (pegangan) dan *istinad* (sandaran).

Atau apabila ia beralih dari maksud asal kepada selainnya baik yang berupa segala macam ilmu pengetahuan, proses dan lain-lain perkara yang apabila terlekap kepada cermin jiwa itu akan mengalih tumpuannya dari maksud yang asal.

Jika an-nafs (jiwa) bersih murni pada masalah pertama nescaya ia dapat melihat dan hijab penghalangnya terangkat. Jika ia menumpukan *tawajjuh* (tujuan dan tumpuan) kepada maksud asalnya pada masalah kedua nescaya ia dapat melihat apa hijab yang menghalangnya. Tapi selagi ia masih tersangkut pada salah satu dari dua masalah ini maka teralihlah dia dari maksud sebenar lalu tidak mungkin ia sampai kepada hakikat.

Atas dasar inilah Sidi As-Sikandari رَحِمَهُ اللهُ تَعَالَى menyebut dalam kitabnya Al-Hikam Al-‘Atho’iyyah:

كَيْفَ يَشْرُقُ قَلْبُ صُورِ الْأَكْوَانِ مُنْطَبِعَةً فِي مِرْآئِهِ؟ أَمْ كَيْفَ يَرْتَحِلُ إِلَى اللَّهِ وَهُوَ مُكَبَّلٌ بِشَهَوَاتِهِ؟ أَمْ كَيْفَ يَطْمَعُ أَنْ يَدْخُلَ حَضْرَةَ اللَّهِ وَهُوَ لَمْ يَتَطَهَّرْ مِنْ جَنَابَةِ غَفَلَاتِهِ؟ أَمْ كَيْفَ يَرْجُو أَنْ يَفْهَمَ دَقَائِقَ الْأَسْرَارِ وَهُوَ لَمْ يَتُبْ مِنْ هَفَوَاتِهِ؟.

“Bagaimana akan bersinarnya satu hati yang berbagai gambaran alam buana tercap pada cerminnya? Atau bagaimana dirinya akan



*kembara menuju Allah sedangkan dia terbelenggu dengan segala syahwatnya? Atau bagaimanakah dia tamak mahu masuk ke hadrat Allah sedangkan dirinya belum bersuci dari janabah kealpaannya? Atau bagaimanakah dia berharap dapat memahami yang seni-seni dari berbagai rahsia sedangkan dia masih belum taubat dari segala kegelincirannya?."*

"Selain mengibaratkan an-nafs (jiwa) seperti cermin kumpulan ini juga mengibaratkannya seperti telaga dan air; mereka mengumpamakan apa yang ada pada jiwa dari segala makrifat dan ilmu seperti telaga dengan airnya. Mereka berkata: Terkadang kadar air di telaga itu naik dan turun, namun yang dapat mengeluarkan airnya ialah apabila ia digali."

Ibarat mereka yang mengumpamakan jiwa dengan telaga adalah soheh. Sesungguhnya an-nafs (jiwa) itu sudah tajalli (tersingkap) padanya segala hakikat dan ilmu di hari perjanjian dengan Tuhan

وَإِذْ أَخَذَ رَبُّكَ مِنْ بَنِي آدَمَ مِنْ ظُهُورِهِمْ ذُرِّيَّتَهُمْ وَأَشْهَدَهُمْ عَلَى أَنْفُسِهِمْ أَلَسْتُ بِرَبِّكُمْ قَالُوا بَلَى شَهِدْنَا أَنْ تَقُولُوا يَوْمَ الْقِيَامَةِ إِنَّا كُنَّا عَنْ هَذَا غَافِلِينَ.

"Dan (ingatlah wahai Muhammad) ketika Tuhanmu mengeluarkan zuriat anak-anak Adam (turun-temurun) dari (tulang) belakang mereka, dan Dia jadikan mereka saksi terhadap diri mereka sendiri, (sambil bertanya dengan firmanNya): "Bukankah Aku Tuhan kamu?" mereka semua menjawab: "Benar (Engkaulah Tuhan kami), kami menjadi saksi". Yang demikian supaya kamu tidak berkata pada hari kiamat kelak: "Sesungguhnya kami adalah lalai (tidak diberi peringatan) tentang (hakikat) ini" **Al-A'raaf: 172**

Namun segala waham dan sebab yang mendatangi selepas itu boleh jadi membuat ia tercengang dari hakikat lalu tenggelam surutlah ia (parasnya jatuh) seperti surut paras air di telaga. Apabila begitu ia perlu kepada proses cangkul (penggalan) mujahadah dan sekop (sodok pembersihan) riyadhah supaya air kembali membuak (paras air

naik) kepada tahap sebelumnya atau lebih baik lagi.

Kumpulan yang mengambil jalan Al-Jala ini turut dinamakan sebagai *Tareqah Al-Isyraq* (jalan pemancaran) yang bernisbah kepada sufi Islam yang sunni, mereka sepakat mendasarkan bahawa merawat asal yaitu merawat segala penyakit jiwa itu lebih dekat kepada kesembuhan kerana apabila yang asal putus maka putuslah cabangnya. Ini berbeza jika yang dirawat adalah cabang.

Adapun rawatan pula bererti mengetahui ubat penyembuh, ia pula takkan betul melainkan setelah mengetahui apa sakitnya. (Sebab inilah amat penting kewujudan tabib yang mahir, yaitu peribadi yang telah menempuh segala jarak perjalanan ini. Peribadi itu adalah seorang syekh mursyid murobbi yang kamil, kewujudan peribadi sebegini adalah nadir -moga Allah meredhoinya dan mencapaikan keredhoan buatnya, semoga Allah mengurnia kita manfaatnya tidak kira di mana dia dan di sisi siapa dia-).

Dan ketahuilah tuan-puanku sekalian bahawa asal segala sakit dan penyakit jasmani adalah rosaknya resmi jiwa yang akhirnya mengakibatkan perbuatan dan emosi insan tidak seperti pembawaan yang normal.

Dan lagi bahawa asal segala sakit dan penyakit hati pula adalah rosaknya maksud tujuan yang bertolak dari redho terhadap nafsu, akhirnya mengakibatkan perbuatan dan emosi insan tidak berjalan di atas landasan syarak dan hakikat, sebaliknya mengikut hawa nafsu dan segala waham batil yang menjadikan diri lemah keyakinan, rosak agama dan cacat keagamaan.

Rawatan nafsu/jiwa ialah dengan menahannya dari keinginan yang tidak baik serta alpa hingga ia tidak terjerumus ke dalam keinginan itu. Dalam masa yang sama nafsu harus disucikan dari segala keterjerumusannya yang lalu sehingga bersih.

Menahan diri dari keinginan nafsu adalah dengan sifat taqwa dan istiqamah hingga hilanglah keinginan itu. Manakala yang kedua mensucikan nafsu adalah dengan taubat dan inabah sehingga berbekas



### Bekalan Murid Ke Jalan Akhirat

pada jiwa dan terwarna ia dengan segala kelaziman taqwa dan istiqamah serta mengambil faedah dari hemah dan hal.

Maka hendaklah engkau mengikut sunnah tanpa penambahan dan pengurangan, ertinya dengan kesungguhan yang disertai iltizam terhadap kejujuran. Allah Taala jua yang mengurnia taufik.





## Bab 35

### BIOGRAFI SAIYIDINA AS-SYEIKH AS-SYAZILI رَحْمَةُ اللَّهِ عَلَيْهِ **RAHSIA IKHLAS**

**T**uan-puanku para muridin dan muridat yang terhormat. Moga sepanjang tahun kehidupanmu diiringi kebaikan, kesihatan, madad dan istiqamah. Allahumma amin, perkenankanlah bagi kami sekalian.

Kita menyambung lagi bicara pada siri ini. Dalam satu permusafiran bersama Saiyidina As-Syeikh Al-Kamil Abdun Nasir رَضِيَ اللَّهُ عَنْهُ وَأَرْضَاهُ kami didatangi satu kumpulan yang mahu masuk perjalan tareqat menuju Allah disamping banyak soalan yang ingin mereka tanyakan. Saiyidina pun bermuzakarah panjang dengan mereka, kami semua gembira dengan kembara sebegini. (Dikata orang dan moga Allah meredhoi orang yang mengucapkannya: “Kembara dan suhbah (berdamping) adalah roh tareqat”).

Kumpulan itu kemudian bertanya Saiyidina tentang ikhlas dan pengertiannya? Maka terperinci bicara beliau mengenainya dengan panjang lebar dan menutupnya dengan ayat suci:

وَإِنَّ لَكُمْ فِي الْأَنْعَامِ لَعِبْرَةً نُّسْقِيكُم مِّمَّا فِي بُطُونِهِ مِنْ بَيْنِ فَرْثٍ وَدَمٍ لَبَنًا خَالِصًا  
سَائِغًا لِلشَّارِبِينَ.



## Bekalan Murid Ke Jalan Akhirat

*“Dan sesungguhnya pada binatang-binatang ternak itu, kamu beroleh pelajaran yang mendatangkan iktibar. Kami beri minum kepada kamu daripada apa yang terbit dari dalam perutnya, yang lahir dari antara hampas makanan dengan darah; (yaitu) susu yang bersih murni, yang mudah diminum, lagi sedap rasanya bagi orang-orang yang meminumnya”* **An-Nahl: 66**

Saiyidina رَضِيَ اللهُ عَنْهُ mengujar: “Tuhan kita mahu kita ikhlas dalam setiap amalan kita

إِنَّا أَنْزَلْنَا إِلَيْكَ الْكِتَابَ بِالْحَقِّ فَاعْبُدِ اللَّهَ مُخْلِصًا لَهُ الدِّينَ.

*“Sesungguhnya Kami menurunkan Al-Quran ini kepadamu (wahai Muhammad) dengan membawa kebenaran; oleh itu hendaklah engkau menyembah Allah dengan mengikhlaskan segala ibadat dan bawaanmu kepadaNya”* **Az-Zumar: 2**

“Allah telah mengumpamakan keikhlasan dengan susu. (Dalam Bahasa Arab asal nama susu adalah laban, namun lebih masyhur dengan sebutan halib). Bagaimana susu ini keluar dari perut binatang ternak dalam keadaan suci murni dari warna darah dan bau najis hingga kita dapat menerima dan meminumnya.

Ujar Saiyidina: “...Demikianlah Allah Taala mahu dari kita melakukan amal soleh yang suci murni (ikhlas) tanpa sebarang kerosakan, tanpa bau nafsu, tanpa najis dan warna Syaitan yang mahu merosakkan amal soleh demi Allah Taala itu

قُلِ اللَّهُ أَعْبُدُ مُخْلِصًا لَهُ دِينِي.

*“Katakanlah lagi: “Allah jualah yang aku sembah dengan mengikhlaskan amalan ugamaku kepadaNya.”* **Az-Zumar: 14**

Kita teruskan lagi bicara mengenai takrif Al-Madrasah As-Salafiyyah Lis-Saadah As-Syaziliyyah As-Sufiyyah Al-Islamiyyah As-Sunniyyah yang diasaskan oleh Saiyidina As-Syeikh Al-Kamil Abul

Hasan As-Syazili رَضِيَ اللَّهُ عَنْهُ وَأَرْضَاهُ.

Adapun kumpulan kedua: Ahli jalan pengkajian dan ilmu pengetahuan. Mereka berkata: “Sesungguhnya [jiwa] apabila mendapatkan ilmu dari luar dirinya (dengan menuntut ilmu) maka ini lebih tinggi nilai.” Kumpulan ini memasukkan ilmu dalam terminologi tareqat mereka, kata mereka lagi: “Manakah dapat dibuka pintu jika bukan dengan anak kuncinya.” Mereka merawat an-nafs (jiwa) dengan jalan ilmu dan amal, yang demikian itu adalah kerana cahaya yang sedia ada dalam jiwa akan bertambah kuat dan kukuh dengan [cahaya] yang mendatangnya dari luar, ia seterusnya melakukan proses pembersihan dan penyucian terhadap kegelapan yang datang kepada asal (dalam jiwa) dan cabang (anggota lahir).

“Jalan tarekat kedua ini adalah lebih menyeluruh pada menghasilkan kesempurnaan kerana jalan yang pertama matlamatnya ialah wushul (mencapai) kesempurnaan jiwa yang asalnya memang sedia ada dalam diri insan tanpa tambahan lain, berbeza dengan jalan kedua ini yang mensasarkan penghasilan berganda disamping apa yang sedia ada [dalam jiwa], inilah makna keadaannya lebih tinggi nilai.

“Tho’ifah ini رَضَوَانُ اللَّهِ عَلَيْهِمْ أَجْمَعِينَ berkata: ‘Sesungguhnya ilmu merupakan anak kunci futeh kerana junjungan Saiyidina wa Maulana Muhammad ﷺ telah bersabda:

الْعِلْمُ إِمَامُ الْعَمَلِ وَالْعَمَلُ تَابِعُهُ.

“Bermula ilmu itu imam amalan dan amalan itu pengikutnya.”

Lagi telah bersabda Baginda junjungan عَلَيْهِ أَفْضَلُ الصَّلَاةِ وَأَزْكَى السَّلَامِ:

إِنَّمَا الْعِلْمُ بِالتَّعَلُّمِ وَإِنَّمَا الْحِلْمُ بِالتَّحَلُّمِ وَمَنْ يَطْلُبُ الْخَيْرَ يُؤْتِهِ وَمَنْ يَتَّقِ الشَّرَّ يُوقِهِ وَمَنْ عَمِلَ بِمَا عَلِمَ أَوْرَثَهُ اللَّهُ عِلْمَ مَا لَمْ يَعْلَمْ.

“Sesungguhnya ilmu itu dengan belajar dan sesungguhnya kesantunan itu dengan menyantuni. Barang siapa menuntut kebaikan



## Bekalan Murid Ke Jalan Akhirat

*akan diberi, barang siapa mengelak kejahatan akan dijaga darinya dan barangsiapa beramal dengan apa yang dia tahu Allah akan mewariskan baginya ilmu yang dia belum tahu.”*

Adapun ilmu-ilmu yang diperlukan oleh seorang murid penuju Allah dan penempuh jalan Akhirat ialah empat:

Ilmu zat dan sifat.

Ilmu feqah.

Ilmu tafsir dan ilmu hadis.

Ilmu hal dan ilmu munazalat serta apa yang berlaku pada keduanya dari segala adab dan mu’amalat (ilmu yang keempat ini juga diistilahkan sebagai ilmu Tasawuf dan Fiqhul Qulub yaitu pengetahuan mengenai segala tingkatan dan maqam nafsu).

Ilmu zat dan sifat ertinya ilmu tauhid. Jalan mengambilnya ialah dengan mentahqiq aqidah yang murni, contohnya seperti yang terkandung dalam risalah aqidah Saiyidina Al-Imam Al-Ghazali رحمته الله.

Maka hendaklah si murid mengambil ilmu ini berserta dalil keterangannya dengan mana-mana wajah yang mudah baginya tanpa perlu menilik pada syubahat bantahan yang berbagai dan permasalahan, hendaklah dia loba mengambil segala materi itu dari Al-Quran, As-Sunnah, bukti yang ada pada kewujudan, petunjuk dari alam ciptaan dan lain-lain.

Hendaklah dia sungguh-sungguh mempelajari ilmu ini hingga terwarna ia dan tercap hakikatnya pada dirinya dengan sabit yang memberi yakin dan lazat di sanubari. Apabila itu berlaku maka berterusanlah jiwa mengembara dalam makna itu hingga ke sempadan yang telah diagihkan untuknya tanpa henti. Dia akan terus menjalaninya dengan penuh keberkatan. Keadaan ini diketahui oleh seorang kembara penuju Allah dalam perjalanannya maka tidak perlulah dibentangkan di sini.

Adapun ilmu feqah maka jalannya ialah mengambilnya dari para

imam feqah yang muktabar di waktunya (ertinya hendaklah si murid penuju Allah mempelajari ilmu feqah dari satu tokoh kalangan empat mazhab yang kewujudan mereka sekarang sedikit namun Insya Allah masih ada di tiap negeri dan perlu mencarinya). Hendaklah si murid menuntut ilmu ini dengan tulus hingga dia dapat menguasai bab-babnya dan segala akadnya tanpa berlebih-lebihan.

Kerana penambahan ketika menuntut ilmu-ilmu dasar akan memberatkan otak. Lalu apabila seorang murid mengerti hakikat ini [setelah mendapat yang dasar] dirinya akan suka untuk menuntut yang lebih luas; berbagai sisi pandangan dan kesamaan dengan wajah yang ringan, kemudian ta'alil (berbagai faktor) dan hukum. Dari sini si murid pun mengetahui berbagai materi kewujudan dengan bermacam wajahnya serta bagaimana Allah yang Maha Benar melakukan tindakanNya pada segala yang wujud ini dengan taklif (pertanggung jawaban terhadap hukum hakam Allah) dan takrif (mengenal Allah) kerana kedua-duanya saling kait mengait.

Maka di ufuk hati si murid akan muncul takzim dan pengagungan kepada yang maha layak menerimanya dengan menguntukkan hatinya untuk itu dan bukan untuk yang tidak berkenaan, si murid juga tidak hanya menangani apa-apa yang berkait dengan segala masalah ilmiah semata-mata. Walaupun begitu mencapai tahap ini adalah sukar terutama bagi yang tidak punya hemah. Moga perkara ini difahami.

Adapun yang dimaksudkan dengan ilmu hadis pula adalah pengertian dan pemahamannya, bukan bentuk penyampaian dan tatacara ambilannya. Penguasaan ilmu hadis akan menuntut pembelajaran ilmu tafsir. Kedua ilmu hadis dan tafsir inilah yang terzahir dengannya segala hakikat cahaya beserta dua ilmu yang sebelumnya (tauhid dan feqah).

Orang yang mengaji hadis hingga tahap memahami berbagai sumber ambilan hukum dan hikmah merupakan satu pencapaian yang indah dan bagus, namun dia tidak boleh keluar dari maqasid (tujuan dan ketetapan) para imam agama, bahkan harus rujuk kepada mereka pada segala perkara kecil apa lagi perkara besar.



Dia hendaklah berpegang teguh kepada nas yang manqul (bersifat wahyu) dan tidak boleh meminda hukum hakam yang ma'qul (bersifat rasional), begitu juga tidak boleh meringan-ringankan yang manqul tadi. Sikapnya terhadap semua ini adalah seperti yang dikatakan ulama: “Berhentilah di mana mereka berhenti, kemudian tafsirkanlah dari situ.”

Barang siapa mengambil ilmu hal (realiti semasa) dari nas para imam maka nur dan futuhnya datang dari mereka. Barangsiapa mengambil langsung dari nas Al-Quran dan As-Sunnah pun begitu jika dia benar ahli tahqiq. Namun ini adalah maqam yang amat tinggi lagi terlalu mahal di mana tiada ketamakan peluang padanya bagi orang-orang yang kotor dengan sikap membantah, engkar, ujub, suka kemasyhuran dan pangkat kedudukan.

Sebaliknya ilmu hadis itu jika diambil oleh orang bukan alim akan menjadi musibah, kegelinciran dan lubang besar yang boleh jadi sampai mengeluarkannya dari agama dan umat tanpa sedar, kasihan si anu yang begini keadaannya tapi dia menyangka dirinya betul. Inilah yang malang sekali telah berlaku di zaman kita kepada mereka yang belajar di pengkhususan hadis kalangan graduan berbagai universiti. Hati-hatilah, fahamilah dan hentikanlah.

Siapa yang lepas dari mengikut jejak para pendahulu nescaya lepaslah dia dari mendapat petunjuk. Kerana itulah engkau tidak mendapati ada imam yang mengenepikan kaul para salaf (pendahulu di kalangan umat) bahkan yang ada ialah para imam menjejaki peninggalan salaf. Barang siapa yang bergelumang dengan Al-Quran, Sunnah serta fiqh (pemahaman) kedua-duanya nescaya mengerti perkataan yang kami nukil di sini.

Adapun ilmu hal dan ilmu munazalat serta apa yang berlaku pada keduanya dari segala adab dan mu'amalat (interaksi) maka itulah bidang pengkhususan ahlinya yaitu para junjungan kamu sufi Islami yang Sunni yang berbagai tareqatnya. Inilah bidang yang kami bicarakan terus-menerus dan takkan kami diam hinggalah dikehendaki Allah dalam siri artikel kami Bekalan Murid Ke Jalan Akhirat (pengembara jalan Akhirat). Bermula perkara ini ditempuh oleh manusia dengan dua

jalan:

Jalan melihat Al-Haq sejak dari langkah pertama dan melaksanakan konsep ini dengan sungguh-sungguh, hemah dan penuh bertenaga. Inilah dia jalan para junjungan As-Syaziliyyah dan tokoh-tokoh yang meneladani perjalanan mereka dari karangan junjungan yang agung رِضْوَانُ اللَّهِ عَلَيْهِمْ أَجْمَعِينَ.

Jalan melihat an-nafs (jiwa) dan mengenalnya dengan tujuh maqamnya, dan percaya betapa Allah Al-Haq itu maha meniliknya, dan melaksanakan konsep ini. Inilah dia jalan Saiyidina Al-Imam Al-Ghazali dan para peneladannya dari kalangan junjungan agung رِضْوَانُ اللَّهِ عَلَيْهِمْ أَجْمَعِينَ.

Kedua jalan yang disebutkan tadi masing-masing menyandarkan konsep mereka kepada hadis:

أَنْ تَعْبُدَ اللَّهَ كَأَنَّكَ تَرَاهُ

*“...bahawa engkau beribadah kepada Allah seolah-olah engkau melihatNya”*

...ini adalah sandaran golongan jalan pertama yaitu As-Syaziliyyah,

فَإِنْ لَمْ تَكُنْ تَرَاهُ فَإِنَّهُ يَرَاكَ.

*“...jika engkau tiada melihatNya maka sesungguhnya Dia melihatmu”*

...dan ini pula sandaran golongan jalan kedua. Fahamilah, moga engkau gembira dan beroleh laba.

Bermula jalan menuntut ilmu dan rawatan an-nafs (jiwa) beserta segala kelengkapannya ini dinamakan sebagai *tareqah al-burhan* (jalan keterangan yang nyata) kerana terangnya itu hingga tak dapat dipersoalkan oleh sesiapa dan lagi kesesatan tak dapat menyelinap



## Bekalan Murid Ke Jalan Akhirat

masuk kepadanya. Cuma jalan ini takkan mampu ditempuh melainkan oleh para tokoh besar -moga Allah meredhoi mereka dan mengurnia kita dari kemanfaatan mereka senantiasa selama-lama-.

Adapun suluk (tarbiyyah) untuk orang awam pada jalan ini ialah dengan membetulkan iktiqadnya kepada seorang alim yang dipercayai pada agamanya. Sayogia bagi murid menuntut ilmu hal dirinya kepada si alim sekira-kira sempurna [perbekalannya] dan puas hatinya, lagi hendaklah dia melazimi taqwa dan istiqamah dengan sehabis kuasanya sesudah memerhati dengan saksama terhadap apa yang berkenaan dengan halnya.

Tidaklah sayogia baginya untuk masuk meneliti kepada soal yang punya kemungkinan dan takwil. Dia juga tidak patut mengikut kaul imam muhtabar yang bukan imamnya, dia harus mengikut imamnya saja dan tidak boleh mencampur aduk dan mengkucar-kacir.

Kemudian hendaklah si murid ini bersandar dalam ahwal [perjalanan]nya kepada seorang syeikh yang benar-benar memberi nasihat, atau saudara yang soleh yang telah berpengalaman dalam perjalanan menuju Allah. Demikianlah jika si murid tidak beroleh syeikh mursyid maka kepada saudaranya yang soleh inilah dia mengambil panduan dalam melakukan sesuatu atau meninggalkannya.

Sebaliknya jika dia beroleh syeikh mursyid maka syeikhlah yang lebih tahu akan hal si murid, syeikh akan menjuruskan si murid kepada bentuk suluk berdasarkan tahap kesesuaiannya sama ada kepada jalan yang pertama, atau jalan ini, atau menghentikannya pada perhentian adab, atau apa-apa yang terzahir padanya dari yang demikian itu.





## Bab 36

### BIOGRAFI SAIYIDINA AS-SYEIKH AS-SYAZILI رَحْمَةُ اللهِ عَلَيْهِ HIKMAH SYEIKH DAN ZAWIYAH

**K**ita sambung lagi bicara pada siri kali ini. Dalam satu kesempatan kami sekumpulan muridin menyertai kembara, suhba (dampingan) dan permusafiran bersama Saiyidina As-Syeikh Al-Kamil As-Syarif Al-Hasani Abdun Nasir Al-Jaza'iri As-Syazili رَضِيَ اللهُ عَنْهُ وَأَرْضَاهُ.

Beliau رَضِيَ اللهُ عَنْهُ mengujar kepada kami: “Seorang syeikh tarbiyyah itu umpama ratu lebah...

وَأَوْحَىٰ رَبُّكَ إِلَى النَّحْلِ أَنِ اتَّخِذِي مِنَ الْجِبَالِ بُيُوتًا وَمِنَ الشَّجَرِ وَمِمَّا يَعْرِشُونَ.  
ثُمَّ كُلِي مِن كُلِّ الثَّمَرَاتِ فَاسْلُكِي سُبُلَ رَبِّكَ ذُلًّا يَخْرُجُ مِنْ بُطُونِهَا شَرَابٌ  
مُّخْتَلَفٌ أَلْوَانُهُ فِيهِ شِفَاءٌ لِلنَّاسِ إِنَّ فِي ذَلِكَ لَآيَةً لِّقَوْمٍ يَتَفَكَّرُونَ.

“Dan Tuhanmu memberi ilham kepada lebah: “Hendaklah engkau membuat sarangmu di gunung-ganang dan di pokok-pokok kayu, dan juga di bangunan-bangunan yang didirikan oleh manusia. Kemudian makanlah dari segala jenis bunga-bunga dan buah-buahan (yang engkau sukai), serta turutlah jalan-jalan peraturan Tuhanmu yang diilhamkan dan dimudahkannya kepadamu”. (Dengan itu) akan keluarlah dari dalam badannya minuman (madu) yang berlainan warnanya, yang mengandungi penawar bagi manusia (dari berbagai-bagai penyakit). Sesungguhnya pada yang



demikian itu ada tanda (yang membuktikan kemurahan Allah) bagi orang-orang yang mahu berfikir” **An-Nahl: 68-69**

Di peringkat mula ratu lebah akan mengasaskan sarangnya, dan syeikh mengasaskan zawiyah pertamanya kemudian zawiyah demi zawiyah, kemudian datanglah lebah dan demikianlah para muridin berdatangan

وَأَذِّنْ فِي النَّاسِ بِالْحَجِّ يَأْتُوكَ رِجَالًا

"Dan serukanlah umat manusia untuk mengerjakan haji, nescaya mereka akan datang kepadamu dengan berjalan kaki..." **Al-Hajj: 27**

mereka melazimi zikir, ilmu, amal, cinta, mahhabah, muzakarah dengan penuh adab dan kasih sayang sesama mereka, tanpa hasad dengki, tanpa sombong, tanpa ujub dan tanpa mengambil kesempatan.

Semua mereka berada di dalam kerajaan lebah dan di zawiyah

فِيهِ رِجَالٌ يُحِبُّونَ أَنْ يَتَطَهَّرُوا وَاللَّهُ يُحِبُّ الْمُطَهَّرِينَ

"...di dalamnya ada orang-orang lelaki yang suka membersihkan (mensucikan) dirinya; dan Allah mengasihi orang-orang yang membersihkan diri mereka (zahir dan batin)" **At-Taubah: 108**

masing-masing tahu apa kerjanya dan tugasnya, kemudian terhasillah untuk kita madu yang lazat, baik, penawar dan penyembuh dari sarang dan rumah lebah madu. Demikianlah terbentuknya muridin dan muridat sebagai para rijal

مِنَ الْمُؤْمِنِينَ رِجَالٌ صَدَقُوا مَا عَاهَدُوا اللَّهَ عَلَيْهِ فَمِنْهُمْ مَّنْ قَضَىٰ نَحْبَهُ وَمِنْهُمْ مَّنْ يَنْتَظِرُ وَمَا بَدَّلُوا تَبْدِيلًا

*“Dikalangan mereka yang beriman itu, ada golongan rijal yang bersikap benar menunaikan apa yang telah dijanjikannya kepada Allah; maka di antara mereka ada yang telah selesai menjalankan janjinya itu, dan di antaranya ada yang menunggu giliran; dan mereka pula tidak mengubah (apa yang mereka janjikan itu) sedikitpun”* **Al-Ahzaab: 23**

Kita teruskan lagi bicara pentakrifan Al-Madrasah As-Salafiyyah Lis-Saadah As-Syaziliyyah As-Sufiyyah Al-Islamiyyah As-Sunniyyah yang diasaskan oleh Saiyidina As-Syeikh Al-Kamil Abul Hasan As-Syazili رَضِيَ اللَّهُ عَنْهُ وَأَرْضَاهُ.

Telah dikata orang -semoga Allah meredhoi siapa yang mengucapkannya-: “Jalan menuju Allah Tabaroka wa Taala atau jalan Akhirat itu tiga bahagian: dan umat manusia itu kerana berbeza-beza ahwal mereka menjadi tiga bahagian, setiap satu ada jalannya sendiri:-

**Bahagian Pertama:** Golongan yang mempunyai mood/resmi jiwa yang berat dan tidak segera dalam memahami. Mereka payah menerima ajaran serta sulit untuk mengerti ungkapan dan kata yang seni-seni.

Golongan ini jalan mereka adalah amal ibadat; membanyakkan puasa, solat, tilawah Al-Quran, haji, jihad dan lain-lain amalan zahir. Faktornya ialah kerana kumpulan ini badannya teguh, anggotanya kuat dan jiwanya keras lalu mampu menanggung kesusahan dan keletihan dari ibadah tanpa rasa jemu darinya, bahkan akhirnya menjadi biasa dengan diri mereka dan menjadi adat.

Orang yang menempuh jalan ini terus beramal dengan silibusnya lalu meningkat hingga ke mikraj yang tertinggi sampailah moodnya yang berat menjadi seni. Dengan itu dia mendekati bulatan tengah yang merupakan tempat turunnya segala makrifat, lalu di situ akan tersingkaplah baginya subuhat al-mahbub (yaitu sifat-sifat kesucian bagi Allah Taala dan bukti-bukti kekuasaanNya yang terkandung dalam syariat) dan melihat keajaiban segala yang ghaib, dengan itu batinnya jadi luas dan terus meluas hingga dapat menampung apa



## Bekalan Murid Ke Jalan Akhirat

yang tak dapat ditanggung akal, di situlah dia dapat mengalu-alukan segala sirr yang indah-indah. Adapun jalan ini amat payahnya, orang yang sampai dari jalan ini hampir-hampir dikatakan seorang dua.

**Bahagian Kedua:** Golongan yang cerdik kefahaman, segera dan cepat mengerti, akhlaknya mulia, kerangka dirinya nurani, nafsunya ummiy (genuine lagi murni), jiwa mereka memang tertuju kepada yang empunya segala kedudukan dan martabat.

Mereka yang berada di bahagian ini terbelenggu pada syuhud (penyaksian) segala ikatan sebab dan alasan, ketika marah mereka tidak dapat mengawal diri.

Adapun jalan mereka ialah dengan berbagai mujahadah dan riadhah, penukaran akhlak, pemurnian jiwa dan menjalankan usaha-usaha pengimarah batin.

Para penempuh jalan ini terus melakukan proses menjinakkan diri (melalui berbagai cara pemurnian jiwa) untuk mencabut segala akhlak buruk yang telah tercap pada jiwa mereka hinggalah hilang tabiat-tabiat itu lalu jiwanya kembali kepada fitrah yang sejahtera.

Yang menjadi paksi dalam urusan ini ialah sikap menyalahi kehendak nafsu dan menolak keinginannya sampai ke tahap sama baginya antara redho, marah dan kerehatan, sama baginya martabat kewalian dengan tidak wali, sama baginya ketinggian dan merendah diri, sama baginya menjalankan usaha dengan tidak melakukannya melalui penolakan segala kerja tangan dan sebab. (Ertinya semua itu bagi diri salik tahap ini ada dan tiadanya adalah kerana Allah jua dan tidak kerana selainNya).

Apabila itu berlaku jiwa akan jadi amat bersih dari segala penyakitnya, jiwa yang sebegini bersih layak menerima segala kebenaran hakikat serta menjadi ahli 'inayah dan pilihan Tuhan. Jalan ini lebih tinggi kedudukan dari jalan sebelumnya dan para penempuhnya yang berjaya adalah tokoh-tokoh besar.

Berbanding para salik yang mengikut jalan lain maka para

penempuh jalan ini lebih banyak ibadatnya, tempuh perjalanan mereka lebih singkat, para tokoh yang menonjol di jalan ini adalah lebih tersohor menjadi guru-guru mursyid.

**Bahagian Ketiga:** Golongan yang jiwanya di maqam redho, akalanya murni, fitrahnya siddiq (tulus). Lazimnya insan dari golongan ini bentuk badannya ramping dan pertengahan (tidak terlalu besar dan tidak terlalu kecil), sempurna zauq (citarasa)nya, amat santun dan budiman.

Golongan ini jalan mereka ialah jalan kembara menuju Allah yang terbang ke hadratNya, yaitu jalan ahli mahabbah yang suluk (tarbiyyah) nya kepada Allah dengan dengan cara jazbah. Paksi pada perjalanan ini ialah kemurnian hati, kejujuran cinta, tahqiq pada zahir dan batin dalam perlaksanaan syiar-syiar tasdiq lalu keluarlah dia dari daya dan upaya diri, keluar dari akal dan kecerdikan hingga ke tahap jika dituntut darinya mengorbankan sesuatu yang paling berharga pada dirinya nescaya dia dapat melaksanakan tuntutan itu tanpa serba salah (dilakukan tuntutan itu tanpa mengungkit jasa, dengan senang hati dan tanpa makar atau tipu daya). Maka dalam keadaan itu akan ditiupkan kepadanya hembusan dari ruh qalbil 'iyan dan tahqiqulah dia dengan firman Allah Subhanahu wa Taala:

كُلُّ مَنْ عَلَيْهَا فَانٍ

*"Segala yang ada di muka bumi itu akan binasa..."* **Ar-Rahman: 26**

Jalan ketiga ini adalah amat mudah bagi ahlinya yang memang telah dipinang untuk menjadi para pendamping Allah di hadratNya nan indah. Seorang kembara di jalan ini boleh jadi sampai kepada tujuan dalam satu detik atau lebih singkat dari itu

وَمَا ذَلِكَ عَلَى اللَّهِ بِعَزِيزٍ

*"Dan yang demikian itu tidaklah sukar bagi Allah melakukannya..."*

**Saiyidina Ibrahim: 20**



...lalu demikianlah salik di jalan ini dapat mendahului mereka yang sampai dengan jalan mujahadah (berhempas pulas) dan berpenat lelah.

...قُلْ إِنَّ الْفَضْلَ بِيَدِ اللَّهِ يُؤْتِيهِ مَنْ يَشَاءُ وَاللَّهُ وَاسِعٌ عَلِيمٌ. وَاللَّهُ يَخْتَصُّ بِرَحْمَتِهِ مَنْ يَشَاءُ وَاللَّهُ ذُو الْفَضْلِ الْعَظِيمِ.

*"...Katakanlah (wahai Muhammad): "Sesungguhnya limpah kurnia itu adalah di tangan Allah, diberikanNya kepada sesiapa yang dikehendakiNya; dan Allah Maha Luas limpah kurniaNya, lagi meliputi pengetahuanNya. Allah menentukan pemberian rahmatNya itu kepada sesiapa yang dikehendakiNya; dan (ingatlah), Allah mempunyai limpah kurnia yang besar" Aali Imran: 73-74*

Tiga bentuk perjalanan yang telah disebutkan tadi beserta cabang-cabangnya kesemuanya menyampaikan kepada tujuan dan menghantar kepada matlamat, cuma antara jalan-jalan itu ada yang lebih sulit, ada yang lebih panjang dan ada pula yang lebih dekat dan lebih mudah.

[Di sinilah peranannya] seorang syeikh mursyid yang alim dalam menangani rawatan jiwa dan pakar terhadap sifat-sifat nafsu dan sikap akan menjalankan murid pada silibus perjalanan yang lurus (yang sesuai dengan bahagian si murid). Dengan tarbiyyah syeikh mursyid akan merawat murid yang kerugian, pemalas dan tergendala lalu mengembalikan mereka ke jalan yang paling baik dengan syarat bahawa murid itu sanggup menerima tarbiyyah dan menyerahkan diri kepada Syeikh tanpa bertangguh-tangguh, tanpa mentakwil dan tanpa buruk sangka terhadap beliau.

Demikian itu adalah kerana nafsu/jiwa insani merupakan cerminan kepada tajalliyat ar-robhaniyyah, maka sejauh mana karat dan kelam pada cermin (jiwa si murid) itulah seorang syeikh murobbi akan melakukan proses membersihkan dan menggilapnya.

Maka janganlah engkau [duhai murid] terkalah kepada gentar dan kepayahan yang amat, atau hilang sabar (dalam menempuh dugaan) kerana Allah yang Maha Benar itu terlebih dekat kepadaMu dari urat

lehermu sendiri...

وَلَقَدْ خَلَقْنَا الْإِنْسَانَ وَنَعْلَمُ مَا تُوَسْوِسُ بِهِ نَفْسُهُ وَنَحْنُ أَقْرَبُ إِلَيْهِ مِنْ حَبْلِ  
الْوَرِيدِ.

*“Dan demi sesungguhnya Kami telah mencipta manusia dan Kami  
sedia mengetahui apa yang dibisikkan oleh hatinya, sedang  
(pengetahuan) Kami lebih dekat kepadanya daripada urat lehernya”*

#### **Qaaf: 16**

Sidi As-Syeikh Tajuddin Ahmad bin Atho’illah As-Sikandari As-Syazili رَضِيَ اللَّهُ عَنْهُ وَأَرْضَاهُ menyatakan dalam kitabnya Latho’iful Minan:

“Adapun dasar tareqat Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ ialah al-jam’u (menghimpun jiwa raga) kepada Allah tanpa tafriqah (tercaing-caing) serta melazimi khalwah dan zikir. Setiap murid beliau akan diberi didikan yang sesuai dengan jiwa si murid dan dipimpin menempuh jalan suluk yang serasi dengan diri si murid itu.

“Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ telah menyuruh para sahabat (murid)nya dengan kata beliau: “Antara sisi kesempurnaan adab seorang syeikh itu ialah dia membahasakan para murid sebagai sahabatnya, adapun antara sisi kejujuran murid pula ialah dia mencintai syeikh dan mentakzim beliau sebagai bapa, syeikh, mursyid, murobbi dan bukan sebagai kawan....” Lalu sudahkan tuan-tuan mengerti apa yang dimaksudkan al-jam’u (menghimpun jiwa raga) kepada mahabbahnya... (di sini terdapat isyarat yang halus dan rahsia yang seni yang tidak boleh diberi perinciannya).

“Saiyidina As-Syeikh As-Syazili رَضِيَ اللَّهُ عَنْهُ tidak menyuruh siapa pun untuk meninggalkan pekerjaan, pertukangan atau perniagaan masing-masing, bahkan beliau mengajarkan si murid itu jalan tareqat sedang si murid kekal dengan kerjayanya. Kata beliau: “Marilah engkau bersama kami dengan hatimu walau engkau jauh dengan jasadmu, nescaya apa yang sudah dibahagikan Allah untukmu akan sampai jua kepadamu sedang engkau tetap menjalankan pekerjaanmu.”



## Bekalan Murid Ke Jalan Akhirat

Maka demi Allah wahai jamaah, bagaimana boleh orang berdusta mengatakan kaum sufi itu tidak bekerja dan meninggalkan dunia?! Ini adalah serangan ahli engkar terhadap ahli kemurniaan dan kesetiaan dari junjungan kaum sufi yang Islami lagi sunni.

“Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ berkata: “Bergurulah denganku dan aku tidak melarangmu dari berguru dengan selainku, jika nanti engkau ketemu sumber mata air yang terlebih segar dari mata air ini maka pulangkanlah kembali apa-apa yang telah kamu ambil dariku,” dalam satu riwayat lain beliau berkata: “...maka bawalah aku bersamamu kepada mata air yang terlebih segar lagi bugar dan murni itu.” Apa yang beliau ungkapkan tadi memberi isyarat darinya bahawa beliau merupakan sohibul waqt dan khalifah teragung -moga Allah meredhoinya dan mencapaikan keredhoan buatnya, moga Allah mengurnia kita kemanfaatan darinya-. Lalu sudahkan engkau mengerti.

“Saiyidina As-Syeikh As-Syazili رَضِيَ اللَّهُ عَنْهُ tidak suka kepada murid yang tak mempunyai pekerjaan yang mencukupkannya pada menanggung urusan dunia dan anak isteri sendiri.

“Hikmah dari sikap ini ialah seorang murid sufi tidak menyusahkan syeikhnya dalam soal pendapatan dan kehidupan harian, ini juga akan menafikan hujatan golongan engkar yang menuduh ahli sufi tidak bekerja.

“Adapun bagi murid-murid yang mutajarrid ( sepenuh masa) mengkhidmati syeikh dan zawiyah maka mereka berkerja dengan syeikh dan beliaulah yang akan mengaturkan urusan-urusan duniawi mereka.

“Sesungguhnya para junjungan Syaziliyyah رَضِيَ اللَّهُ عَنْهُمْ merupakan golongan masyaikh yang paling serius menyuruh dan menggalakkan orang berkerja mencari rezeki halal walaupun sedikit, mereka anti terhadap sikap malas, sambil lewa, mengemis, mengambil kesempatan dan tidak bersih. Bahkan Sidi As-Syeikh Abul Abbas Al-Mursi رَضِيَ اللَّهُ عَنْهُ وَأَرْضَاهُ berkata: “Hendaklah kamu berkerjaya, hendaklah seorang murid sufi itu menjadikan alat jahitannya atau gerakan tangannya tika menjahit



sebagai tasbihnya, atau hendaklah dia turun ke pasar berkerja menjual beli itulah yang baik baginya.”

Sidi As-Syeikh Al-Bakri Abul Hasan رَضِيَ اللَّهُ عَنْهُ وَأَرْضَاهُ berkata: “At-Thoriq (jalan tareqat) itu ertinya menuju kepada Allah dengan empat perkara. Barang siapa dapat mencapai yang empat itu maka dia dari golongan as-siddiqin al-muhaqqiqin, barang siapa mencapai tiga darinya maka dia dari golongan al-awliya’ al-muqorrobin, barang siapa mencapai dua darinya maka dia dari golongan as-syuhada’ al-muqinin, barang siapa mencapai satu darinya maka dia dari kalangan hamba Allah yang solihin:

**Yang pertama zikir**, hamparannya amal soleh lagi halal dan buahnya kejayaan.

**Yang kedua tafakkur**, hamparannya sabar dan buahnya ilmu.

**Yang ketiga kefakiran**, hamparannya sabar dan buahnya beroleh tambahan dariNya.

**Yang keempat cinta**, hamparannya membenci dunia serta ahlinya dan buahnya mencapai hubungan dengan yang dicintai.



## Bab 37

# UZLAH DALAM TAREQAT AS-SYAZILIYYAH

**K**ita sambung lagi bicara pada siri kali ini. Kami satu rombongan muridin telah musafir ke Morocco dengan objektif kembara dan suhbah (kerana roh tareqat dan sirrnya ada pada kembara dan suhbah) bersama Saiyidina As-Syeikh Al-Kamil As-Syarif Al-Hasani Abdun Nasir Al-Jaza'iri As-Syazili رَضِيَ اللَّهُ عَنْهُ وَأَرْضَاهُ.

Dalam perjalanan itu beliau memberitahu kami: “Membaca surah Saiyidina Yusuf عَلَيْهِ الصَّلَاةُ وَالسَّلَامُ merupakan amalan yang penting bagi para murid, waktunya antara azan dan iqamah selepas sunat fajar setiap hari.

لَقَدْ كَانَ فِي يُوسُفَ وَإِخْوَتِهِ آيَاتٍ لِّلْسَائِلِينَ

*“Demi sesungguhnya! (kisah) Nabi Yusuf dengan saudara-saudaranya itu mengandung beberapa pengajaran bagi orang-orang yang bertanya (tentang hal mereka untuk mengambil iktibar)”*

**Saiyidina Yusuf: 7**

Kerana surah ini terkandung di dalamnya banyak rahsia, makrifat dan cahaya petunjuk bagi kembara yang menuju Allah Tabaroka wa Taala...

وَلَدَارُ الْآخِرَةِ خَيْرٌ لِلَّذِينَ اتَّقَوْا أَفَلَا تَعْقِلُونَ

“...dan (ingatlah) Sesungguhnya negeri Akhirat lebih baik bagi mereka yang bertaqwa, oleh itu mengapa kamu (wahai manusia) tidak mahu memikirkannya?” **Saiyidina Yusuf: 109**

Di antara rahsia-rahsia itu ialah:

قَالَ يَا بُنَيَّ لَا تَقْصُصْ رُؤْيَاكَ عَلَى إِخْوَتِكَ فَيَكِيدُوا لَكَ كَيْدًا إِنَّ الشَّيْطَانَ لِلْإِنْسَانِ عَدُوٌّ مُّبِينٌ.

“Bapanya berkata:” Wahai anakku! janganlah engkau ceritakan mimpimu kepada saudara-saudaramu, kerana aku khuatir mereka akan menjalankan sesuatu rancangan jahat terhadapmu. Sesungguhnya Syaitan adalah musuh yang nyata bagi manusia”

**Saiyidina Yusuf: 5**

وَمَا أُبْرِئُ نَفْسِي إِنَّ النَّفْسَ لَأَمَّارَةٌ بِالسُّوءِ إِلَّا مَا رَحِمَ رَبِّي إِنَّ رَبِّي غَفُورٌ رَحِيمٌ

“Dan tiadalah aku berani membersihkan diriku; sesungguhnya nafsu manusia itu sangat menyuruh melakukan kejahatan, kecuali bagi yang telah diberi rahmat oleh Tuhanku (maka terselamatlah ia dari hasutan nafsu itu). Sesungguhnya Tuhanku Maha Pengampun, lagi Maha Mengasihani.” **Saiyidina Yusuf: 53**

Dua ayat tadi memberi gambaran ahwal seorang murid dengan syeikhnya, juga dengan para ikhwan muridinnya.

لَقَدْ كَانَ فِي قَصَصِهِمْ عِبْرَةٌ لِأُولِي الْأَلْبَابِ مَا كَانَ حَدِيثًا يُفْتَرَى وَلَكِنْ تَصْدِيقَ الَّذِي بَيْنَ يَدَيْهِ وَتَفْصِيلَ كُلِّ شَيْءٍ وَهُدًى وَرَحْمَةً لِّقَوْمٍ يُؤْمِنُونَ.

“Demi sesungguhnya, kisah para nabi itu mengandungi pelajaran yang mendatangkan iktibar bagi mereka yang berakal fikiran. (kisah-kisah yang terkandung dalam Al-Quran) bukanlah cerita-



## Bekalan Murid Ke Jalan Akhirat

*cerita yang diada-adakan, tetapi ia mengesahkan apa yang tersebut di dalam kitab-kitab agama yang terdahulu daripadanya, dan sebagai keterangan yang menjelaskan tiap-tiap sesuatu, serta menjadi hidayah petunjuk dan rahmat bagi kaum yang beriman”*

**Saiyidina Yusuf: 111**

Tentang jerih payah, penat lelah dan mujahadah seorang pewaris lagi syeikh kamil murobbi dari permulaan hingga hujungnya

قُلْ هَذِهِ سَبِيلِي أَدْعُو إِلَى اللَّهِ عَلَى بَصِيرَةٍ أَنَا وَمَنِ اتَّبَعَنِي وَسُبْحَانَ اللَّهِ وَمَا أَنَا مِنَ الْمُشْرِكِينَ.

*“Katakanlah: “Inilah jalanku, aku dan mereka yang menurutku, menyeru manusia umumnya kepada Allah dengan berdasarkan keterangan dan bukti yang jelas nyata, dan aku menegaskan: Maha suci Allah (dari segala iktiqad dan perbuatan syirik); dan bukanlah aku dari golongan yang mempersekutukan Allah dengan sesuatu yang lain” Saiyidina Yusuf: 108*

...moga Allah meredhoi mereka sekalian, moga Allah mengurnia kepada kita kemanfaatan mereka dan moga Allah memuliakan kita dengan mereka dunia dan Akhirat. Allahumma amin.

وَكَذَلِكَ مَكَّنَّا لِيُوسُفَ فِي الْأَرْضِ وَلِنُعَلِّمَهُ مِن تَأْوِيلِ الْأَحَادِيثِ وَاللَّهُ غَالِبٌ عَلَى أَمْرِهِ وَلَكِنَّ أَكْثَرَ النَّاسِ لَا يَعْلَمُونَ.

*“...dan Demikianlah caranya Kami menetapkan kedudukan Yusuf di bumi (Mesir untuk dihormati dan disayangi), dan untuk Kami mengajarnya sebahagian dari ilmu takbir mimpi. dan Allah Maha Kuasa melakukan segala perkara yang telah ditetapkanNya, akan tetapi kebanyakan manusia tidak mengetahui” Saiyidina Yusuf: 21*

Kewujudan golongan engkar dalam perjalanan menuju Allah Subhanahu wa Taala merupakan sesuatu yang tabi'i

وَمَا أَكْثَرُ النَّاسِ وَلَوْ حَرَصْتَ بِمُؤْمِنِينَ

*“Dan kebanyakan manusia tidak akan beriman walaupun engkau terlalu ingin (supaya mereka beriman)” Saiyidina Yusuf: 103*

وَلَا يَحِيقُ الْمَكْرُ السَّيِّئُ إِلَّا بِأَهْلِهِ فَهَلْ يَنْظُرُونَ إِلَّا سُنَّتَ الْأَوَّلِينَ فَلَنْ تَجِدَ لِسُنَّتِ اللَّهِ تَبْدِيلًا وَلَنْ تَجِدَ لِسُنَّتِ اللَّهِ تَحْوِيلًا.

*“...sedang makar yang jahat itu tidak menimpa melainkan orang yang menjalankannya. (Dengan keadaan yang demikian, maka) tidak ada yang mereka tunggu selain daripada berlakunya kebinasaan menimpa mereka (sebagaimana yang telah menimpa) golongan kafir yang telah lalu. Kerana engkau tidak sekali-kali akan mendapati sebarang perubahan bagi “Sunnatullah” (undang-undang peraturan Allah), dan engkau tidak sekali-kali akan mendapati sebarang penukaran bagi perjalanan “Sunnatullah” itu”*

**Faathir: 43**

Saiyidina رضي الله عنه seterusnya berkata kepada kami: “Orang yang mahu dalil dari Al-Quranul Karim tentang tingkatan perjalanan para saa’irin (kembara sufi), mikraj para washilin dalam suluknya menuju Allah Taala...

وَكَذَلِكَ يَجْتَبِيكَ رَبُّكَ وَيُعَلِّمُكَ مِنْ تَأْوِيلِ الْأَحَادِيثِ وَيُتِمُّ نِعْمَتَهُ عَلَيْكَ.

*“Dan demikianlah caranya Tuhanmu memilihmu, dan akan mengajarmu takbir mimpi, serta akan menyempurnakan nikmatNya kepadamu...” Saiyidina Yusuf: 6*

... orang yang minta dalil itu tak cukupkah baginya surah Saiyidina Yusuf? Atau apa mahunya orang itu?

فَذَلِكُمْ اللَّهُ رَبُّكُمُ الْحَقُّ فَمَاذَا بَعَدَ الْحَقِّ إِلَّا الضَّلَالُ فَأَنَّى تُصْرَفُونَ.



*“Maka yang demikian (sifatNya dan kekuasaanNya) ialah Allah, Tuhan kamu yang sebenar-benarnya; sesudah nyatanya sesuatu yang hak dan benar, maka tidakkah yang lain daripada itu salah dan karut sahaja? Oleh itu, bagaimana kamu dapat dipesongkan dari kebenaran?” Saiyidina Yunus: 32*

...benar, surah itu cukup baginya -Insya Allah- jika dia memang mahu kebenaran, insaf, keadilan dan kesederhanaan.”

Kita teruskan lagi pentakrifan Al-Madrasah As-Salafiyyah Lis Saadah As-Syaziliyyah As-Sufiyyah Al-Islamiyyah As-Sunniyyah yang diasaskan oleh Saiyidina As-Syeikh Al-Kamil Abul Hasan As-Syazili رَضِيَ اللَّهُ عَنْهُ وَأَرْضَاهُ.

Dalam artikel kali ini kita akan memperkatakan tentang uzlah yang merupakan mini khalwah. Ia adalah disiplin yang masyhur diamalkan oleh para junjungan Syaziliyyah -moga Allah meredhoi mereka sekalian-.

Wahai sisi murid, uzlah ini bukannya boleh dipraktis sesuka hatimu, dilarang kamu masuk uzlah melainkan dengan seizin syeikhmu yang murobbi lagi kamil. Sila fahami dan jangan bermain-main dalam perkara ini supaya kamu tak gelincir.

Mengenai uzlah ini Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Ketahuilah -semoga Allah mendokongmu- jika engkau mahu wushul (sampai) kepada Allah maka dapatkanlah bantuan dariNya dan duduklah di atas hamparan as-sidq (keluhuran jiwa) dengan keadaan musyahadah dan zikir kepadaNya dengan benar, dengan mengikat hatimu kepada ‘ubudiyyah murni atas jalan makrifat. Dan lagi lazimilah zikir, muroqobah, taubat dan istighfar, di sini akan ku jelaskan padamu atas jalan washlah (sambungan) akan ibarat tadi supaya tidak timbul kekeliruan darinya.

Contohnya engkau membaca zikir Allah Allah Allah, atau masya Allah sambil engkau muroqobah terhadap perkataanmu itu dengan taqwa, dengan meninggalkan sikap ad-daf`u (menolak) atau al-jalbu (mengambil) dari dirimu. Ini engkau dapati ia dalam dua ayat suci dari kitab Allah Taala yang berfirman:

أَمَّنْ هَذَا الَّذِي هُوَ جُنْدٌ لَّكُمْ يَنْصُرُكُمْ مِّنْ دُونِ الرَّحْمَنِ.

*“Bahkan siapa dia yang menjadi tentera bagimu, yang akan menolongmu selain dari Allah yang Maha Pemurah?...”* **Al-Mulk: 20**

...ini dari ad-daf`u.

Tentang al-jalbu pula firman Allah Taala:

أَمَّنْ هَذَا الَّذِي يَرْزُقُكُمْ إِنْ أَمْسَكَ رِزْقَهُ

*“Atau siapa dia yang dapat memberi rezeki kepada kamu jika Allah menahan rezekiNya?...”* **Al-Mulk: 21**

“Adapun sifat zikir pula ialah engkau berzikir dengan lisanmu dan muroqabah dengan hatimu, maka apa kebaikan yang datang kepadamu dari Allah engkau terima ia, dan apa yang datang dari lawannya maka engkau tidak menyukainya dan engkau kembalikan kepada Allah tentang sikap penolakan dan mengambil seperti yang telah ku sifatkan kepadamu tadi. Aku memberi ingatan keras padamu padamu janganlah engkau menolak atau mengambil apa-apa bagi dirimu melainkan dengan Allah Taala.

“Jika terperam (berlaku dan menguasai) pada sirr (rahsia batin)mu sesuatu dari dosa, atau keaiban, atau memandang kepada amal soleh, atau hal yang indah maka bersegeralah taubat dari itu semua.

“Taubat dari dosa dan keaiban memang sudah hukum wajib pada syarak. Adapun taubat dari memandang kepada amal soleh dan hal yang indah adalah kerana ia boleh mendatangkan penyakit ( seperti takjub dan sombong). Ambillah iktibar dari istighfar junjungan Baginda Nabi صَلَّى اللَّهُ عَلَيْهِ وَسَلَّمَ تسليما walaupun Baginda telah diberi berita gembira bahawa segala dosa yang lalu dan mendatang telah diampuni. Demikianlah betapa Baginda sendiri istighfar sedangkan sekali-kali tak pernah dirinya melakukan dosa, lalu bagaimana pula sangkamu terhadap insan yang tidak sunyi dari dosa atau keaiban, atau dari kedua-duanya sekali pada tiap detik waktu.



“Adapun duduk di atas hamparan *as-sidq* (keluhuran jiwa); maka hendaklah engkau tahqiq terhadap segala sifatmu yang faqir, dhaif, lemah, hina dan lain-lain sifat ‘ubudiyyah. Duduklah dengan sikap itu sambil memandang kepada sifat-sifat Allah Subhanahu wa Taala yang Maha kaya, Maha Kuat, Maha Berkuasa, Maha Mulia... maka itulah dari sifat-sifat rububiyyah. Adapun keluhuran jiwa itu ialah engkau melazimi sifat-sifatmu, janganlah engkau berpindah kepada sifat yang bukan sifatmu nescaya nanti jadilah engkau golongan yang hampa kerana membalikkan hakikat kebenaran.

“Dan katakanlah [padaNya]:

يَا غَنِيَّ يَا قَوِيَّ يَا قَدِيرُ يَا عَزِيزُ... مَنْ لِلْفَقِيرِ غَيْرُ الْغَنِيِّ. مَنْ لِلضَّعِيفِ غَيْرُ الْقَوِيِّ. مَنْ لِلذَّلِيلِ غَيْرُ الْعَزِيزِ. مَنْ لِلْعَاجِزِ غَيْرُ الْقَادِرِ.

“Wahai yang Maha Kaya, wahai yang Maha Berkuasa, wahai yang Maha Mulia... siapalah yang dapat menolong hamba faqir kalau bukan yang Maha Kaya, siapalah yang dapat menolong hamba dhaif kalau bukan yang Maha Kuat, siapalah yang dapat menolong hamba lemah kalau bukan yang Maha Berkuasa.

فَاجْلِسْنِي عَلَى بَسَاطِ الصِّدْقِ وَاحْسِنِي لِبَاسِ التَّقْوَى الَّذِي هُوَ خَيْرٌ وَهُوَ مِنْ آيَاتِكَ. وَاحْجُبْنِي بِعَظَمَتِكَ عَنْ كُلِّ شَيْءٍ هُوَ لَكَ. وَأَمْلَأْ قَلْبِي بِمَحَبَّتِكَ حَتَّى لَا يَكُونَ فِيهِ مُتَسَعٍّ لِعَغْرِكَ إِنَّكَ عَلَى كُلِّ شَيْءٍ قَدِيرٌ.

“Dudukkanlah hamba di atas hamparan keluhuran jiwa, pakaikanlah hamba persalinan *taqwa* yang merupakan kebaikan dan satu bukti dari ayatMu, hijablah diriku dengan keagunganMu dari segala halanganMu, penuhilah hatiku dengan mahabbahMu hingga pada hatiku itu tiada lagi ruang selain untukMu, sesungguhnya Engkau Maha Kuasa atas tiap sesuatu.”

“Adapun yang ini asma’ an-nusrah ketika masuk uzlah, maka



berpegang teguhlah dengannya, janganlah engkau gopoh pada suatu perkara dari pekerjaanmu dan ucapkanlah:

بِسْمِ اللَّهِ وَبِاللَّهِ وَمِنَ اللَّهِ وَإِلَى اللَّهِ وَعَلَى اللَّهِ فَلْيَتَوَكَّلِ الْمُؤْمِنُونَ.

*“Dengan nama Allah, bersama Allah, dari Allah, kepada Allah, dan kepada Allah jua hendaklah orang-orang yang beriman itu bertawakkal.”*

“Yang ini pula asma’ ar-ridho dan pelapang dada yang dapat menolak darimu rasa kesempitan dalam uzlah, ucapkanlah:

حَسْبِيَ اللَّهُ أَمِنْتُ بِاللَّهِ رَضِيتُ بِاللَّهِ تَوَكَّلْتُ عَلَى اللَّهِ لَا قُوَّةَ إِلَّا بِاللَّهِ

*“Cukuplah Allah bagiku, aku beriman dengan Allah, aku redho kepada Allah, aku bertawakkal kepada Allah, tiada kekuatan melainkan dengan Allah.”*

“Dan ucapkanlah dalam munajat, permintaan dan doa-doamu:

يَا مَنْ وَسِعَ كُرْسِيُّهُ السَّمَوَاتِ وَالْأَرْضَ وَلَا يَئُودُهُ حِفْظُهُمَا وَهُوَ الْعَلِيُّ الْعَظِيمُ.  
أَسْأَلُكَ الْإِيمَانَ بِحِفْظِكَ إِيْمَانًا يَسْكُنُ بِهِ قَلْبِي مِنْ هَمِّ الرِّزْقِ وَخَوْفِ الْخَلْقِ  
وَاقْرَبُ مِنِّي بِقُدْرَتِكَ قُرْبًا يَمَحُقُ بِهِ عَنِّي كُلَّ حِجَابٍ مَحَقَّتْهُ عَنْ سَيِّدِنَا إِبْرَاهِيمَ  
خَلِيلِكَ فَلَمْ يَحْتَجْ لِسَيِّدِنَا جَبْرِيلَ رُسُولِكَ وَلَا لِسُؤَالِهِ مِنْكَ وَحَاجَتُهُ بِذَلِكَ  
عَنْ نَارِ عَذُوكَ وَكَيْفَ لَا يَحْجُبُ عَنْ مَضَرَّةِ الْأَعْدَاءِ مَنْ عَيَّنَتْهُ عَنْ مَنَفَعَةٍ  
الْأَحْبَاءِ. كَلَّا إِنِّي أَسْأَلُكَ أَنْ تُغَيِّبَنِي بِقُرْبِكَ مِنِّي حَتَّى لَا أَرَى وَلَا أَحْسَسَ بِقُرْبِ  
شَيْءٍ وَلَا يَبْعِدُهُ عَنِّي إِنَّكَ عَلَى كُلِّ شَيْءٍ قَدِيرٌ.

*“Wahai Tuhan yang kursiyNya meluasi segala langit dan bumi,*



## Bekalan Murid Ke Jalan Akhirat

*Dia tidak susah untuk menjaga keduanya dan Dialah yang Maha Tinggi lagi Maha Agung. Hamba mohon padaMu iman dengan penjagaanMu, iman yang dengannya tenang hatiku dari dukacita soal rezeki dan takut pada makhluk. Dampirkanlah aku kepadaMu dengan kudratMu, dengan dampingan yang menghapus dariku segala hijab yang telah Kau hapuskan dari Saiyidina Ibrahim teman rapatMu, hingga baginda tidak berhajat kepada Saiyidina Jibril rasulMu, dan hingga baginda tidak perlu meminta kepadaMu, dan dengan dampingan itu Engkau menghijab baginda dari api musuhMu.*

“Bagimana pula tidak terhibab dari mudarat musuh hamba yang engkau ghaibkan dia dari manfaat para kekasihnya. Tidak, bahkan sungguh hamba pohonkan dariMu agar Engkau menghaibkan diriku dengan dampinganMu kepadaku hingga hamba tidak lagi melihat dan tidak merasa dampingan atau kejauhan sesuatu dariku, sesungguhnya Engkau Maha Kuasa atas tiap sesuatu.”

Dan lagi antara buah dari uzlah yang soheh dan dijalankan dengan izin seperti yang disebut oleh Saiyidina As-Syeikh As-Syazili رَضِيَ اللَّهُ عَنْهُ : “Bahawa buah dari uzlah itu adalah mencapai mawahibul minnah (kurniaan budi Illahi), yaitu empat perkara:

1. Tersingkapnyautupan.
2. Turunnya rahmat.
3. Tahqiqnya mahabbah.
4. Lisan yang jujur pada kalimah.

Firman Allah Taala:

فَلَمَّا اعْتَرَلَهُمْ وَمَا يَعْبُدُونَ مِنْ دُونِ اللَّهِ وَهَبْنَا لَهُ...

“Maka apabila dia beruzlah (mengasing diri dari) mereka dan apa yang mereka sembah lain dari Allah, Kami pun mengurniainya...”

## Saiyidatina Maryam: 49

وَوَهَبْنَا لَهُمْ مِّن رَّحْمَتِنَا وَجَعَلْنَا لَهُمْ لِسَانَ صِدْقٍ عَلِيًّا

*“Dan Kami kurniakan kepada mereka dari rahmat Kami, dan Kami jadikan bagi mereka lisan yang jujur (sebutan dan pujian) yang tinggi (dalam kalangan umat manusia)” Saiyidatina Maryam: 50*

Di antara penyakit, masalah dan musibah uzlah yang timbul kepada golongan muridin seperti yang disebut oleh Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ : “Ketahuilah bahawa penyakit uzlah pada awam golongan penuju Allah Taala atas jalan makrifat dan istiqamah dalam suluk ilmu kepada Allah Taala itu empat perkara:

- Jiwa bergantung kepada sebab.
- Cenderung jiwa kepada pihak tertentu dalam mendapatkan rezeki.
- Akal merasa cukup dengan apa yang dapat padanya dari hasil dampingan.
- Lintasan dari musuh yang mendatangkan harapan itu ini tentang tujuan.

“Dan ketahuilah juga penyakitnya pada golongan khawas mereka (yang telah maju, tulus dan mendahulu) ada empat:

- Bermesra dengan waswas.
- Hati bercakap-cakap mahu kembali kepada manusia ramai.
- Tajdid (memperbaharui) waktu yang merupakan petanda kemufilsan.
- Menganggap diri mendengar bisikan Allah dengan kebiasaan pancaindera.

“Setiap penyakit itu ada jalan menentanginya dengan cara kembali kepada asal tauhid dan makrifat serta teguh di atas jalan istiqamah. Jika engkau didatangi halangan dari pihak bergantung kepada sebab dan cenderung kepada pihak tertentu dalam soal rezeki maka



## Bekalan Murid Ke Jalan Akhirat

kembalikanlah ia kepada asal makrifat yang nyata bahawa segala pembahagian untuk dirimu sudah ditetapkan atau sudah dijalankan ketentuannya sejak azali. Dan katakanlah pada nafsumu : “Apakah engkau sudah mengambil janji dari Allah bahawa engkau tidak akan direzekikan selain dari sebab yang ini, atau dari pihak yang ini?,” persempitilah ke atasnya dengan makrifat dan karamkanlah ia dalam lautan tauhid. Dan katakanlah:

مَا شَاءَ اللَّهُ كَانَ وَمَا لَمْ يَشَأْ لَمْ يَكُنْ

*“Apa yang sudah dikehendaki Allah itulah yang berlaku dan apa yang tidak dikehendaki Allah takkan terjadi.”*

“Kerana itulah berkata para junjungan رَضَوْنَ اللَّهَ عَلَيْهِمْ أَجْمَعِينَ : “Karamkanlah dunia di lautan tauhid sebelum ia mengkaramkanmu.” Jika engkau didatangi halangan dari pihak akal merasa cukup dengan apa yang dapat padanya dari ilmu, atau amalan, atau cahaya, atau petunjuk, atau bicara bisikan kerohanian maka janganlah engkau lupa terhadap sabiqoh (permulaan) yang mendahuluiimu dan apa nanti khotimah (penghujung)mu.

“Dan takkan terlepas segalanya dari perbuatan Allah yang maha Esa lagi menentukan pilihan, Dia melakukan apa kehendakNya tanpa peduli kepada kebaikan hamba yang mendatangiNya atau membelakangiNya.

“Jika engkau didatangi halangan dari dari lintasan musuh yang terbit dari tujuan, dan yang dikehendaki dari ‘ubudiyyah murni itu adalah wujudnya Al-Haq tanpa sebab dari makhluk. Maka demikianlah Allah Taala menuntut darimu bahawa engkau menjadi hambaNya, dan engkau pula cinta bahawa Dia menjadi Tuhanmu. Maka jika benar engkau menjadi hambaNya seperti yang diredhoiNya maka benarlah Dia itu Tuhanmu seperti yang engkau redho, lalu Dia takkan meninggalkanmu kepada yang lain dariNya dari jalan hakikat, maka bagaimana pula akan ditinggalkanmu kepada angan-angan dan dakwa-dakwi. Maka ketahuilah bab ini dan engkau mahirkanlah pengertiannya sungguh-

sungguh, mintalah tolong pada Allah dan bersabarlah...

إِنَّ اللَّهَ مَعَ الصَّابِرِينَ

*“Sesungguhnya Allah berserta mereka yang sabar.”*

“Jika kedudukannya pada darjat khawas dan pada makrifatmu datang halangan waswas yang menyerupai ilmu dari jalan ilham dan kasyaf pada sangkaannya, maka janganlah engkau terima ia, sebaliknya kembalilah kepada kebenaran yang putus ketetapanannya dari kitab Allah atau sunnah Saiyidina wa Maulana Rasulillah ﷺ.

“Dan ketahuilah apa yang mendatangimu itu sekalipun jika ia memang kebenaran murni, lalu engkau berpaling darinya dan engkau tetap berpegang kepada kitab Allah atau sunnah RasulNya ﷺ nescaya itu tidak menjadi aib apa-apa kepadamu.

“Kerana pendirianmu adalah yakin bahawa Allah Taala telah menjamin penjagaan ke atasmu apabila engkau bersama Al-Kitab dan As-Sunnah, Allah tidak memberi jaminan itu pada pihak kasyaf dan ilham.

“Lalu bagaimana harus engkau menerima bulat-bulat apa yang datang kepadamu dari jalan ilham, melainkan engkau merujukkannya terlebih dahulu dengan Al-Kitab dan As-Sunnah. Maka jika ia takkan kau terima melainkan dengan penilaian Al-Kitab dan As-Sunnah lalu mengapa pula engkau mahu bernesra dengan waswas yang sifatnya sangka-sangkaan dan jatuh engkau pada penyakit waham. Jagakanlah bab ini supaya perjalananmu kepada Tuhan lurus dengan bukti

وَيَتْلُوهُ شَاهِدٌ مِّنْهُ...

*“...dan dia diikuti (didokong oleh Al-Quran) yang memberi kenyataan – (sebagai saksi dari pihak Tuhan meneguhkan bukti yang tersebut)...” Saiyidina Hud: 17*

... adapun bukti dan saksi yang begini sama sekali tidak salah dan



tidak bermasalah, walhamdulillah.

“Jika engkau didatangi halangan bicara yang mahu kembali kepada manusia ramai untuk bercerita keadaanmu kepada mereka... [sebenarnya] engkau masih bersama mereka dan langsung tidak keluar [beruzlah] dari mereka, lalu janganlah engkau tertipu dengan uzlah [badan]mu itu sedangkan hatimu masih tetap bersama manusia ramai. Larilah engkau kepada Allah kerana sesungguhnya siapa yang lari kepada Allah nescaya dia dilindungi Allah.

“Adapun sifat lari kepada Allah Taala ialah tidak suka kepada pihak makhluk, sebaliknya mahabbah kepada pihak Allah Subhanahu wa Taala dengan mencari lindungan dan berpegang teguh kepadaNya

وَمَنْ يَعْتَصِم بِاللَّهِ فَقَدْ هُدِيَ إِلَى صِرَاطٍ مُسْتَقِيمٍ

“...dan sesiapa berpegang teguh kepada Allah maka sesungguhnya dia telah beroleh petunjuk hidayah ke jalan yang lurus” **Aali ‘Imran : 101**

“Dan jika datang padamu halangan tajdid maka lawanlah ia dengan segala yang dapat digunakan dari ilmu yang dapat menghalangmu darinya yang mana ianya boleh berlaku.

“Dan dorongkanlah hemahmu kepada Allah dengan taqwa agar Dia melepaskanmu dari halangan itu dan merezekikanmu dari sumber yang tak kau duga

...وَمَنْ يَتَّقِ اللَّهَ يَجْعَلْ لَهُ مَخْرَجًا وَيَرْزُقْهُ مِنْ حَيْثُ لَا يَحْتَسِبُ. وَمَنْ يَتَوَكَّلْ عَلَى اللَّهِ فَهُوَ حَسْبُهُ إِنَّ اللَّهَ بَالِغُ أَمْرِهِ قَدْ جَعَلَ اللَّهُ لِكُلِّ شَيْءٍ قَدْرًا.

“...dan barang siapa yang bertaqwa kepada Allah nescaya Allah akan mengadakan baginya jalan keluar (dari segala yang menyusahkannya), serta memberinya rezeki dari jalan yang tidak terlintas di hatinya. Dan (ingatlah), sesiapa berserah diri bulat-bulat kepada Allah, maka Allah mencukupi baginya (untuk menolong dan

*menyelamatkannya). Sesungguhnya Allah tetap melakukan segala perkara yang dikehendakiNya. Allah telahpun menentukan kadar dan masa bagi berlakunya tiap-tiap sesuatu”* **At- Thalaq: 2-3**

“Jika bisikan-bisikan Al-Haq menarik-narikmu... adapun penyakit dari bisikan itu ialah mengambil saksi pancaindera lahir untuk menentukan hakikat-hakikat yang ghaib. Maka janganlah engkau melakukan itu, jika tidak jadilah engkau kaum yang jahil. Janganlah engkau memasukkan akalmu pada perkara-perkara sebegitu. Ketika datang bisikan-bisikan itu hendaklah sikapmu tetap sama seperti sebelum datangnya, hinggalah nanti Allah Taala sendiri yang akan menjelaskan makna bisikan itu kepadamu dan memberi petunjuk kepadamu

وَهُوَ يَتَوَلَّى الصَّالِحِينَ.

*“...dan Dialah (Allah) yang membela kaum yang soleh”* **Al-A'raaf: 169**



## Bab 38

# MELAWAN GODAAN SYAITAN DAN JENIS-JENIS LINTASAN HATI

**K**ita sambung lagi dalam siri kali ini dengan membicarakan dua topik; (1) melawan musuh Syaitan yang terkutuk dan (2) Khowathir (lintasan hati)

Saiyidina As-Syeikh As-Syazili -moga Allah meredhoinya dan mencapaikan keredhoan baginya, dan semoga Allah mengurnia kita kemanfaatannya dunia Akhirat- telah berkata: “Barang siapa yang tidak mahu Syaitan mempunyai jalan masuk kepadanya maka hendaklah dia memperbetulkan (1) iman, (2) tawakkal, (3) `ubdiyyah di atas hamparan (a) hina diri, kefakiran dan (b) mencari lindungan dan amat getir memerlukan kepada Allah serta (c) minta penjagaan dariNya.

“Allah Tabaroka wa Taala berfirman:

إِنَّهُ لَيْسَ لَهُ سُلْطَانٌ عَلَى الَّذِينَ آمَنُوا وَعَلَى رَبِّهِمْ يَتَوَكَّلُونَ

“Sesungguhnya Syaitan itu tidak mempunyai sebarang pengaruh terhadap mereka yang beriman dan yang bertawakkal sepenuhnya kepada Tuhan mereka” **An-Nahl: 19**

dan lagi firmanNya:



إِنَّ عِبَادِي لَيْسَ لَكَ عَلَيْهِمْ سُلْطَانٌ

“(Wahai Syaitan), sesungguhnya hamba-hambaKu, tidaklah ada bagimu sebarang kuasa untuk menyesatkan mereka...” **Al-Hijr: 42**

dan lagi firmanNya:

وَأِمَّا يَنْزَغَنَّكَ مِنَ الشَّيْطَانِ نَزْغٌ فَاسْتَعِذْ بِاللَّهِ

“Dan jika engkau dihasut oleh suatu hasutan dari Syaitan maka mintalah perlindungan kepada Allah...” **Al-A’raaf: 200**

Saiyidina As-Syeikh Abul Hasan As-Syazili رَضِيَ اللَّهُ عَنْهُ وَأَرْضَاهُ berkata:

...إِتَّخِذِ اللَّهَ وَلِيًّا وَالشَّيْطَانَ عَدُوًّا وَقَدْ اسْتَرَحْتَ

“Jadikanlah Allah sebagai pembelamu dan Syaitan sebagai musuhmu, nescaya senang dirimu.”

“Memperbetulkan iman dengan syukur atas segala nikmat, sabar terhadap bala ujian dan redho dengan ketentuan takdir. Tawakkal yang soheh pula dengan memulaukan nafsu, melupakan makhluk, bergantung teguh kepada kerajaan Allah yang Maha Benar dan melazimi zikir. Jika engkau didatangi suatu halangan yang menegahmu dari Allah maka tetaplah teguh. Kerana Allah Tabaroka wa Taala telah berfirman:

يَا أَيُّهَا الَّذِينَ آمَنُوا إِذَا لَقِيتُمْ فِتْنَةً فَابْتُئُوا وَادْكُرُوا اللَّهَ كَثِيرًا لَّعَلَّكُمْ تُفْلِحُونَ

“Wahai orang-orang yang beriman! Apabila kamu bertemu dengan sesuatu pasukan (musuh) maka hendaklah kamu tetap teguh menghadapinya, dan berzikirlah mengingati Allah banyak-banyak, supaya kamu berjaya (mencapai kemenangan)” **Al-Anfaal: 45**

“Manakala memperbetulkan `ubudiyyah pula dengan melazimi kefakiran, kedhaifan dan kehinaan diri di hadapan Allah Subhanahu wa Taala, dan tinggalkanlah memakai segala lawan dari sifat kehambaan



## Bekalan Murid Ke Jalan Akhirat

itu yaitu sifat rububiyyah (ketuhanan) yang tiada kena mengena engkau dengannya.

“Maka lazimilah sifat-sifat [*`ubudiyyah*]mu dan bergantunglah kepada sifat-sifat Allah. Ucapkanlah rayuan dari hamparan kefakiran hakiki:

يَا غَنِيُّ مَنْ لِلْفَقِيرِ سَوَاكَ

*“Duhai yang Maha Kaya, siapalah yang dapat menolong hamba fakir ini selainMu”*

dan dari hamparan kelemahan:

يَا قَدِيرُ مَنْ لِلْعَاجِزِ سَوَاكَ

*“Duhai yang Maha Berkuasa, siapalah yang dapat menolong hamba lemah ini selainMu”*

dan dari hamparan hina diri:

يَا عَزِيزُ مَنْ لِلذَّلِيلِ غَيْرَكَ

*“Duhai yang Maha Mulia, siapakah yang dapat menolong hamba hina ini selainMu”*

nescaya engkau kan mendapati jawapan dariNya seolah-olah berada dalam genggam tanganmu...

يَا أَيُّهَا الَّذِينَ آمَنُوا اسْتَعِينُوا بِالصَّبْرِ وَالصَّلَاةِ إِنَّ اللَّهَ مَعَ الصَّابِرِينَ

*“Wahai orang-orang yang beriman, hendaklah kamu meminta pertolongan dengan sabar dan solat. Sesungguhnya Allah bersama mereka yang sabar”* **Al-Baqarah: 153**

“Barang siapa masih kekal di bumi syahwat, terus mengikut hawa

nafsunya dan jiwanya tidak menolong untuk membersihkan diri maka `ubudiyyahnya pada dua perkara:

(1) Pertama mengenal nikmat Allah yang amat banyak; betapa Allah telah memberinya iman dan tauhid, betapa Allah telah menjadikan dia cinta kepada iman dan menghiaskan iman di dalam hatinya, betapa Allah menjadikan dia benci kepada yang berlawanan dengan iman yaitu kekufuran, kefasikan dan kedurhakaan. Maka berkatalah si hamba:

رَبِّ أَنْعَمْتَ عَلَيَّ بِهَذَا وَسَمَّيْتَنِي رَاشِدًا فَكَيْفَ أَيَّاسُ مِنْكَ وَأَنْتَ هَدَيْتَنِي بِفَضْلِكَ  
وَإِنْ كُنْتُ مُتَخَلِّفًا؟ فَأَرْجُوكَ يَا رَبِّي أَنْ تَقْبَلَنِي حَتَّى وَإِنْ كُنْتُ زَائِعًا ضَائِعًا.

*“Tuhanku! Engkau telah memberiku nikmat ini, engkau menamakan aku hambamu yang mendapat petunjuk, lalu bagaimana aku akan kecewa dariMu sedangkan Engkau memberi hidayat padaku walaupun aku mundur? Aku berharap padaMu ya Robbi agar sudilah Engkau menerimaku walau aku menyimpang dan sesat sekalipun.”*

(2) Yang keduanya meminta suaka dan perlindungan serta senantiasa berkeadaan fakir kepada Allah Tabaroka wa Taala, serta ucapkanlah rayuan:

يَا رَبِّي سَلِّمْ سَلِّمْ وَنَجِّنِي وَأَنْقِذْنِي

*“Ya Robbi selamatkanlah... selamatkanlah, lepaskanlah hamba dan selamatkanlah hamba.”*

“Sememangnya tiada jalan bagi yang telah dialahkan oleh segala takdir dan diputuskannya dari `ubudiyyah yang murni melainkan dua perkara ini. Jika kedua-duanya ditinggalkan oleh si hamba itu maka celakalah hasilnya dan pasti jauhlah dia wal`iyadzu billah.

Saiyidina As-Syeikh Al-Kamil Abul Hasan As-Syazili -moga Allah



## Bekalan Murid Ke Jalan Akhirat

meredhoinya dan mencapaikan keredhoan baginya, dan semoga Allah mengurnia kita kemanfaatannya- telah berkata: “Perkara yang dapat mengecewakan Syaitan ada empat:

- Sama ada engkau duduk berfikir tentang apa yang dapat mendampingkanmu kepada Allah lalu engkau melakukannya. Atau
- engkau berfikir tentang apa yang dapat menjauhkanmu dari Allah lalu engkau menghindarinya. Atau
- engkau duduk memikirkan amalan baikmu yang telah lalu maka engkau pun bersyukur dan mengucapkan istighfar. Atau
- engkau duduk memikirkan dosa-dosamu yang telah lalu maka engkau pun istighfar dan mengucapkan syukur.”

Imam Tareqat As-Syaziliyyah Saiyidina As-Syazili رَضِيَ اللَّهُ عَنْهُ berkata kepada muridnya: “Mahukah engkau bahawa Allah mengkayakanmu hingga Allah mengkayakan denganmu bagi siapa yang mencintai, atau bertawassul, atau berdoa, atau meminta?,” maka kata Sidi Madhi رَضِيَ اللَّهُ عَنْهُ : “Bagaimanakah hamba dapat mencapai itu?,” jawab Saiyidina رَضِيَ اللَّهُ عَنْهُ : “Jangan engkau jadikan kalangan makhluk itu sebagai musuh atau kekasih, sebaliknya jadikanlah Allah sebagai kekasih.”

Maka kata Sidi Madhi رَضِيَ اللَّهُ عَنْهُ : “Lalu bagaimana pula dengan memusuhi makhluk kerana Allah dan mengasihinya kerana Allah?,” maka jawab Saiyidina As-Syazili رَضِيَ اللَّهُ عَنْهُ : “Yang demikian itu dengan kerana Allah, bukan dengan kerana ibadat atau dengan kerana kepentingan diri. Jika engkau memusuhi atau membenci maka berilah ilmu akan haknya (ertinya hendaklah memusuhi dan bencimu itu berdasarkan ilmu), dan janganlah engkau jadikan Syaitan sebagai pemimpin kerana Allah Tabaroka wa Taala berfirman:

...وَمَنْ يَتَّخِذِ الشَّيْطَانَ وَلِيًّا مِّنْ دُونِ اللَّهِ فَقَدْ خَسِرَ خُسْرًا مُّبِينًا

“...dan (ingatlah) sesiapa yang mengambil Syaitan menjadi

*pemimpin yang ditaati selain dari Allah, maka sesungguhnya rugilah ia dengan kerugian yang terang nyata” An-Nisa’: 119*

“Lalu jika engkau mengasihi dengan dasar ilmu akan apa yang dikasihinya maka tetapkanlah yang dikasihi itu bersamamu selagi ia muafakat dengan ketaatan.

“Dan jika ia menyalahi ketaatan maka engkau pun membencinya atas dasar ilmu selagi mana ia menyalahi. Dalam hal itu sirr dan dalam jiwamu tetap duduk di atas hamparan iman, yaitu engkau menyayangnya dan mengadabkannya (menghukumnya) kerana dia menyalahi zahir ilmu.

“Maka hendaklah engkau mengamat-amati bab ini, sesungguhnya di sinilah tempat gelincir orang jahil dan bodoh, dan mintalah pertolongan Allah.”

Saiyidina As-Syeikh Abul Hasan As-Syazili رَضِيَ اللَّهُ عَنْهُ وَأَرْضَاهُ berkata: “Barang siapa mengusahakan yang halal dan mendirikan kefardhuan Allah Taala ke atas dirinya maka sesungguhnya telah sempurnalah mujahadahnyanya. Alhamdulillah atas intipati dari segala intipati.”

Saiyidina As-Syeikh Abul Hasan As-Syazili رَضِيَ اللَّهُ عَنْهُ وَأَرْضَاهُ berbicara mengenai lintasan-lintasan yang menimpa dan jatuh kepada hati. Kata beliau: “Setiap ilmu yang didahului dan ada padanya lintasan-lintasan hati, dan diikuti oleh gambaran-gambaran tertentu, dan nafsu cenderung kepadanya, dan tabiat berlazat-lazat dengannya, maka buanglah ilmu itu dan tinggalkanlah ia dibelakangmu walau ia benar sekali pun.

“Dan ambillah ilmu Allah yang diturunkan ke atas RasulNya ﷺ dan diteladani oleh para khalifah Baginda yang rasyidun -moga Allah meredhoi mereka sekalian- dan diikuti oleh para sahabat dan tabi’in selepas Baginda ﷺ, dan para pengikut mereka hinggalah sampai ke hari pembalasan -moga redho Allah meliputi mereka sekalian-.

“Adapun mengikut perjalanan Baginda ﷺ itu menyelamatkanmu dan menjagamu dari segala syak, zhon, waham serta dakwa-dakwi dusta yang menyesatkan dari hidayat dan hakikatnya. Apalah salahnya



engkau menjadi abdi semata kepada Allah tanpa ilmu dan amal.

“Dan cukuplah bagimu dari ilmu itu bahawa engkau berilmu tentang wahdaniyyah (keesaan Allah), dan dari amal itu cukuplah bagimu bahawa engkau mahabbah Allah dan mahabbah RasulNya Saiyidina wa Maulana Muhammad ﷺ, dan mahabbah para sahabat, dan mawaddah (mengasihi) Ahlil Bait, dan redho kepada bonda-bonda kita para Ummahatul Mukminin isteri-isteri Saiyidina wa Maulana Muhammad Nabi yang termulia ﷺ, dan beriqtikad bahawa kebenaran itu di pihak jamaah muslimin dari Ahlis Sunnah Wal Jamaah.

“Seorang lelaki berkata: Bilakan akan datangnya kiamat itu ya Rasulallah ﷺ, maka sabda Baginda Nabi ﷺ : “Apakah yang telah engkau sediakan untuknya?”, jawab lelaki itu: “Tiada apa pun, melainkan aku cinta kepada Allah dan RasulNya,” maka sabda Saiyidina wa Maulana Rasulullah ﷺ : “Seseorang itu akan bersama siapa yang dicintainya.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Satu malam aku telah membaca surah Al-Ikhlâs dan mu`awwidzatain. Apabila aku selesai membaca ayat:

مِنْ شَرِّ الْوَسْوَاسِ الْخَنَّاسِ الَّذِي يُوَسْوِسُ فِي صُدُورِ النَّاسِ

...selepas itu aku melihat [dalam mimpi] ada yang berkata kepadaku: “Kejahatan waswas adalah waswas yang masuk mengganggu antara engkau dengan kekasihmu, waswas itu mengingatkanmu perbuatan kekasih yang buruk dan melupakanmu dari perbuatannya yang baik...

“...waswas itu menggoda engkau untuk melihat amalan kiri sebagai banyak dan amalan kanan sebagai sedikit kerana ia mau melenconganmu, mengubahmu dan menukarmu dari baik sangka kepada Allah Subhanahu wa Taala dan RasulNya ﷺ kepada jahat sangka terhadap Allah Tabaroka wa Taala dan RasulNya ﷺ.

“Jaga-jagalah engkau terhadap bab ini, sesungguhnya sudah ramai ahli zuhud, ahli ibadah, ahli warak dan yang bersungguh-sungguh beramal telah jatuh padanya.

Saiyidina رَضِيَ اللَّهُ عَنْهُ وَأَرْضَاهُ berkata: “Dikatakan padaku: “Jika engkau mahu selamat dari yang demikian itu maka janganlah mentadbir untuk esok atau lusa.” Inilah dia rawatannya walau pun sulit untuk melaksanakannya di zaman ini. Allah Taala jua yang mengurnia taufik, Dialah yang Maha Menolong, maha Membantu, Maha Hidup lagi maha berdiri dengan sendirinya.



## Bab 39

# TAUBAT, ISTIGHFAR DAN ZIKIR

**K**ita sambung lagi siri kali ini dengan membicarakan tiga topik; (1) taubat, (2) istighfar dan (3) zikir.

Saiyidina As-Syeikh As-Syazili -moga Allah meredhoinya dan mencapaikan keredhoan baginya, dan semoga Allah mengurnia kita kemanfaatannya dunia Akhirat- telah berkata: “Hendaklah hemahmu pada tiga perkara: (1) taqwa, (2) taubat dan (3) berjaga-jaga. Tonggak kepada tiga perkara ini juga tiga: (1) zikir, (2) istighfar dan (3) diam kerana ubudiyah lillahi Taala. Dan hendaklah engkau membentengi sunnah-sunnah ini dengan empat perkara: (1) cinta, (2) redho, (3) zuhud dan (4) tawakkal.

Saiyidina رَضِيَ اللَّهُ عَنْهُ وَأَرْضَاهُ berkata: “Jikalau engkau terlepas taqwa dalam istiqamah maka janganlah engkau terlepas ia pada taubat dan inabah.”

Lagi kata Saiyidina رَضِيَ اللَّهُ عَنْهُ وَأَرْضَاهُ : “Lemparkanlah dirimu di pintu redho, pecatlah dari jiwamu segala kezaman dan kehendakmu, bahkan pecatlah taubatmu; [gantikan semua itu] dengan penerimaan taubat Allah Tabaroka wa Taala ke atasmu seperti yang difirmankanNya:

ثُمَّ تَابَ عَلَيْهِمْ لِيَتُوبُوا



“...kemudian Allah menerima taubat mereka supaya mereka kekal bertaubat...” **At-Taubah: 118**

Saiyidina رَضِيَ اللَّهُ عَنْهُ وَأَرْضَاهُ berkata:

اللَّهُمَّ إِنِّي ثُبْتُ إِلَيْكَ فَأَعِنِّي وَوَفِّقْنِي وَقَوِّنِي وَأَنْصُرْنِي وَتَبَتَّنِي وَأَعْصِمْنِي وَأَسْتُرْنِي  
بَيْنَ خَلْقِكَ وَلَا تَفْضَحْنِي عِنْدَ رَسُولِكَ صَلَّى اللَّهُ عَلَيْهِ وَسَلَّمَ.

“Allahumma sesungguhnya aku bertaubat kepadaMu, maka bantulah aku, taufikkan aku, kuatkan aku, tolonglah aku, tetapkan aku, lindungilah aku antara makhlukMu dan janganlah engkau membongkar kesalahanku di sisi RasulMu ﷺ...”

Lalu dikatakan padaku: “Engkau seorang musyrik,” aku bertanya: “Bagaimana musyriknya?,” dia berkata: “Katanya engkau takut terbongkar di sisi makhluk, yang sesungguhnya engkau takut Allah membongkarmu di hadapan manusia, lagi patut bagi hatimu bergantung kepada Allah bukannya kepada manusia, lagi patut engkau ketahui bahawa tiada siapa pun manusia yang dapat memberimu manfaat atau memberimu mudarat.

“Lalu selagi mana hatimu bergantung kepada ilmunu, kudratmu, kekuatanmu, usahamu dan kegigihanmu maka tidaklah engkau seorang hamba yang mengharap kepada Allah hinggalah engkau berputus asa dari semua itu.

“Tika mana engkau bergantung harap kepada Allah dalam tiap nafas nescaya engkau akan mendapat [kekuatan] roh dan madad dari Allah [bahkan] jika tak kesampaian hajatmu sekalipun. Dia akan memalingkanmu dari memandang selainNya dengan cahaya itu dan akan mempersempitkan ke atasmu [dari memandang selainNya].”

Saiyidina رَضِيَ اللَّهُ عَنْهُ وَأَرْضَاهُ berkata: “Aku telah bermimpi melihat Saiyidina wa Maulana Baginda Nabi ﷺ berkata: “Insan yang beriman kepada Allah dan hari pembalasan telah mendapat petunjuk kepada sunnahku, dia berpaling dari dunia dan menuju kepada Akhirat, dia



## Bekalan Murid Ke Jalan Akhirat

berazam untuk tidak menderhakai Allah dan jika dia derhaka (berbuat maksiat) maka dia istighfar kepada Allah, bertaubat dan inabah (kembali rujuk kepadaNya).” Aku pun berkata: “Apakah taubat dan inabah itu?,” maka kata Baginda: “Taubat dari maksiat kepada Allah, inabah kembali rujuk dari mentaati Allah kepada Allah Subhanahu wa Taala.”

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Benteng yang paling kebal adalah seperti yang telah ku khabarkan padamu mengenai istighfar. Adapun hakikatnya ialah engkau tidak punya ketetapan bersama selain Allah, kerana Dia telah berfirman:

وَمَا كَانَ اللَّهُ مُعَذِّبَهُمْ وَهُمْ يَسْتَغْفِرُونَ

“...dan Allah tidak akan menyiksa mereka sedang mereka beristighfar” **Al-Anfal: 33**

Saiyidina As-Syazili رَضِيَ اللَّهُ عَنْهُ وَأَرْضَاهُ berkata: “Aku telah berniat untuk menemui seorang raja maka dosaku telah menghalangiku. Makin aku istighfar dan taubat aku merasa lemah. Lalu dikatakan padaku: “Ucapkanlah:

اللَّهُمَّ إِنِّي أَسْأَلُكَ الصَّلَابَةَ فِي الدِّينِ وَالْعَمَلَ بِالْيَقِينِ وَأَعُوذُ بِكَ مِنْ لِقَاءِ ذَنْبِي فَإِنَّ ذَلِكَ مِمَّا يَضَعِفُ قَلْبِي وَأَشْهَدُنِي إِيَّاكَ بِالْإِشْهَادِ فَهُوَ أَقْوَى لِسِرِّي وَلُبِّي.

“Allahumma sesungguhnya aku bermohon kepadaMu keteguhan dalam agama, amal dan yakin. Aku berlindung kepadaMu dari akibat dosaku, sesungguhnya demikian itu antara perkara yang melemahkan hatiku. Dan saksikanlah aku akan Engkau semata dengan penyaksian, yang demikian itu lebih menguatkan sirr dan inti jiwaku.”

اللَّهُمَّ اسْتُرْنِي بِمَغْفِرَتِكَ وَارْحَمْنِي بِرَحْمَتِكَ وَأَقْدِرْ لِي بِقُدْرَتِكَ وَأَمْدِدْنِي بِمُشِيَّتِكَ وَعَلِّمْنِي عِلْمًا يُوَافِقُ عِلْمَكَ وَهَبْ لِي حُكْمًا يُصَادِفُ حُكْمَكَ وَأَوْجِدْ

لِي لِسَانَ الصِّدْقِ فِي عِبَادِكَ وَكُنْ لِي سَمْعًا وَبَصَرًا وَلِسَانًا وَقَلْبًا وَعَقْلًا وَيَدًا  
وَمُؤَيَّدًا.

*"Allahumma lindungilah aku dengan maghfirahMu, rahmatilah aku dengan kasihMu, kuasakanlah aku dengan kudratMu, hulurkanlah bantuan kepadaku dengan kehendakMu, ajarkanlah aku ilmu yang muafakat dengan ilmuMu, kurniailah aku hukum yang selari dengan hukumMu, adakanlah bagiku lisan yang jujur (sebutan baik) pada sekalian hambaMu, dan jadilah Engkau bagiku pendengaran, pengelihatan, lisan, hati, akal, tangan dan pendokong.*

وَاعْصِمْنِي مِنَ الْخَطَا وَالزَّيْغِ وَالطُّغْيَانِ وَالْكَذِبِ فِي الْأَقْوَالِ وَالْأَفْعَالِ وَالْأَحْوَالِ  
وَالْعُقُودِ وَالظُّنُونِ وَالْأَوْهَامِ وَالْبَصَائِرِ وَالْأَبْصَارِ وَالْخَوَاطِرِ وَالْأَفْكَارِ وَفِي خَفِيِّ  
خَفِيِّ الْهَوَاجِسِ وَالْوَسْوَاسِ وَالْهَمِّ وَالْفِكْرِ وَالْقُدْرَةِ وَالْإِرَادَةِ وَالْحَرَكَاتِ  
وَالسَّكَنَاتِ وَفِيمَا عَلِمْتَ يَا عَالِمَ الْخَفِيَّاتِ أَنْتَ رَبِّي وَعِلْمُكَ حَسْبِي لَا أَسْأَلُ  
وَلَا أَفْصَلُ (فَإِنَّ رَبِّي غَنِيٌّ كَرِيمٌ).

*"Peliharalah aku dari kesalahan, kesesatan, keterlampauan dan pendustaan pada perkataan, perbuatan, ahwal, akad, zhan, waham, pandangan dan tilikan, lintasan dan fikiran, dan pada ketersembunyian yang lebih sembunyi dalam lipatan sanubari dan was-was, kedukacitaan, fikir, kudrat, kehendak, segala gerak dan diam, dan pada apa yang Engkau ketahui wahai Tuhan yang Maha Alim tentang segala yang sembunyi, Engkau Tuhanku, cukuplah ilmuMu bagiku, aku tidak minta dan tidak memperincikan; sesungguhnya Tuhanku Maha Kaya lagi Maha Berbudi.*

وَإِنَّمَا هِيَ عُبودِيَّةٌ تَجْرِي عَلَى مَا تَشَاءُ مِنَ الدُّعَاءِ وَالسُّؤَالِ وَالتَّفْصِيلِ وَالْإِجْمَالِ  
وَالْأَقْوَالِ وَالْأَفْعَالِ وَالْعُقُودِ وَالْأَحْوَالِ وَغَيْرَ ذَلِكَ مِمَّا يَكْسِبُ وَيُعْطَى بِلاَ كَسَبٍ



وَلَا سُّؤَالَ (إِنَّ رَبِّي بِمَا تَعْمَلُونَ مُحِيطٌ).

*“Sesungguhnya rayuanku ini adalah ‘ubudyiyah yang Engkau perjalankan ke atas apa yang Engkau kehendaki dari doa, permintaan, perincian dan keseluruhan, segala perkataan dan perbuatan, segala akad dan ahwal, dan selain itu yang dapat diusahakan dan diberikan. Tuhanku memberi walau tanpa hambaNya berusaha dan meminta, sesungguhnya Tuhanku maha meliputi ilmuNya terhadap apa yang kamu lakukan.”*

Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ berkata: “Ada empat zikir: (1) zikir yang engkau sebut, dan (2) zikir yang dengannya engkau mengingat, dan (3) zikir yang mengingatkamu, dan (4) zikir yang dengannya engkau diingati.

“Adapun yang pertama maka itulah bahagian orang awam yaitu zikir yang menghalau kealpaan atau apa yang engkau bimbangi dari kealpaan. Yang kedua zikir yang menjadikan engkau ingat; sama ada ingat azab atau nikmat, dampingan atau kejauhan dan lain-lain, atau sama ada ia mengingatkan engkau kepada Allah yang Maha Tinggi.

“Yang ketiga zikir yang mengingatkan engkau kepada empat yang diingati:

- Segala kebaikan dari Allah.
- Segala kejahatan dari pihak nafsu.
- Segala kejahatan dari pihak musuh.
- Bahawa semua itu hakikatnya adalah ciptaan Allah belaka.

“Yang keempat zikir yang dengannya engkau diingati, yaitu zikir (ingatan) Allah kepada hambaNya yang mana pada zikir ini tiada bahagian hamba padanya walaupun pada zahirnya zikir itu berlari atas lisan si hamba. Inilah dia tempat terkaya padanya yang berzikir mengingat, atau yang diingati yaitu Allah yang Maha Tinggi lagi Maha

Tertinggi. Jika engkau masuk ke dalam daerah zikir ini maka jadilah yang mengingat diingati dan yang diingati mengingat, inilah hakikat penamat suluk yang dijalani oleh seorang salik menuju Robbil Alamin Subhanahu wa taala

وَاللَّهُ خَيْرٌ وَأَبْقَى

*“...dan Allah jualah yang lebih baik dan lebih kekal (balasan pahalaNya)” Saiyidina Thoha: 73*

“Dan hendaklah engkau duhai murid yang salik lagi kembara kepada Allah Taala mengamalkan zikir yang menjamin keamanan dirimu dari azab Allah di dunia dan di Akhirat, hendaklah engkau berpegang teguh dengannya dan melaziminya berterusan. Hendaklah engkau beramal zikir

الْحَمْدُ لِلَّهِ

*“Segala puji bagi Allah”*

أَسْتَغْفِرُ اللَّهَ

*“Aku memohon ampunan Allah”*

dan

لَا حَوْلَ وَلَا قُوَّةَ إِلَّا بِاللَّهِ

*“Tiada daya dan upaya melainkan dengan Allah.”*

Alhamdulillah tika di sisi nikmat dan ihsan dari Allah. Astaghfirullah tika keterlanjuran nafsu atau pesona musuh walau pun semua itu hakikatnya adalah ciptaan dan kehendak Allah jua. La haula wala quwwata illa billah di sisi `awaridh (rintangan) yang mendatangimu dari Allah atau terbit dari dirimu kepadaNya.



“Dan waspadalah, sesungguhnya rahsia pada perkara ini ialah apa yang berlaku dalam zikir atau fikir atau diam kebanyakannya pada had yang empat ini pada yang baik atau buruknya. Maka ucapkanlah Alhamdulillah dan Astaghfirullah.

“Jika engkau didatangi rintangan dari pihak Allah atau pihak dirimu tidak selepas kebaikan atau tidak selepas kejahatan maka engkau pula tidak berkuasa untuk menolaknya atau mendatangkannya maka ucapkanlah: La haula wala quwwata illa billah. Dan himpunkanlah amalan tiga zikir ini pada umum waktumu, lazimilah ia nescaya engkau akan mendapati keberkatannya Insya Allah Taala.

Saiyidina As-Syeikh As-Syazili رَضِيَ اللهُ عَنْهُ berkata: “Ketuk dan guguhlah pintu zikir dengan meminta suka dan memfakir diri kepada Allah Taala dengan melazimi diam dari segala misal dan jenis, menjaga sirr dari bicara diri pada tiap nafas jika engkau mahu kekayaan [hati].”

Saiyidina رَضِيَ اللهُ عَنْهُ berkata: “Tiga pekerjaan ini [engkau jagalah]; (1) kosongkanlah lidahmu untuk berzikir, dan (2) hatimu untuk tafakkur, dan (3) badanmu untuk mengikut perintah maka engkau dari kaum solihin.”

Saiyidina رَضِيَ اللهُ عَنْهُ berkata: “Jika zikir menjadi berat atas lidahmu, banyak yang sia-sia dari perkataanmu, bebas anggotamu kepada syahwat dan tertutup pintu fikiran pada perkara yang soleh untukmu, maka ketahuilah bahawa itu berlaku akibat besarnya dosamu, atau terkandungnya gejala munafik dalam hatimu. Dan tiadalah bagimu jalan selamat lain dari taubat, kebaikan, berpegang teguh kepada Allah dan ikhlas pada agama Allah. Tidakkah engkau mendengar firman Allah Taala:

إِلَّا الَّذِينَ تَابُوا وَأَصْلَحُوا وَاعْتَصَمُوا بِاللَّهِ وَأَخْلَصُوا دِينَهُمْ لِلَّهِ فَأُولَٰئِكَ مَعَ الْمُؤْمِنِينَ

“Kecuali orang-orang yang bertaubat (dari perbuatan munafik itu) dan memperbaiki amalan mereka (yang salah), dan mereka

*pula berpegang teguh kepada Allah, serta mengerjakan agama mereka dengan ikhlas kerana Allah, maka mereka yang demikian itu ditempatkan bersama orang-orang yang beriman...” An-Nisa’:*  
**146**

[...lihatlah firman Allah “...bersama orang-orang yang beriman...”]  
dan bukannya dari golongan yang beriman.

Renungilah perkara ini jika engkau memahami dengan mendalam.  
Allah lebih tahu.



## Bab 40

# MUROQBAH

**D**alam satu kesempatan majlis kami bersama syeikh kami Saiyidina As-Syarif Abdun Nasir Abu Bakr As-Siddiq Al-Hasani رَضِيَ اللَّهُ عَنْهُ وَأَرْضَاهُ lau datanglah seorang murid yang kelihatannya membimbangi sesuatu. Dia bertanya: “Ya Saiyidina, mengapa kita Ahlus Sunnah wa Jamaah dan ahli zikir bilangan kita sedikit jika dibandingkan dengan golongan engkar, pembenci dan penentang yang bilangan mereka terus bertambah sedangkan bilangan kita terus berkurangan,” maka kata Saiyidina رَضِيَ اللَّهُ عَنْهُ : “Bertenanglah wahai anakku, duduk perkara ini tidaklah seperti yang engkau sangkakan. Tidakkah engkau mendengar firman Allah Taala yang Maha Benar:

قُلْ لَا يَسْتَوِي الْخَبِيثُ وَالطَّيِّبُ وَلَوْ أَعْجَبَكَ كَثْرَةُ الْخَبِيثِ فَاتَّقُوا اللَّهَ يَا أُولِي  
الْأَلْبَابِ لَعَلَّكُمْ تُفْلِحُونَ

“Katakanlah (wahai Muhammad): “Tidak sama yang busuk dengan yang baik, walaupun banyaknya yang busuk itu menarik hatimu. Oleh itu bertaqwalah kepada Allah wahai orang-orang yang berakal fikiran, supaya kamu berjaya” **Al-Ma`idah: 100**

Lalu Saiyidina pun mula memberi syarahan dan tafsiran tentang ayat agung ini dan sememangnya seluruh isi Al-Quran adalah agung.



Kita sambung lagi bicara dalam siri kali ini dengan topik muroqobah.

(Muroqobah ertinya awas, mengawasi dan merasa diawasi Allah).

Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ berkata: “Kemudian hendaklah engkau -wahai penempuh jalan Akhirat- menghasilkan apa yang telah ku suruh pada zahir dirimu. Jika engkau telah melakukan arahan itu maka duduklah di hamparan muroqobah dan bekerjalah mengikhlaskan batinmu hingga tiada lagi padanya suatu yang ditegah Allah. Berilah kesungguhan akan haknya, sedikitkanlah memandang pada zahirmu jika engkau mahu membuka batinmu kepada segala rahsia malakut Tuhanmu.

“[Jika] ada yang mendatangimu dari lintasan-lintasan yang menghalangmu dari mencapai kehendakmu, maka ketahuilah yang pertama bahawa Tuhanmu itu Maha Dekat denganmu. Ketahuilah hakikat ini dengan pengetahuan yang bersemi di lubuk hatimu dengan merenung berkali-kali pada soal mendatangkan manfaat kepadamu dan menolak mudarat darimu. Dan lihatlah firmanNya:

هَلْ مِنْ خَالِقٍ غَيْرِ اللَّهِ يَرْزُقُكُمْ مِّنَ السَّمَاءِ وَالْأَرْضِ

“...adakah yang Maha Pencipta selain daripada Allah; Dia memberi rezeki kepada kamu dari langit dan bumi...” **Fathir: 3**

Sesungguhnya yang dari bumi adalah nafsumu dan yang dari langit adalah hatimu, maka jikalau turun sesuatu dari langit menimpa ke bumi siapakah yang mampu menepisnya darimu selain Allah?!

يَعْلَمُ مَا يَلِجُ فِي الْأَرْضِ وَمَا يَخْرُجُ مِنْهَا وَمَا يَنْزِلُ مِنَ السَّمَاءِ وَمَا يَعْرُجُ فِيهَا وَهُوَ  
مَعَكُمْ أَيْنَ مَا كُنْتُمْ

“...Dia mengetahui apa yang masuk ke bumi serta apa yang keluar daripadanya; dan apa yang diturunkan dari langit serta apa yang naik padanya. Dia tetap bersama-sama kamu di mana sahaja kamu



*berada..."* **Al-Hadid: 4**

“Maka berikanlah ma’iyyah (kebersamaan) ini akan haknya dengan melazimi `ubudiyyah kepada Allah pada segala hukumNya. Hendaklah engkau meninggalkan sikap membantah rububiyyah (sifat ketuhanan) pada perbuatanNya, sesungguhnya siapa yang membantah Allah tewaslah ia.

وَهُوَ الْقَاهِرُ فَوْقَ عِبَادِهِ وَهُوَ الْحَكِيمُ الْخَبِيرُ

*“Dan Dialah yang Maha Keras (berkuasa) atas sekalian hambaNya (dengan tadbir dan takdir); dan Dialah yang Maha Bijaksana lagi maha mendalam pengetahuanNya”* **Al-An`am: 18**

“Sebaik-baik kebenaranlah yang mahu aku katakan padamu: “Tiadalah satu nafas dari segala nafasmu melainkan ia ditangani oleh Allah tidak kira sama ada engkau menyerah diri kepadaNya atau melawan. Kerana engkau terkadang mahu menyerah dan tak mahu melawan, dan terkadang engkau mahu melawan dan tak mahu menyerah.

“Maka yang demikian itu memberi petunjuk kepada rububiyyahNya Allah dalam semua perbuatanNya, [ini dapat dilihat] terutamanya bagi hamba berkerja menjaga hatinya untuk mencapai segala hakikat.

“Maka jika beginilah sifatnya duduk perkara ini hendaklah engkau memberikan adab akan haknya pada apa yang datang ke atasmu dengan tidak mempersaksikan sesuatu darimu sebagai awal melainkan dengan keawalanNya, tidak juga akhir melainkan dengan keakhiranNya, tidak juga zahir melainkan dengan kezahiranNya dan tidak juga batin melainkan dengan kebatinanNya.” (Frasa ini diungkap oleh seorang wali quthb dan aplikasinya adalah untuk seorang quthb sepertinya, bukan untuk murid. Maksudnya ialah bahawa segala-galanya dengan Allah, untuk Allah, atas Allah dan dari Allah... Allah jua yang lebih mengetahui).

“Apabila telah kau capai awal dari yang Maha Awal engkau

pun memandang kepada apa yang akan berlaku darinya; yakni dari hal yang ditangani olehNya. Jika terbit darimu suatu lintasan dari yang dikasihi dan ia muafakat dengan jiwa, atau lintasan dari yang tidak disukai yang muafakat dengan jiwa namun syariat tidak mengharamkannya maka tiliklah apa yang diciptakan Allah dalam dirimu dari kesan lintasan jiwamu tadi; jika engkau mendapati dari situ ada peringatan terhadap Allah Taala maka hendaklah engkau mentahqiq akan dia, maka yang demikian itu adalah adab waktu itu ke atasmu dan janganlah engkau berpaling kepada selainnya. (Di sini hendaklah engkau beradab; ertinya sabar, dan sabar adalah anak kunci jaya. Inilah seperti yang telah kami sentuh sebelum ini yaitu adab hati dan ilmu munazalat).

“Jika engkau tidak beroleh jalan untuk mentahqiq yang demikian itu maka hendaklah engkau mengambil sikap *ta’risy* (diam dan tenang) di hadratNya. Maka diam itulah adab waktu itu ke atasmu dan jika engkau berpaling kepada selainnya sesungguhnya engkau telah tersalah jalan.” (Ertinya dalam situasi itu hendaklah engkau mengambil adab diam dan tenang, hendaklah engkau bersama Allah melalui doa kerana doa itu intipati ibadah).

“Jika itu juga tak dapat kau lakukan maka hendaklah engkau bertawakkal, redho dan taslim (pasrah)... (tiga sifat ini merupakan antara sebesar-besar adab seorang murid). Jika engkau tidak mendapati jalan untuk itu maka hendaklah engkau berdoa untuk mendatangkan manfaat dan menolak mudarat dengan syarat pasrah dan menyerahkan segala urusanmu (kepadaNya).” (Iman yang paling dhaif dan dalam masa yang sama solusi paling kuat adalah doa wahai sekalian anakku. Doa merupakan rahsia teragung, dalam apa hal sekali pun janganlah kita tinggalkan doa).

“Awaslah, [di sini] jangan engkau menetapkan pilihan peribadi kerana yang demikian itu adalah jahat di sisi mereka yang punya mata hati.” (Ini merupakan intipati rahsia dalam Tareqat As-Syaziliyyah; menyerahkan pilihan kepada Allah. Kerana engkau -duhai anakku-



## Bekalan Murid Ke Jalan Akhirat

jika menetapkan pilihan peribadi bererti engkau menguatkan nafsumu, bererti engkau memfardhukan kewujudannya dan engkau membantunya untuk menguasai dirimu duhai murid. Mengertikah engkau?).

“Maka [di situ] ada empat adab: (1) Adab Tahqiq, (2) Adab Ta’risy, (3) Adab Tawakkal dan (4) Adab Doa. Hamba yang tahqiq dengan Allah akan dijaga dari murkaNya, hamba yang diam dan tenang di sisiNya maka cukuplah dia dengan Tuhannya, hamba yang bertawakkal kepadaNya rehatlah dia dari pilihan peribadi dan senanglah dia dengan pilihan Tuhannya, hamba yang berdoa kepadaNya dengan syarat menuju dan mahabbah kepadaNya nescaya akan dimustajabkan Allah dengan sekehendakNya pada apa yang baik untuk si hamba, dan jika Allah mahu ditahan doa itu dari apa yang tidak baik bagi si hamba. Adapun setiap satu adab ini ada hamparannya.”

(Lihatlah, segalanya dibina di atas landasan adab -bahkan walau ia diberi istilah lain sekalipun namun adab tetap adab-, kerana ia berdasarkan kedudukan maqam. Adapun maqam seorang murid itu jika dia menyintai syeikhnya sepenuh hati, fana’ pada syeikh dan mentakzimnya maka si murid akan bersama syeikh di dalam kembara ini dan menjadi pembantu kepada syeikh. Tidak penting apakah si murid mengetahui atau tidak, merasai atau tidak, kerana siapa saja yang menempuh jalan ini dan mencapai apa-apa maqam pada kembara ini maka tujuan mereka adalah semata-mata yang Maha Satu; Allah yang Maha Tunggal lagi Maha Perkasa).

(Perenggan berikut akan menjelaskan empat adab yang tersebut di atas. Ia dialami oleh seorang murid sufi yang telah maju dalam suluk (tarbiyyah)nya, murid ini telah mengerti dengan sirrnya, makrifat dengan akal nya dan merasa dengan hatinya. Tahap ini tidak dicapai melainkan dengan fana dalam zikir yang disuruh oleh syeikh kepadanya).

- (1) Pertama hamparan tahqiq: Jika datang padamu lintasan dari selainNya dan disingkapkan bagimu tentang sifatNya maka hendaklah engkau berada di sana dengan sirrmu dan diharamkan ke atasmu untuk musyahadah selainNya.
- (2) Kedua hamparan ta’risy: Jika datang padamu lintasan dari

selainNya dan disingkapkan bagimu tentang perbuatanNya maka diam dan tenanglah di situ dengan sirrmu dan haramlah ke atasmu untuk musyahadah selain sifatNya sebagai saksi atau yang disaksikan... ada pun pada yang awal fana' saksi dan menafikan yang disaksikan.

- (3) Ketiga hamparan tawakkal: Jika datang padamu lintasan dari selainNya -maksudku yang telah disebutkan tadi- sama ada lintasan yang dikasihi atau yang tidak disukai, dan disingkapkan bagimu akan berbagai keaiban, maka tetaplah engkau duduk di atas hamparan mahabbahNya dengan bertawakkal kepadaNya dan redho atai segala yang terlihat kepadamu dari kesan perbuatanNya di dalam cahaya hijabNya.
- (4) Keempat hamparan doa: Jika datang padamu lintasan dari selainNya dan disingkapkan bagimu kefakiranmu kepadaNya, maka sesungguhnya Dia telah menunjukkanmu kepada maha kayanya Dia. Ambillah kefakiran sebagai hamparan dan awaslah jangan sampai engkau turun dari darjat ini kepada selainnya lalu tanpa sedar engkau jatuh kepada makar Allah. Kebinasaan paling kecil jika engkau turun dari darjat ini ialah engkau kembali kepada nafsumu sebagai pentadbir dan membuat pilihan peribadi untuknya. Maka adalah halmu yang paling mulia -sebenarnya engkau tidak punya hal apa pun- ialah engkau mendorong dirimu kepada kesungguhan yang kegigihan, sama ada pada zahir atau batinmu kerana tamaknya engkau menolakkan dari dirimu apa yang Allah mahu menolakkannya darimu. Lalu bagaimana pula halnya jika engkau membantah [ketentuan] Allah pada sesuatu yang Dia tidak mahu menolakkannya darimu.

“Dalam bab ini [kebinasaan] yang paling ringan adalah dakwa-dakwi syirik. Konon engkau telah menang namun sebenarnya tiada menangnya engkau. Jika engkau menang maka duduklah di mana yang engkau suka, dan selama-lamanya engkau tidak dapat berada di mana yang engkau suka. Maka usaha kegigihanmu itu hanya memberi



## Bekalan Murid Ke Jalan Akhirat

petunjuk kepada betapa besarnya jahilmu terhadap perbuatan Allah. Aduh betapa hodohnya ahli ibadah yang jahil atau alim yang fasik.

“Entahlah, tidak ku tahu dua sifat ini yang mana satu mahu ku sifatkan ia padamu; apakah jahil engkau atau fasik, atau kedua-duanya sekali. Kami mohon perlindungan Allah dari nafsu menggendalakan mujahadah dan dari kosongnya hati dari musyahadah. Kerana kegendalaan demikian itu menafikan syariat, dan kekosongan demikian itu menafikan tauhid, sedangkan Hakim Syarak telah menetapkan adanya kedua syariat dan tauhid itu...” (Demikian inilah tareqat; betapa ia menjagamu dari berbagai jenis syirik... dan lepas dari berbagai jenis syirik itulah pekerjaan yang terlalu payahnya).

“Dan tinggalkanlah sikap membantah Tuhanmu nescaya jadilah engkau hamba yang mengesakanNya, kerjakanlah segala rukun syarak nescaya jadilah engkau seorang sunni, dan himpunkanlah antara keduanya (mengesakan Allah dan mengerjakan syarak) nescaya jadilah engkau ahli tahqiq.

أَوَلَمْ يَكْفِ بِرَبِّكَ أَنَّهُ عَلَى كُلِّ شَيْءٍ شَهِيدٌ

“...Belumkah cukup (bagi mereka) bahawa Tuhanmu mengetahui dan menyaksikan tiap-tiap sesuatu?” **Fussilat: 53**

“Kemudian jika terlintas juga dalam muroqobahmu suatu lintasan dari yang makruh pada syarak, atau yang disukai pada syarak dari apa yang telah lalu darimu, maka pandanglah kepada apa yang engkau ingati dan apa yang engkau beri perhatian. Jika dengannya engkau mengingat Allah maka adabmu ialah mentauhidkan Dia di atas hamparan tafriid (mengesakan)Nya.

“Jika engkau turun dari dari pintu darjat ini dan engkau tidak berada di sana maka adabmu ialah melihat kemurahan budiNya yang telah menutupmu pada maksiat yang telah kau lakukan terhadapNya, Dia tidak menyingkap tutupanmu itu kepada mana-mana makhlukNya. Jika engkau dipalingkan dari yang ini dan engkau teringat maksiatmu dan

engkau tidak teringat tiga adab yang di atas maka hendaklah engkau melaksanakan adab doa dalam taubat atau yang seumpamanya dengan memohon ampunan sebagaimana orang bersalah meminta ampunan dari dosa yang meliputinya. Ini di pihak yang makruh pada syarak.

“Adapun jika datang kepadamu lintasan ketaatan yang telah lalu dan engkau mengingatnya maka janganlah sejuk matamu dengannya, bahkan hendaklah sejuk matamu terhadap Tuhan yang telah menjadikan ketaatan itu. Jika sejuk matamu dengan selainNya jatuhlah engkau dari darjat tahqiq. Jika engkau tidak berada pada kedudukan ini maka hendaklah engkau berada pada kedudukan yang selepasnya, yaitu engkau musyahadah betapa agungnya kemurahan budi Allah ke atasmu yang telah menjadikan engkau ahli pada kedudukan ini, ada pun warisan darinya ialah engkau akan direzekikan yang terlebih baik darinya, bahkan warisan itu merupakan antara petandanya yang soheh.

“Jika engkau tidak mencapai kedudukan ini dan pencapaianmu pada kedudukan yang kurang darinya, maka adabmu di situ ialah memandang dengan halus pada ketaatan itu apa ia telah benar-benar [engkau kerjakan] dan engkau selamat dari apa-apa tuntutan ke atasnya, atau sebaliknya lalu engkau di tuntutan atas sesuatu kecacatan darinya? Kami berlindung dengan Allah dari kebaikan yang bertukar menjadi kejahatan.

وَبَدَا لَهُمْ مِّنَ اللَّهِ مَا لَمْ يَكُونُوا يَحْتَسِبُونَ

“... dan terlihatlah kepada mereka dari (hukum) Allah, azab yang mereka tidak pernah fikirkan” **Az-Zumar: 47**

“Jika engkau turun dari darjat ini kepada selainnya maka adabmu ialah menuntut keselamatan diri darinya dengan kebaikannya dan keburukannya. Hendaklah larimu dari kebaikanmu lebih banyak dari larimu dari keburukanmu jika engkau mahu menjadi kalangan solohin.

Saiyidina As-Syazili رَضِيَ اللَّهُ عَنْهُ وَأَرْضَاهُ وَتَقَعْنَا اللَّهُ بِهِ فِي الدَّارَيْنِ berkata: “Jika



## Bekalan Murid Ke Jalan Akhirat

engkau mahu mendapat bahagian sepertimana yang diperolehi oleh para awliya Allah Taala maka hendaklah engkau bersikap menolak seluruh manusia tanpa kecuali, melainkan insan yang memberimu petunjuk kepada Allah dengan isyarat yang jujur dan amalan yang sabit yang tidak dibantah oleh kitab dan sunnah.

“Lagi hendaklah engkau berpaling dari dunia ini tanpa kecuali. Janganlah engkau menjadi orang yang berpaling dari dunia kerana mahu mendapat habuan sesuatu dari sikap itu. Sebaliknya jadilah engkau pada berpaling dari dunia itu sebagai abdi kepada Allah yang memerintahkanmu untuk menolak musuhNya.

“Lalu jika engkau berada dalam dua resam ini; (1) berpaling dari dunia dan (2) zuhud dari manusia, maka hendaklah engkau

(1) duduk bersama Allah dengan muroqobah, dan (2) melazimi taubat dengan ri'ayah, dan (3) istighfar kepada Allah dengan inabah, dan (4) tunduk kepada segala hukum dengan istiqamah.

“Tafsir empat perkara ini ialah engkau menjadi abdi kepada Allah pada apa yang engkau datangi, dan engkau muroqobah hatimu; yaitu engkau tidak melihat apa-apa yang ada dalam kerajaanNya ini sebagai bukan milikNya. Jika engkau dapat melakukan ini engkau akan diseru oleh bisikan Al-Haq dan cahaya kemuliaan: “Sesungguhnya engkau telah buta dari jalan petunjuk, dari mana engkau dapat mendirikan muroqobah?!”

(Amat penting untuk diinsafi bahawa engkau takkan dapat melakukan muroqobah melainkan jika engkau telah bersedia untuknya, kemudian engkau melaksanakan muroqobah itu dengan izin syeikh dan bimbingan darinya. Di situlah baru engkau beroleh makrifat dan jaya, seterusnya dapat melepasi fasa ini).

“Bukankah engkau mendengar firmanNya:

وَكَانَ اللَّهُ عَلَى كُلِّ شَيْءٍ رَّقِيبًا

“...(dan ingatlah) bahawa Allah sentiasa mengawasi (moroqobah)



*tiap-tiap sesuatu”* **Al-Ahzab: 52**

“Lalu di situ engkau akan kedatangan perasaan malu yang mendorongmu kepada taubat terhadap apa yang engkau sangka sebagai dampingan kepadaNya. Maka lazimilah taubat dengan ri’ayah (penjagaan) terhadap hatimu. Janganlah engkau menyaksikan ia sebagai suatu kelebihan darimu nescaya engkau akan kembali gelincir kepada lubang yang engkau telah keluar darinya sebentar tadi.

“Jika sudah sah keadaan ini padamu engkau akan diseru oleh bisikan dari pihak Al-Haq: “Bukankah taubat itu bermula (dengan izin) dariNya, dan inabah itu (terbit) mengikut dariNya jua? Bukankah kesibukanmu dengan apa yang merupakan sifatmu adalah penghalangmu dari tujuanmu?

“Maka di situ engkau memandang kepada segala sifatmu, lalu engkau memohon perlindungan Allah darinya, lalu engkau pun beristighfar dan inabah. Maka istighfar itu engkau memohon agar dilindungi dari [kejahatan] sifatmu dengan kembali rujuk kepada sifat [yang diredhoi]Nya.

“Jika engkau bersama dengan sifat ini -maksudku istighfar dan inabah- engkau akan diseru dari kedekatan: “Tunduklah kepada segala hukumKu dan tinggalkanlah sikap membantahku, luruslah engkau dengan kehendakku dengan menolak kehendakmu. Sesungguhnya ia merupakan rububiyyah yang membela ‘ubudiyyah. Dan jadilah engkau “hamba yang dimiliki, yang tak mampu bertindak apa-apa.” Bilamana Aku melihat darimu ada satu kekuatan nescaya aku serahkan engkau kepadanya

إِنَّ اللَّهَ بِكُلِّ شَيْءٍ عَلِيمٌ

*“Sesungguhnya Allah Maha Mengetahui segala-galanya.”*

“Jika telah sah engkau pada bab ini dan engkau melaziminya, maka dari situ engkau akan melihat berbagai rahsia yang hampir-hampir tidak engkau dengari ia dari semesta alam.”



## Bekalan Murid Ke Jalan Akhirat

[Demikianlah kata Saiyidina As-Syeikh As-Syazili رَضِيَ اللَّهُ عَنْهُ وَأَرْضَاهُ]. Silakanlah merenung dan menilik kepada keindahan dan kesempurnaan jalan menuju Allah dengan sepenuh makna pada tiap kalimatnya yang menjurus kepada tahqiq `ubudiyyah kepada Allah Tuhan yang Maha Esa lagi Maha Perkasa.

Intisari dari segala intisarinya ialah doa merupakan intipati ibadah, jangan sekali-kali engkau meninggalkan doa.